

宋

會

要

宋會要市

太祖乾德三年四月十三日詔開封府令京城夜市至三鼓已來不得禁止五年十二月二日詔曰錢乃所以通貿易布帛所以備財帛時之急務不可闕焉故幣之輕姦國家所禁物之行濫律令甚明近聞都市之中賈人作偽或刮銅取鉛盜鑄公行或塗粉入藥詐欺規利是致貨泉日弊偷薄萌生禁而止之抑惟舊典自今京城及諸道州府市肆並不得行用新小錢鐵等錢兼不得以疎惡絹帛入粉藥違者重寘其罪

真宗天禧二年八月二十一日閣門祇候張明言臣知邕州本州配率竹木修葺官市廊店自今以倉司頭子

錢修蓋更不配民帝曰前已累詔不令興土木之功及
占街衢今尚如此科率何也此乃有司曠職可令申明
前制嚴行斷絕 仁宗慶曆五年九月十六日詔河北
河東陝西沿邊州軍有以堪造軍器物鬻於化外者以
私相交易律坐之仍編管近裏州軍皇祐五年七月一
日置邕州城外沙頭和市場至和三年七月十八日上
封者言嶺南村墟聚落間日會集裨販謂之虛市請降
條約令於城邑交易冀增市算帝曰徒擾民爾可仍其
舊

嘉祐八年正月二十六日宰臣韓琦言秦州永寧寨元
以抄市券馬之處昨修古渭寨絕在永寧之西而蕃漢

多互市其間因置馬場凡歲用緡錢十餘萬苟蕩然流入虜中寔耗國用請復置場於永寧而罷古渭城買馬從之

開禧元年三月二日廣東提刑陳映言廣南有摧鋒軍專以防盜軍中有回易所以養軍比年以來於海洋僻遠去處或稱巡鹽或稱捕盜客舟往來寔受回易軍兵之擾乞本本路經畧提刑司今後摧鋒軍除捕盜外不許諸司別作名色差撥下海所有本軍回易止許就屯駐營寨去處開置鋪席典質販賣庶幾不為商賈之害從之 嘉定十四年九月十日明堂赦文朝廷行下諸路州軍收買軍需之物並條支降合撥案名錢給還切

慮諸路州不即支還價錢妄行科擾仰州縣常切遵守毋致違戾如違仰監司按劾以聞同日赦文戶部每年行下逐州委官收買大軍支遣綿絹係先截撥綱運上供諸色窠名錢照市價收買仍免除頭子錢已是詳盡尚慮州郡將已截綱運官錢占吝在州抑勒民戶牙僧先次買發止支些小價錢妄以未曾截撥為名遷延歲月更不盡數支給自今赦下日如有似此未支錢數仰人戶徑經戶部陳訴將未支數目行下本處日下一併支還仍將當職官吏按治施行同日赦文諸路監司并二廣州郡合發進奉聖節及大禮銀絹在法合以係省錢收買今聞諸處科抑民間買納委是違戾仰諸路監

此稿不全容再查補印抄好以免遺失

宋會要受納

高宗紹興三年正月二十三日江東西路宣諭劉大中
言信州并諸縣從來受納人戶秋苗粳米等於正耗外

勅止

別收名色非據合納正數不啻一倍以上乞申嚴法禁
行下諸路州縣不得更似日前大收加耗詔令戶部檢
坐條例申嚴行下不得加耗太重 四年六月十七日
詔諸路專委提刑司檢察州縣受納夏稅和買預買紬絹
如有故促期限及阻節乞取諸般搔擾並按劾聞奏當
議重寘典憲其合于人先次送獄禁勘 九月十五日
明堂赦比年以來郡守進務侵漁多選委貪吏受納至
有輸一碩而加耗至三四斛者刻取其贏以資公帑民
被其害無不怨嗟仰帥臣監司常切覺察如敢循習故
態並按劾以聞當議重寘典憲仍許人戶越訴 五年
八月二十日臣僚言民間送納兩稅斛斛多緣推割不

郡縣

明催科無術支移太速折變價高攬納射利公吏求貨
雜以濕惡高下舛面盜印虛鈔失脂羨餘如此十事州
郡漫不省察欲望申嚴受納差官條令委漕臣前期取
索將逐州縣合差官各委知通加意遴選連銜保舉依
舉官法結罪同狀兼受納倉封送官鈔率經累日縣官
失於朱銷再行舉催擾復民戶更乞州縣受納之際督
責主簿就受納倉即時銷簿又有因緣詐偽以團印樣
製相似輒用舊鈔朱銷新簿暗失稅數為患滋甚若將
逐年團印樣製施行增減大小間以篆額為文庶可區
別新舊檢察欺隱其州縣受納絹帛差官等亦望此施
行詔令戶部勘當尚書省其後戶部言所陳惟割等

十事禁約外今欲下諸路轉運司令行下所部州郡常
切遵守仍將受納二稅官依法州選幕職外縣差丞簿
施行及夏稅入納月分即依所乞就受納倉銷簿其團
印樣製並依法更改彫造不得與以前年分相似如主
簿有事故即委縣丞就倉銷押務在革去虛印失陷以
舊鈔銷新簿之弊也從之 九月三日詔受納苗米所
收水腳市例廩費等錢每碩不過二百文省如不及二
百文處依舊數收納其自來不曾收納去處即不得創
行增納 六年九月十八日右司諫王縉言近覩指揮
許江浙人戶預以米斛折納來年紬絹每足二碩取其
情願誠為公私之利竊見諸路州縣受納秋苗例有加

耗欲望特降睿旨應折納米斛並免收耗於是戶部言
浙西州軍紹興六年分夏稅紬絹折納米斛已承指揮
令抵斛交量所有自來合收加耗并頭子糜費等錢並
不得收納如違並計贓坐罪詔依已降指揮施行 十
月二十六日右司諫王縉論受納之弊朝廷雖屢降約
束而州縣視以為常人戶輸納益受其弊且如受納多
處漕臣差官其次則本州選委而倉庫專斛等願差某
官則預先賄賂州縣監司主行之吏差帖既下私相慶
賀開場之後百端作弊或晚入早出或隨例迎送或幹
當別事或非理退換使人戶殷擔出入守候費用甘心
重收加耗或多收樣米分給人從或照管親知惟納封

鈔或與攬納之人通同作過欲令人戶高價貼陪或收
耗既多陰計其數印打虛鈔至般未入倉經旬不納而
追催鞭箠略不加察或已納而不給鈔或給鈔而不銷
簿積弊至此不可不懲詔令戶部檢坐受納及銷鈔等
見行法令并前後約束申嚴行下仍委諸路常平茶鹽
提刑轉運分定州縣躬親體究有無前項違犯情弊搔
擾事件去處保明申尚書省如縱容隱庇體訪得知
保明官司并違戾州縣並令取旨重行貶竄十一月
九日詔秀州當職官先次各降一官人吏從重斷勒罷
以兩浙轉運副使朱繹體究得秀州海鹽縣受納未
斛據攬人送納每碩於人戶處討米一碩六斗五升或

一碩七斗故也 七年九月二十二日明堂赦州縣受
納作弊昨降指揮令諸路監司分定州縣體究並不恪
意奉行外臺耳目慢令若此何所賴焉仰檢坐前後條
例行下州縣嚴加約束常切遵承尚敢蹈習違戾即按
劾聞奏犯人重行典憲必罰無赦 十年九月十日明
堂赦州縣百姓輸納稅租監官多是晚入早出不即受
納給鈔及縱容合干人百端非理退難遂致憑藉攬納
之人重有倍費雖已有前後約束仰監司嚴加檢察如
尚或蹈襲違戾並仰按劾奏聞 紹興十三年十一月
八日南郊赦亦同 十七年二月初四日上諭輔臣曰昨
日有人言州縣折納稅絹每疋有至十千者恐傷民力

可令戶部措置 二十年二月一日將作監丞李巖老
言州縣理納稅賦必依常限及時催科令佐毋得分鄉
自至村落詔令戶部檢坐見行條法申嚴行下 五月
二日前權知臨江軍彭合言本軍清江縣五鄉與四鄉
秋苗每碩加耗米七斗於造簿之際已行聲載至人戶
赴官送納遂成久例獨一鄉係新塗縣撥隸則無此耗
欲望悉與蠲免仍於造簿之際不得更載前件耗數或
以係經界均稅即不得將舊來係簿加耗於正苗內均
敷上曰彭合所論可令戶部照應本軍別縣體例蠲免
合昨任縣官監司固曾列薦今可與監司知州差遣
六月二日右正言章復言夏秋人戶所納二稅或在州

或就縣各從其便及時入官不致拖欠今訪聞州郡利
於出利及合干專庫等人利於糜費遂致頻管就州送
納至貧民下戶有般擔之費往來之勞伺俟陰晴動
輒數日甚者或本州差官下縣專置一局受納切取出
利歸公使庫兼所差官挾勢凌逼縣道違法批券百端
搔擾乞應人戶輸納二稅不拘州縣許從其便或有出
利之數並附赤曆不許擅撥歸公使庫如有違戾嚴正
典刑從之 八月二十三日上諭輔臣曰近日宣州太
平縣布衣史敦仁上書言州縣輸納多增水腳錢等事
宜令戶部看詳此亦民間之害不可不禁止也繼而戶
部看詳欲下轉運司并本州遵依降指揮每石隨苗收

納一百文省不得輒於數外更有增科搔擾若守臣監
司失於覺察委御史臺彈劾仍令憲司取索增添因依
申尚書省取旨施行上曰此蓋州縣官吏並緣為奸不
恤百姓朕今日所以休兵講好者正以為民耳若州縣
不知恤民殊失朕本意二十一年閏四月二十二日
知桂陽監趙不易言湖南人戶納苗徃徃州縣高量斛
面一石正苗有至三石少至一倍故令戶部措置從本
路轉運司造一樣斛斗降下不得擅行置造倍收耗數
從之二十四年二月二十六日右迪功郎守大理評
事鞏衍言奏切見州縣受納米斛必有土居及寄居官
員秀才并上司公人封鈔請求每石坐收錢數百或至

一貫以上一歲之間所得有至千餘緡者受納官為之
減退升合不擇濕惡却於其餘人戶下多增斗面以償
其數往往貧乏下戶困於輸納虧公害私莫此為甚乞
下所屬檢會法令申嚴禁止仍委逐州守臣刊板揭於
受納場廳事之上使朝夕觀之思所以副聖主愛民務
本之意從之 四月十八日大理寺主簿郭淑言伏覩
條令受納物帛之類不許輒有污損比三州縣受納官
不得其人間有徇私之吏凡攬子等費到更不問紕疎
長短一切受之若人戶親納則吹毛求疵稍不及格即
以柿油墨煤連用退印塗漬縱有及格者又復勒倍納
稅錢方與交收其錢量收附曆以塞人言望令有司嚴

行戒飭俾無違戾仍委諸路提刑司常切覺察上察其事重為民害乃詔戶部申嚴行下仰監司覺察按劾如失覺察令御史臺彈奏仍許人戶越訴 二十五年十二月二十四日左奉議郎知太宗正丞王珪言今之急務莫先於富國裕民於庶事為有事之備古者三年耕必餘一年之蓄九年耕必餘三年之蓄雖有饑饉民無菜色今四境無虞干戈不用而小有水旱一方之人多致流離死徙不能自存且以目前利害言之蠹民之財莫甚於輸納二稅之弊大率較之逐年秋租加耗之入或過於正數官收一歲之租而人輸兩倍之賦中下之家卒歲之計僅足以給而輸官之物半已糜費所以催

科常不及分而民間欠負無時可了雖無水旱之變而
逃租棄產漂寓他鄉者往往而是也朝廷雖申嚴約束
而州縣公肆歛取無所畏憚者唯有其說可以籍口矧
又循習之久不以為怪也且如官中既有正耗而州縣
又別立加合以軍儲吏廩為名凡有所須盡出於此點
胥污吏因得為姦取之無藝官收一歲之租人輸兩倍
之賦甚可憫也臣愚以謂葉若度州縣所用有不可闕
者多寡之數立為定例使上下通知此外不得分毫有
所須索必重寘典憲不唯少寬民力亦使官租易辦公
私之利無以踰此行下有司略為措置務見實効無事
虛文詔令戶部檢坐見行條法申嚴行下委監司約束

所部州縣不得過收加耗仍於受納處大書板榜曉諭

二十六年二月十二日權刑部尚書韓仲通看詳到

鬱林州趙不易言便民五事內一事雷化等州民間納

苗多令折銀擾民為害送部看詳欲令並納本色上曰

百姓足君孰與不足百姓之財乃國家_外府安可盡取但

藏之於民緩急亦可以資國用 七月十四日詔人戶

輸納夏秋今正當開場受納擁併之時訪聞州縣受納

官縱令公吏非理追換乞覓邀阻及用油墨退却損汙

或封寄在場更不給還重疊拘催搔擾非一令戶部日

下申嚴約束如有似此違戾去處仰監司按劾_申尚書省

重作施行 八月四日上宣諭輔臣曰訪聞臨安府受

納稅絹多是乞覓阻節近有一百姓送納本戶絹一疋
被退回詢之云官中不經攬納人不肯收接朕令人以
錢五貫五百文買到却是堪好衣絹已令韓仲通根治
近在輦轂尚乃敢爾外方輸納想見受弊沈誥等曰陛
下勤恤民隱灼見弊原如此天下幸甚 二十二日戶
部言臣僚請損四州折估物帛價錢緣財賦係總領所
取撥應副贍軍在遠難以遙度今欲下本所相度量行
裁減具數申戶部以聞從之 二十八日右正言凌哲
言諸路州縣起催秋苗有期自來受納姦弊百出最為
民患受納官物全藉監官約已奉公鈐束吏姦然場務
專斛等每以厚賂預囑監司州郡主行之吏乞差某官

既遂其請酌酒相慶凡監官供家百須皆取辦之上下相蒙恣為姦弊百姓受害無所赴訴乞嚴飭監司郡守應差受納官須躬自體訪選委清強有風力之人使之究心措置約束又攬納之弊自來罪賞約束至為嚴切終不少革者蓋緣遠村細民戶產微薄輸納零細須憑攬人揆數送納因得為弊乞嚴受納官每遇人戶般米入倉並須躬親看驗依公交量其合收耗米並依衆例不得容情增減及停留作弊仍乞委自守貳不時稽察苟有違戾重作施行從之 二十七年六月十五日江南東路轉運判官葉義問言江東西州縣受納人戶苗米水脚等錢每石收二百文省委是酌中宣州頃因知

州秦梓申奏畫旨每石納錢一百文省往往受納之際
賄加斗面或別立名目科歛於民欲望行下宣州每石
納錢二百文省從之九月四日左司諫凌哲言諸路
州軍受納秋苗去年朝廷頒降斛樣本以革斗量輕重
之弊而諸州每月交量令兩夫持杵夾立抄米八斛時
復按搖務令堅實較其多取之數又過倍於用斗之時
人戶反賂倉斗願依舊用斗量至於乞取情弊略不悛
革伏望嚴戒諸路州軍長吏自今受納官上自幕職以
至管下縣鎮有剛介自守曉事戢受之人通行選差使
之遵守前後所降條禁以杜塞關節仍乞委各路提刑
專一體訪如有違戾去處依條按劾必罰無貸從之

受
小吏

卷一萬年五十四

五十四

三十年九月八日上諭輔臣曰夏稅秋苗若郡守不得其人受納官多取贖量則民必歸之攬戶又鄉司部吏因緣生奸一斛至加五斗人戶安得不受弊卿等可於夏夏稅秋苗時令依省限催理仍督責受納官歲歲如此常行戒飭庶令實惠下及百姓宰臣湯思退奏曰臣等當恭奉聖訓十一月三日守侍御史汪澈言江西歲以筠袁二州民戶苗米令赴臨江軍輸納以江道淺狹而裝網非便緣此官吏恣為侵漁色目甚多其數浩瀚知軍坐享公庫之豐而筠袁之民嗟怨盈於道路今欲乞令江西漕司與二州守臣相度或只就本州受納若必欲寄教即令各州自差官吏專斗受納無使臨江之

人干預從之 紹興三十二年孝宗即位未改元八月
二十三日詔州縣受納秋苗官吏並緣多收官耗規畫
圖出溢却將溢數肆為奸欺虛印文錢給與人戶民間
相傳謂之白鈔方時艱虞用度未欲減常賦而未能豈
忍使貪賊之徒為民蠹今後似此違犯之人許諸邑人
不以有無干已越訴如根治得寔命官流竄人吏決配
永不放還仍籍家貲 孝宗乾道元年正月一日南郊
赦應夏秋二稅催科自有省限州縣官吏多不遵奉條
法受納之際多端作弊倍加斗面非理追換縱容專斗
揀子計會乞取方行了納或先期預借重重催理不與
除豁既已納足阻節銷鈔之類甚為民害仰守令嚴切

覺察如有違戾仰監司按劾申奏重行黜責仍許八戶
越訴 三年六年九年南郊赦並同 五年正月二十
八日詔今後受納折帛銀照依左藏庫價與民折納不
得輒有減降令逐路轉運司約束不得違戾 先是遞
年民戶輸銀於官者每兩折直三千二百而輸之左藏
庫却折三千三百每兩賠贏人戶百錢臣僚言之故有
是命 十月十八日臣僚言臣恭親陛下臨御之初約
東州縣受納苗米多收加耗法禁甚嚴而近年以來所
收增多且以近甸論之秀州歲受苗米三十餘萬石每
石舊例止收耗一斗四五升而二年以來一石增納至
五六斗計每歲溢取十五萬碩逮朝廷拋降和糴却以

出剩之數虛作糴到所得價錢盡資妄用乞申戒州縣
杜絕弊俸庶寬民力從之 七年六月二十七日詳定
一司勅令所修立到條法諸受納苗米官容縱公吏巧
作名色乞取者比犯人減一等罪徒二年仍許人戶經
監司越訴州縣長吏不覺察與同罪 以臣僚言人戶
率用其石有餘一千文足以上方能了納正米一石乞
行禁止故有是詔

宋會要 受納

淳熙二年三月八日詔自今倉并諸路州縣等處給納
米料並用省斛交量三年四月六日詔諸路州縣受納
人戶苗米往往過數多收斗面重困民力令諸路監司
覺察以聞六年九月二十七日詔戶部遍牒諸路州軍
仍許人戶越訴九年九月十一年九月並如之八月六
日中書門下省言諸路州郡受納苗米利於出剝不問
屬邑遠近盡令搬米赴州是致下戶往回費用留滯月
日乞令諸漕司行下所屬州縣自今人戶苗米赴州或
縣倉並聽從便輸納如違許被抑人戶越訴從之五
年十二月二十六日詔諸路州縣受納苗米并和糴米

許令民戶自行聚仍不得取優潤米 八年五月二十
八日臣僚言諸路州軍將人戶所納稅絹不得過行揀
擇如有紕疎用藥合退去者不許用印油墨容其變賣
別換好絹輸官各於受納處出榜曉諭從之 六月二
十七日中書門下省言兩浙轉運司體訪得 州受納
大量斛面比元數出剩二萬三千餘斛上曰方禁戢加
耗豈可不治乎守臣李士龍降一官放罷受納官趙汝
楫追兩資勒停 十一年六月一日臣僚言諸州軍受
納夏稅官吏作弊多方邀阻間有將堪好絹帛彊行打
退却置場用低價收買中產下戶既因供輸買納到場
又被抑退官中收買不得元錢愈見困窮上下感迫其

官中既已買下退絹多畸零折納高價不恤民病利其
贏餘乞嚴行禁戢如今後州軍置場低價收買退絹許
令人戶越訴仍令監司御史臺覺察違戾官吏一例科
罪從之 十二年六月一日詔兩淮運司各嚴行約束
所部軍州將每年納民間課子不得多收如敢違戾按
劾以聞 七月二十四日詔徽州將受納人戶絹帛並
依法夏稅重十二兩和買重十一兩餘照淳熙六年七
月二十三日已降指揮施行 以臣僚言徽州自五季
陶雅創為重賦較之旁郡寔殊且以素來拙於機織所
產絹類皆輕紕脆弱國朝勤恤民隱嘗專下詔旨徽州
夏稅和買絹每每及七兩重者即許受納仁恩德澤千

里荷載自乾道間議臣有請謂徽州民盡力蠶桑所織絹帛不異他郡乞令夏稅和買並依見行兩數輸納斯民一時創行機織其力重困旋有徹于聽聞者當時廷臣僉謂宜減兩數以示寬卹陛下出自睿斷且以與其減兩重不若蠲匹數之為悠久不變乃詔夏稅和買每十二匹與減二匹由是實惠及下斯民欣然方蠲減之初臣適試郡事見所受納官奉行之過至有齎二三百匹赴場而所售不及其半者臣遂自每日與州官同共受納雖兩數少及而非紕疎糊藥者隨即受輸給鈔繼又以公劄白之戶部長貳故每歲發綱運並無退剝臣既滿秩慮後政不能循守嘗因奏對具陳底蘊仰蒙

矜從行下本州遵守如有違戾令監司按劾以聞行之
累年千里蒙被大賜臣近得州官書具言本州近降絹
樣下六縣更不分和買夏稅之重輕並欲以十二兩為
則又云去年納官有邀難和買反重於稅絹者民甚苦
之是臣前日之奏陳今而少驗矣且夏稅十二兩和買
上十一兩法也通夫天下一也而乃不分輕重例加抑
配行之賦稅偏重之地民之不聊其生何疑哉欲令本
州受納夏稅和買輕重一依條例仍遵守淳熙六年已
降聖旨毋得違戾庶幾此邦生齒歡戴陛下衣被之恩
永永無窮故有是命 淳熙十六年二月四日登極赦
人戶輸納秋苗其起綱脚耗舊有定數訪聞州縣於正

數之外加量斛面增收點合名色至多重為民害可令
諸路轉運司嚴切禁止如有違戾許人戶越訴仍委諸
司互察同日赦人戶輸納紬絹斛斗之屬既名納官法
不收稅訪聞州縣場務過有邀求紬絹則先收納絹稅
錢斛斗先收力勝錢循習成例重為民害仰轉運司嚴
行禁戢仍許人戶越訴 八月十一日臣僚言今秋成
在即乞令州縣受納不得用私增斛斗郡守不得以歲
年之增數而為實數受納官不得輒帶人從入倉如違
並許人越訴從之 紹熙二年三月二十二日詔潼川
府鄭縣涪城中江安泰監亭五縣支移赴隆慶府三倉
送納米可改理估錢送納每石連耗并頭子勘合錢共

納錢引八道每歲令隆慶府差官一員前去潼川府受
納及令潼川府諸縣須管照省限送納了足如違仰隆
慶府具本司所欠縣分官吏以聞以四川制置使京
鏜總領楊輔言潼川管下郫縣等五邑支移赴隆慶府
送納謂之遠倉米祇充本府廂禁軍鋪兵支用隆慶去
潼川近者二百里遠者五百里皆負擔而去往往稅戶
每石邀價至有錢引十二三道者以致人戶重困乞改
理估錢送納故有是命十一月二十七日南郊赦催
科自有省限州縣往主不遵條法先期預借重疊催納
以致多出文引非理勒令保長代納於受納之
際容令合干等人多端阻節作弊倍加斗面非理退換

泊至納足不即給鈔仰監司嚴加覺察如有違戾按劾
聞奏仍許輸納民戶赴監司陳訴紹熙五年七月七日
登極赦文人戶輸納秋苗其起綱脚耗舊有定數訪聞
州縣於正數之外加量斛面增收點合名色至多重為
民害可令諸路轉運司嚴切禁止如有違戾並許人戶
越訴仍委諸司互察自後即祀明堂赦亦如之九月十
四日明堂赦文已降登極赦人戶輸納紬絹斛斗之屬
既名納官法不收稅訪聞州縣場務遇有邀求紬絹則
先收納絹稅錢斛斗則先收力勝錢循習成例重為民
害仰轉運司嚴行禁戢仍許人戶越訴尚慮州縣奉行
減裂可自赦到日委諸路監司嚴切體訪如有違戾去

處按劾聞奏自後郊祀明堂赦亦如之同日赦催科

自有省限州縣往往不遵條法先期預借重疊催納以致多出文引非理追擾或勒令保長代納於受納之際容令合干等人多端阻節作弊倍加斗面非理退換洎至納足不即給鈔仰監司嚴切覺察如有違戾按劾奏聞仍許輸納民戶赴監司陳訴自後郊祀明堂却亦如之慶元二年九月二日臣僚言乞行下諸路轉運司

每歲夏秋稅苗受納之初將州縣合科雜色麻麥粟豆紬布木炭之類逐季估定時價許民送納不得循襲舊例高價折錢重困百姓從之六年閏二月二十三日臣僚言伏覩慶元令受納二稅官轉運委知通前期於

本州縣官內公共選差訖申本司檢察近因臣僚一時
申請指揮令諸路轉運司選差蓋以近年以來受納官
吏通同作弊慮其州縣差官之不公遂以其權歸之監
司亦革弊之一說也但一路官僚之浩繁監司廉察之
餘固當得其大槩又豈能一一徧識孰若本州知通相
去之近日夕與之款接或得之議論或試之職事其賢
其庸其貪其廉察之熟而知之詳矣轉運既不及徧識
其為人是致差官之際急於充員其貪廉賢庸未免混
淆而所差之官往往憑恃上司之委用或敢妄作州縣
亦以上司之故不欲誰何厚取添給恣行姦欺為害非
細且受納二稅如絹帛之紕疎米麥之濕惡自是州郡

之利害使守貳留意必不肯付之貪庸之人自貽其咎
乞遵守慶元着令仍舊委知通公共選差令轉運檢察
實^為上下之便從之後遇敕申嚴行下又敕文州縣催

科每科申轉運司差官受納運司去州軍隔遠所差未
能一一皆當或其間所差官有憚下倉庫者與合千人
通同計較遇人戶親身自納則多端阻節直候攬子兜
足上戶官物一切辦集旬日之間受納一次催稅保長
枉遭訊責自今仰轉運司委知通前期於本州縣官內
公共選差清廉官躬親受納不得容令遲緩邀阻自後
郊祀明堂敕亦如之嘉泰四年二月十一日臣僚言
二稅有絹名曰上供上而宮庭百官下而庶府諸軍衣

賜皆於是乎取比年以來所輸之絹往往紕薄其弊在於受納官不加之意胥吏與攬子互為弊俾計屬既至其絹雖下與之輸入若計屬不至其絹雖善則多方沮抑民戶既苦其沮抑攬子然後得以制其權攬子以重價取諸民戶而以半賂胥吏胥吏所得既多於民戶之自納則宜乎與攬子相為姦利乞嚴敕州縣受納之官重戢胥吏攬子聽從民戶自輸惟在照應色額忽誤支遣仍於每匹必印受納官名銜及本州印記以為考證俟其上之左帑本部輪委郎官一員前去同提轄從公稽檢如其紕薄復有前弊即具申朝廷將受納官吏重寘於罰如無名銜及印記即從本部將典吏重加斷勒

從之。開禧元年十二月六日臣僚言乞令諸路提舉
司將羨義米別立義倉廩屋在州受納者則州置義倉
在縣受納者則縣置義倉候各處受納了足日具申本
路提舉司須管躬親巡歷檢點在遠則分頭選差清彊
官照數核實樁管每遇州縣官交替則令照元數審實
責認方許受代庶可以為公私經久之利若下戶畸零
須照逐年指揮已蠲放者不得重行催理如攬納人抱
認在已不納者計贓定罪如州縣尚有違戾許人戶越
訴監司奉行不虔委御史臺覺察一例重行鐫點胥吏
決配遠外從之。嘉定二年三月二十八日臣僚言州
縣人戶納苗或就縣倉或往州倉各從其便令與具存

蓋納苗則有義倉有耗利義倉所儲專以待水旱凶荒
耗利則倖廳拘發漕司支遣近年以來不許縣倉受納
必欲盡隸州郡珠不知縣倉不受納則失義倉之利所
謂耗利者當據縣倉所納苗米若干然後取耗利若干
今倖廳不問見納之數但以苗額總數耗利悉取於縣
高價折錢抑勒認納縣道無所從出不免科敷吏輩至
於歲歉蠲租倚閣正米已不存矣而耗利之額催逮如
故緣此財賦不辦愈見軍邑之為難乞戒敕諸郡每歲
苗米從民之便許於縣倉輸納俾存義倉以待賑貸如
耗利米只據所納苗數解發不得額外一毫妄有紐折
或有違戾仰逐路監司究治從之

二年九月二十五

日臣僚言乞戒敦州郡當每歲受納差官必須選擇廉
介之吏為受納官者或以盤量出剝受其饋遺並計賦
論若於正耗米之外過有誅求許民間徑經臺省越訴
其官吏重寘典憲從之 又赦文訪聞諸路州縣人戶
已納稅租其本縣又行出給標子重疊追取人戶為見
錢數不多又復送納其所出標子又須用錢申繳顯屬
騷擾如有似此去處仰逐州守臣常切覺察重作施行
許被擾人戶越訴自後郊祀明堂赦亦如之 又赦文
勘會人戶夏稅和買紬絹內紬合納本色二分析帛錢
八分絹合納本色七分析帛三分訪聞州縣却侵本色
分數多敷折帛價錢又有折納銀兩及將人戶有合納

會子分數抑令並納見錢重困民力委轉運司常切覺
察多切文榜曉示如有違戾即行按劾仍許人戶越訴
自後郊祀明堂赦亦如之

五年閏九月二十二日臣

僚言竊見嘉定之初福州守臣以長溪縣去州絕遠陸
限峻嶺海涉驚濤民戶輸苗跋涉艱阻請以本縣歲管
苗額悉令民戶就縣折納價錢縣以民戶折納之錢解
于州州以縣解之錢糴米補數以供用於公無虧於私
為便害民之吏舞文之胥畫策興利以媚州郡導之於
十一縣人戶解面取贏以補一縣折納之數米不必糴
錢不必出而自足以辦常平之支遣每遇開場交量之
吏倍於斛面增高司納之官多於鈔面加點所謂點者

蓋以點一筆為加一升之數有點及八九筆者州郡利於取贏敢於欺罔侵漁百姓以至於此極乞令本路轉運司嚴行約束照元降指揮盡以縣斛錢糴米補數不得違法高量人戶苗斛及用筆點鈔暗收加外如有違戾許人戶越經臺部詞訴其當職官吏重行責罰從之

二十三日臣僚言竊見州縣受納苗米所用之斛雖係文思院製造發下訪聞輒於斛緣鐵葉之上增加板木復以鐵葉蔽之分毫之間其數遼絕間有州縣續置之斛不依元降則樣所取之數尤為不恕此其弊一也斛面之外又有加耗歲復一歲有增無減其所取加耗自合筭數目並量以斛今令項別用斗量極其盈溢幾

於倍蓰此其弊二也受納之職合選清彊之吏而州郡
類擇刻剝者為之至於先期經營差委者其意安在被
差之後百端苛取以出剝之數先餉州郡然後利其贏
餘公然打印虛欵通同胥吏攬戶規利入已此其弊三
也頭腳錢之外創為名色乞覓錢數加耗之外又以呈
樣修廩等為名掠取未斛置之廳事之前受納既畢輒
與合干人均受賂無愧色此其弊四也州縣催科急如
星火而人戶商米到倉不與交量至於暴露累日非有
關節即行打退往來搬運使之重有銷折此其弊五也
自餘瑣細不容悉數乞備臣此章行下諸路轉運司令
州縣將文思院元降未斛除去鐵葉如州縣續置之斛

州委通判縣委丞簿將文思院斛逐一較量結罪保明
次第供申所取加耗不得過數仍令算計數目並以斛
量不許用斗面脚錢之外不得分文多取如呈樣修廩
等名色一切住罷人戶齎米到倉即時交量不得故為
留滯仍鏤板曉示如有違戾許人戶經轉運司或徑赴
臺部越訴體訪得實將守令及受納官吏一例按劾施
行從之 七年三月二十九日臣僚言竊惟錢出於官
而責之民輸粟帛出於民而官或無取則農之餘粟女
之餘布將何所用平地無銅山私家無錢爐錢又何從
而得哉今民之輸官與其所以自養者悉以錢為重折
帛以錢茶鹽以錢藿豆以錢向時給之錢而和買物帛

者今錢不復給而反責其錢是猶可也酒醋之賣於官者非錢不售百物之征於官者非錢不行坊場河渡之買撲門關務庫之商稅無一不以錢得之所謂穀粟布帛自衣食之外惟一稅本色之輸官者可用耳孝宗皇帝淳熙中念農夫蠶婦終歲勤動價錢不足以償其勞乃詔諸路監司嚴飭所部應民間嘗輸本色者毋以重價強之折錢若有故違按劾以聞且刻石以賜郡守當時斗粟尺絹悉從民輸惠至博也今州郡之中紬絹米麥利其贏餘率多折錢所輸本色槩量已多故折之錢其價愈重粟帛壅滯轉變不行錢無所得民益重困其為蠹害可勝言哉今錢日益少用日益多措辦之艱

人但知為目前之害臣恐州郡轉相倣倣習以為常穀
帛無用人費耕織富者藏鏹而楮券益輕貧者無聊而
盜賊滋熾禍患之起悉由於此豈不大可慮哉願體孝
宗淳熙之詔戒飭州縣凡合納紬絹米麥本色如人戶
願折納價錢者不許過重及不許科抑令戶部行下諸
路監司遍牒州郡常切遵守庶幾資於錢者輕而資於
粟帛者重從之五月二十七日福建轉運司言本路
八州軍府合發上供綱運已遵照省劄指揮自嘉定六
年五月為始用金會起解至今年四月終滿一年今據
興化軍南劍州建寧府申今年五月以後合作如何解
發緣其他州軍與興化軍等州事同一體所有諸州軍

五月以後合發上供錢銀未委合與不合起解全會准復起解銀會中半乞指揮速賜行下以憑遵守施行申聞事詔令福建路監司州縣應干入納官物並遵依錢會中半指揮仍自今年五月為始建限一年將元買銀兩一半見錢兌換旅民官會湊成全會起發即不得占吝見錢在官以充他用或頃改應副豪勢之家務要錢會流通會價不致減落如有違戾定照節次已降指揮施行并劄下戶部照會施行 八年四月十九日臣僚言近來州縣每遇受納和買產絹人戶納到本色百方邀阻例行揀退將合納之絹一例折錢高擡價直以入于官而官司用此價錢又却低立價數科抑行人於民

間收買以充上供其所買既已輕薄致被左藏庫等處
揀退則復以配之於民使換佳者不問是其元納與否
或乃直令貼錢謂之估剝此何理也乞嚴降指揮明加
責勵今後州縣收納產絹和買湏是不成端匹民間情
願折納即許照條從便折錢亦不得高擡價買若是合
納正數並只令納本色如有違戾將不點檢覺察得知
守令及受納官並當重行鐫寘從之 十年十月二十
九日臣僚言竊見朝廷比年留意積貯外臺郡守陳乞
爵牒降充糴本無時無之臣伏思之有一郡之租自足
以供一郡之用其所以康虞不繼者何也折估之令行
而所入不能如其數也向也或行於省限已滿之後今

則起催米一兩月則折之矣向也惟及於第五等戶今則上戶亦折之矣乞下諸路州郡將人戶合納今年糙米白米尺許輸納本色不得折估價錢如支官兵俸其餘春夏間聽依時價出糶接續細民食用收錢以充本郡經費如受納之時其間民戶願納價錢者聽從其便仍不得抑勒及高折價直如有違戾許人戶越訴臺諫監司按劾以聞仍專委轉運司提督覺察從之

二年八月三日都省勅會人戶合納今年苗米留慮州縣有增收多量之弊理合預先禁約詔令戶部日下遍牒諸路州軍各嚴行約束當職官吏將受納苗米不得過數增收及多量斗面如有違戾許人戶越訴

二十

八日臣僚言伏都朝廷申飭諸路漕司戒約州縣受納秋苗增收斛面之弊仰見請朝軫念黎元愛養基本德至渥也命令之頒大率視為故常未見有及於民者且多為名色增衍任情一斛之輸費幾三斛一倍之收加至再倍民則何以堪之折納價錢法之所禁畸零舊欠與夫深山窮谷搬運孔艱則或從權以為民便今所至受納贏餘既多會計支供稍可及數則亟立高價悉使折錢富者其力有餘得以及時輸送本色貧者艱於措畫不無稽緩所納多抑以錢至有窮居遐僻登陟險峻負擔而趨米至城邑而折納之令已行則不免於低價而售其費滋多故貧下之民受弊尤甚乃若一二年來

浙東之郡又有不止於為民之害者開場未幾隨即折
變既高其直以病乎民復以低價入廣收糴給散軍糧
知利其贏而糠粃惡雜一不之問軍士怨忿尤有疾視
之心任牧馭之責者其忍為是哉乞下臣此章嚴賜戒
飭受輸之際或過數增收及高立苗價彊民納錢與夫
貴折賤糴以為軍民之害者許令臺諫彈奏重賜施行
從之 十三年八月四日臣僚言通者朝廷行下凡民
戶合納之絹限以一半本色一半折錢每匹則折以四
貫純會酌量輕重允得其平秤提會子之術且隱然行
於其中是雖權時施宜而公私皆以為便矣訪聞在外
州郡乃有勒令外縣民戶所折之錢併其所輸之絹並

要到州送納往往謂一半所折之錢縣道未必不以侵
支互用於是命民併輸于州以防縣道或然之弊也蓋
所在惟附郭之縣與郡相依故民戶稅賦多有就郡輸
納以其便也至若外縣之抵郡城或百里或二百里又
其甚者或三四百里使其舊例輸送于州民固安之而
不辭苟一旦疆民赴州輸納跋涉閱月寧不失民之便
况尋常薄產之家本戶有合納些少丈尺者若使就州
送納其於合輸之外又有道費之苦或州郡胥吏乘勢
邀阻非泛需索則其不便也滋甚豈不重田里愁嘆之
聲乎乞下州縣只從舊例元在州送納者聽其在州元
在縣送納者仍只在縣不許將舊在縣者創令就州輸

納庶幾不至彊民而官賦亦易以辦若於戶部行下折
納定數之外或有違戾引慝民詞抑又不可不加懲戢
也從之 十四年八月二十九日臣僚言竊見州縣輸
納二稅其患有三而秋苗之弊尤甚焉何謂三患夫米
穀之到倉先須呈樣巡堆而後簸揚入納此久例也近
年以來無問美惡輒留宿倉或半月一月而受輸官不
至吏輩並緣誅求猶為可也在倉既久雀鼠之侵耗斗
脚之竊取風雨之飄浮及至交量移折不少管幹攬納
之人乘此作弊而官民戶皆受實害此苗米宿倉其患
一也官賦已納給印朱鈔付人戶收執設或重催憑此
照銷今乃已納之鈔排積如山監官憚於用印遷延日

月省限既滿勢須點追既無朱鈔可憑雖有欠領何用
幹攬因官鈔之未印多有匿主家稅賦入已辭以取鈔
未得萬一避罪逃亡主家又從而陪納此不即印鈔其
惡二也幸而鈔已給還人戶而在官之鈔復不勾銷刷
欠只據簿書既未批鑿吏輩便可為姦雷倒追呼愚民
何所赴想縱使得直費已不貲此不即銷鈔其患三也
三患不去重疊催科而官復重困之誠為可憫乞下臣
此章戒飭州縣今後受納秋苗在倉或遇一宿已納未
給朱鈔及縣鈔欠不勾銷却致點追納足之戶監官主
簿並行責罰從之 九月十日明堂赦文州縣役錢逐
年均數皆有定數訪聞諸路提舉常平司却以餘剩為

名抑令縣道添認作餘剩錢解發公庫以資妄用縣道無所從出不免科配於民委是違法合行禁約如有違戾許監司互察仍令人戶越訴十一月十六日臣僚言夏帛秋苗所在起催各有有限至於免收本色而使之折錢乃是大數已敷而尺寸升合之微細民無所從出附匹零粒懶於春負量立時價容其所折納今乃不然曾未開場官吏容心如綿絹則指準某家麤惡之物以充解發支請而合納者即預期折錢如米麥則指準各倉多取之斗面以足歲計正數而合納者亦預期折錢且有力之家各納本色而無窮之戶率被此苦戶有大小稅有定數據數以輸歸安田里然納足之後~~有~~有

剗催有刷欠有推收其姦百出使難稽考其剗催者官
物已納不即與鈔則設以無鈔追繫舊例未暇給鈔尚
有倉庫交收由子用木記為照今不復用但出元批收
筆跡亦不行使曰刷欠者已納數月之後復出文引開
某戶欠帛幾尺幾寸欠米幾升幾合遍令鄉村脫有齋
鈔以出則送案點算或數日不呈而鄉民聯夕被監計
其費用已倍於虛刷之數曰推收者甲既出產乙已得
之乙既明收割稅歸己而官復征于甲豈其對理則謬
言稅籍未銷籍廳未關凡此橫取不歸公上悉為貪黷
之吏所有如前數弊盛行於江之東西湖南亦然他處
雖未必盡然亦可以槩見矣乞將及今秋苗受納之初

下臣此章委諸路漕於所部州郡巡歷受詞追究不許
復送本州俟根究得實具名奏劾重作施行庶幾州縣
宿弊可以深懲痛責從之

宋會要

賑貸

太祖建隆元年正月命使往諸州賑貸二年三月以金
商延州嵐食田苗民饑遣使賑之十一月詔以濠楚民
乏食令長史開倉賑貸三年正月以揚舒滁和廬壽光
黃濠泗楚海通泰等十四州民乏食令逐路長史開倉
賑給之三月賜沂州民種糧六月詔宿州發廩賑饑民
十二月蒲晉磁隰相衛六州饑詔所在發廩賑之四年
二月命使臣往澶滑魏衛晉絳蒲孟等州發廩賑饑民
乾德二年二月陝州言民饑遣給事中劉載往賑之
四月詔延州貸粟五千石濟麟州饑民又靈武言饑埽
者甚衆命以涇州官廩穀三萬石賑之四年三月淮南

諸郎言江南饑民數千人來歸詔所在長史發廩賑之
六年正月詔陝州集津鎮絳州垣曲縣懷州武陟縣民
饑發廩以賑之開寶四年二月詔諸道賑貸借人戶
義倉斛斗是月平劉鋹詔廣南管内州縣應鄉村不接
濟人戶闕少糧食者委本州官吏取逐縣委實戶數於
省倉內量行賑貸候豐稔日令只納元數六年二月曹
州言民饑詔運太倉米二萬石往賑之七年正月詔通
事舍人杜繼儒赴楊楚等州開倉賑貸六月詔河中府
發廩粟三萬石賑饑民太宗太平興國二年四月詔
延州以倉粟二萬斛貸與貧民歲饑乏食故也六月知
秦州張炳言部民艱食臣已矯詔開倉救急願以抵罪

詔釋之八年三月同州言歲饑發倉粟四萬石賑之
雍熙二年四月以江南數州去秋微旱民頗艱食遣監
察御史安國祥太常丞馮拯榮見素左贊善大夫馬得
一王茂之張茂才樊素著作佐郎宋錫張維嵩張濤分
往虔吉洪撫饒信等州與長史度人戶闕食者賑貸仍
將廩穀減價出糴并訪察州縣官吏為政善惡民間利
病以聞三年八月劍州言穀貴詔遣使以官粟賑饑民
仍分命使者督補盜賊五年正月成都府言部內比歲
不稔穀價翔貴請發公廩賑糴以濟貧民從之 端拱
二年八月乾寧軍言民饑詔以官粟二萬石賑之 淳
化元年二月九日京東轉運使何士宗言登州歲饑文

登牟平兩縣民四百一十九人餓死詔遣使發倉粟賑貸死者官為藏瘞以錢五百千分給之其逐州官吏不早具奏仍劾罪以聞二十六日河北轉運使樊知古言深冀州民饑詔遣殿直成庭玉馳傳發倉粟貸之人五斗是月登州再言文登縣民二千六百六十二人饑死詔悉令賑卹七月河南府言洛陽等八縣民饑詔發倉粟賑之人五斗又以京師未貴遣使臣開倉減價分糶以賑饑民二年正月詔永興鳳翔同華陝等州歲旱民多流亡宜令長史設法招携有復業者以官倉粟貸之人五斗仍給復二年四月詔嶺南管内諸州官倉粟先是每歲糶之斗為錢四五無所直自今勿復糶以防水

旱饑饉賑貸與民三年二月汝州言歲饑詔以官倉米貸之人三斗四年二月懷州言去年穀不登民無蓄積以食牛牛多死詔本州官草留三年準備外余悉貸之十二月詔民被水潦之患饑饉者衆令開倉減價糴貧窮乞丐者為淖糜以賜之五年正月十六日命直史館陳堯叟趙况曾會王綸等并內臣四人往宋毫陳穎等州出粟以貸饑民并州五千石及萬石仍更不理納二十一日詔諸道州府被水潦處富民能出粟以貸饑民者以名聞當酬以爵秩至道元年二月六日遣將作監丞榮宗範馳往漳泉州興化軍賑貸貧民以去年旱艱食故也十七日亳州房州光化軍言歲饑民乏食詔

遣使者分往發倉粟貸之人五斗三月詔以官倉豆數
十萬石貸京畿及內郡民為種有司言請量留以供國
馬帝曰甘雨沾洽土膏初起民無種不能盡地利但竭
廩以給之至秋有百倍之獲國馬食以芻藁可矣真
宗咸平元年九月詔兩浙路留諸州運米以濟饑民十
月詔兩浙轉運使察管內七州乏食處賑貸訖以聞二
年正月江南兩浙制置鹽茶王子與言兩浙諸州經旱
民戶未至饑殍賑貸斛斗亦皆有備帝覽奏因詔羣縣
長吏常切體量如稍有饑民晝時支與口食無令失所
三月遣度支郎中裴莊內殿崇班閤門祇候史睿祕書
丞李防供奉官閤門祇候杜睿分往河南兩浙諸州發

倉廩賑貸饑民閏三月筠州請發廩賑貸

錢之

四月兩

浙轉運司言先撥常潤州廩米五萬石賑貧民尚未足
請更給五萬石從之七月度支判官陳堯叟廣南使還
言西路諸州旱命國子博士彭文寶往權轉運司事賑
饑民十月以兩浙荆湖旱命庫部員外郎成肅比部員
外郎劉照太常博士李通微閤門祇候李成象往體量
賑恤十一月兩浙轉運司請出常潤州廩米十萬石賑
糴從之四年閏十二月命左司諫知制誥梁顥供備庫
副使潘惟吉往河北東路禮部郎中知制誥薛映西京
左藏庫使李漢贇往河北路發倉廩賑饑民帝召宰臣
以河北諸州物價示之其中陳豆紅粟斗不下百錢又

出麻滓蓬實曰民已食此矣速當拯濟故命顥等焉五年二月遣中使詣雄霸瀛莫深滄州乾德軍為粥以賑饑民六年二月遣朝臣使臣分往京東西淮南水災州軍賑卹貧民踈理刑獄景德元年二月陳蔡沂密等州言民饑命太常丞梁衆祕書丞李適乘傳發粟以賑之九月鄂州言民饑詔開倉減價出糶以救之二年正月六日詔河北轉運司副使分詣管内諸州軍按視饑民賑給之口一斛戶五斛為限帝以戎寇之後居民失業慮其饑饉流離故有是命八日令蘄黃州賑恤饑民十七日令淮南諸州以上供軍儲賑饑民二十六日命常參官二人分往荊湖北路淮南諸州出官粟作糜粥

以養饑民仍令擇幕職使臣強幹者專司其事長吏常
按視之每十日具所賦糜粥之數以聞自是全活者甚
衆二十九日河北轉運司盧瑛言天雄軍見管米鈔萬
九千五百餘斤澶州肆萬二千二百餘斤詔給兩處饑
民二月二日京西轉運司言襄許陳蔡等州民饑請減
價糴倉粟賑救從之十日命太常丞艾仲孺乘傳詣澶
州以陳粟四萬石分賑饑民三月大名府饑命轉運司
發廩賑救四月八日命鄂州發惠民倉粟賑饑民十六
日以京師穀貴出倉粟減價出糴以惠貧民二十八日
潭州言茶園乏食請賑以官米從之十一月詔於京城
出倉粟減價出糴以汴流阻淺運舟不至穀價騰貴故

也三年正月六日遣著作佐郎劉昱往開封府諸縣與令佐等於近便出廩米賑救災傷之民家給兩碩仍貸與種糧十四日又遣太常博士王汝勵殿中丞李道太子中允嚴登耿說著作佐郎張士遜陳從易等馳傳分往尉氏陳留襄邑雍邱太康咸平等縣發廩賑貧民及貸種糧十七日令京西轉運司出倉粟米賦貧民仍命著作佐郎周儀馳傳詣汝州賑貸十八日詔京西轉運司體量轄下州軍民有不能自結者時分遣職官徑往逐處出廩粟賑貸二十五日遣殿中丞王穆太子中允朱友直太子洗馬盧昭華分往封邱酸枣長垣等縣發廩貸貧民仍給種糧二十六日詔京東轉運司應齊淄

青維登萊等州人戶有關食者依近降救命於封樁倉
分支遣賑貸不得差民轉般如近西州軍即委三司自
京津置往彼支遣屯田郎中楊韋馳往河北與轉運使
體量澶濱缺德博等州民如有關食處即出廩粟賑貸
三月詔開封府京東西淮南河北州軍縣人戶關食處
已行賑貸其客戶宜令依主戶例量口數賑貸孤老及
病疾不能自存者本府及諸路轉運使副并差去臣僚
同共體量出省倉米救濟仍便告示更不收理四月侍
御史知雜王濟言伏覩國初嘗置義倉以備賑濟今義
倉已廢每州郡小有水旱朝廷即詔出太倉粟借貸農
民及稔歲復多蠲放慮有損軍食今後如有賑貸望本

縣置簿以時理納庶獲兼濟從之四年六月詔河北轉
運司如聞雄州安肅廣信軍人頗艱食宜以食米萬斛
減價出糶以濟之 大中祥符元年正月陝西轉運黃
觀言慶州麥粟踴賣詔出官米萬斛減價糶之四月府
州言民饑命賑之六月環慶民饑發廩粟賤糶以濟之
二年二月詔賑同華等州民去歲逋稅悉蠲之四月詔
陝西州軍民闕糧糶者發廩賑之五月詔西京出廩粟
賤糶以惠貧民六月五日令韶州出廩粟賑糶以濟貧
民十二日令慈州出廩粟賑部民十一月知鄧州右司
諫直史館張知白言陝西流民相續入境有欲還本貫
而無路糧者臣諭勸豪民出粟數千斛計口給半月之

糧凡就路者總二千三百家萬二百餘口其支貸有餘者悉給貧老之人仍葬其死人詔獎之三年三月詔戎●瀘州民艱食者賑之仍給復一年八月詔淮南諸州發粟米賑貸及賤糶以濟貧民四年四月四日以登萊州艱食令江淮轉運司顧客船轉粟賑之十六日同華州饑民有鬻子者遣太常博士舒賁馳驛存撫賑濟之五月京兆府旱詔賑之六月劔利閬集壁巴等州饑詔賑之十二月十一日江淮發運使卽曄言淮南路准詔賑貸及減價出糶計廩米三十萬石十六日京城穀貴詔發惠民倉粟賤糶以濟之五年正月詔河陽出廩米萬斛減直給糶以惠貧民二月詔京西諸州軍昨以穀

貴雖已減價出糶尚慮民有闕食者宜令轉運司諭轄
下州軍委實有饑民之處多方勸誘蓄積之家除留支
用外將餘剩斛斛分散救濟仍差公幹官量口數監散
內有願減半價出糶者亦聽並將等第酬獎無令減克
邀難及接便煩擾五月詔江淮南發運司留上供米二
百萬斛以備賑糶十月十日詔如開建安軍等處自秋
霖雨頗農事宜委轉運發運使體量賑卹十二月六日
令三司出炭四十萬秤減市價之半以濟貧民時連日
大雪苦寒京城鬻炭者每秤錢二百故有是命仍遣使
臣十六人分置場以內供奉官二人提總之自是小民
奔湊至有踐死者乃命都巡檢張旻遣軍校領徒巡護

賜死者家緡錢無親族者官為埋瘞仍令三司常貯炭
五七十萬秤如常平倉之制遇價貴則賤出之二十二
日泗州饑官給米十萬石以賑之六年四月十九日詔
如聞淮南諸州罷糜粥之賜尚慮貧民未濟可令依舊
俟其足食乃止七月二月泰州淮陽軍言民饑詔發官
粟賑之三月儀州言民饑詔發官粟賑之十月淮南饑
詔本路轉運發運使發廩賑卹八年二月令淮南路發
廩粟為糜粥以濟饑民八月詔京兆府河中府陝同華
虢州以麥種借之貧民九年二月十六日詔陝西州軍
減價糴粟以賑貧乏令本路都轉運使李迪提舉二十
二日上封者言延州蕃部闕食正當農時望發鄴州廩

米貸借從之六月令廣州出廩米萬石還官出糶以濟
居民穀貴故也八月令江淮發運司歲留上供斛斛五
十萬石以備賑濟九月詔如聞廣南東西路物價稍貴
宜令轉運司提點刑獄官分路撫卹發官廩減價賑糶
十二月詔江南淮南諸州軍穀價稍貴人民闕食其無
常平倉處令本路轉運司以省倉斛斗除留準備外接
續出糶即不得糶與興販及形勢之家違者重寘之法
天禧元年三月八日衛州民飢命發倉廩粟萬石貸
之十八日兩浙提點刑獄鍾離瑾言衛潤二州闕食官
設糜粥民競赴之有妨農事請下轉運司量賑米二萬
石家不得過一斗從之二十五日詔諸州官吏如能勸

誘蓄積之民以廩粟賑卹饑乏許書歷為課四月四日
詔河北大名府磁相澶州通利軍兩浙越睦處州去秋
災傷民多闕食令轉運司運米賑濟之十一日以趙州
民饑出廩粟萬石賑之二十八日江淮兩浙制置發運
使李漕言江淮去歲乏食有富民出私廩十六萬石糶
施饑民五月二十四日殿中侍御史張鄭言奉詔京東
安撫民有儲蓄糧斛者欲勸誘舉放以濟貧民俟秋成
依鄉例償之如有欠負官為理償從之八月六日知并
州周起言河北民逐熟至州境者州民施飯一月詔獎
起仍令召出米人宴犒之起又請發廩粟萬石減價出
糶以濟饑民從之二十五日詔河北州軍今年夏麥不

豐民乏種糧者官貸之九月十五日詔京東西陝西河北災傷州軍民闕麥種者發官廩貸之十六日詔河東流民有復業者發廩粟賑之十二月遣使臣置場減價鬻官炭十萬秤以寒故也二年正月八日詔江淮運米十萬斛付京東及令河北轉運使出廩賑糶以兩路粟貴故也二十二日青州請以官廩粟豆二千斛設粥米萬斛減價出糶以惠貧民從之二十五日詔諸路災傷州軍并設粥賑糶以惠貧民二月京西轉運司言管內貧民甚多無以賑濟望發絳州粟十萬斛赴白波出糶從之三月知統州查道言春雨滋洽麥苗尤甚民間多乏種糧州倉麥除留贍用外餘四千石望以賑貸從之

十月同耀州飢民多流亡詔轉運司賑之四年正月令
利州路轉運司賑貸貧民以旱故也二月一日以淮南
江浙穀貴民飢命都官員外郎韓億閤門祗候王君訥
乘傳安撫發常平倉粟減直出糶以賑之民有以糧儲
濟衆者第加恩獎其乏食持仗盜糧者並戍等論罪是
月詔曹濮鄆單徐州淮陽軍賑貸民以河決為害故也
三月一日令淄州以粟貸州民飼牛七日令府州賑貸
藩部以去歲旱故也五月令永興鳳翔減價糶糧以濟
階成秦鳳州流民六月太常少卿直史館陳靖言朝廷
每遇水旱不稔之歲望遣使安撫設法招誘富民納粟
以助賑貸從之 乾熙元年二月八日蘇湖秀州雨壞

民田穀貴民飢命出倉粟賑貸之十一日徐州民飢詔
發廩粟賑貸 仁宗天聖三年三月京西轉運使張意
言襄穎許汝等州經水損惡斛斗八萬餘石不堪支遣
請分給闕食之民從之四年十二月詔諸處州軍經春
有斛斗價高處慮人戶失所宜令京東京西河北淮南
轉運司選官將本處常平倉斛斗減價出糶或無常平
倉處即以省倉斛斗除留準備外出糶以濟貧民六年
三月成德軍言元氏縣民飢請支借斛斗從之五月河
北路體量安撫王公言保州永定軍百姓艱食已令逐
處發倉廩各萬石減價出糶自邢趙真定府等處各令
支借種糧與歸業人戶并與倚閣今年夏秋稅賦及令

逐處倍加安卹從之七年五月六日中書門下言戶房
聞災傷路分募人工役多不預先將合用人数告示以
致飢民聚集却無合興工役並依所下司農寺令逐路
有合興工役並依所計工數曉示逐旅入役免致飢民
過有聚集以致失所九年二月五日河北西路提刑司
言邢懷州連年災傷若令應副十分春夫必難勝任欲
乞特賜免放一半從之十月十二日中書門下言廣東
經畧轉運使等言潮州海陽潮漲推流屋舍田苗死失
人口乞令本路提刑司躬親前去依條存恤從之治
平四年神宗即位未改元六月十八日詔在京永泰景
陽通天安廟四門此月十七日給河北流民米止六月

終仍曉諭以河北近得雨令歸本貫其不願歸勿彊之
仍曉令河北轉運司應災傷州軍縣分依此曉告倍加
安存臣僚上言河北訛傳京師散流民未恐未流移者
因茲誘引皆未入京故約束之

神宗熙寧元年七月

詔恩冀州河決水災令省倉賜粟

詳見恤災門二年四月降空名祠

部五百道付兩浙轉運司令分賜本路曾經水災及民
田薄收州軍相度災傷輕重均其多寡召人納米或錢
以備賑濟七月十八日詔水災州軍令本路轉運判官
提點刑獄分往被災處照恤貧民闕食者支廣惠倉斛
斗賑濟如不足量支省倉物仍於人戶便近處減常平
物價就糴若貧人無錢相度賒糴令至秋送納其非稅

戶即與遠立日限納價錢並委就近施行訖奏三年五
月八日詔雄州以兩屬人戶如遇災傷即特貸糧接續
俵散分作料次送納六月詔在京諸倉米斛之數已豐
訪聞日近民間粳米價直稍貴所有淮南上供新米仰
酌中估定錢數遣官分詣市置場出糶以平物價四年
二月十三日詔河北轉運提刑司體量具冀徽邊少兩
雪州軍乏食飢歉人戶多方賑貸存恤其見欠殘零稅
賦並權與倚閣三月十六日詔_{詳見樞密門}永興軍郭達如本路
州軍有飢荒處並以官廩賑濟_{詳見樞密門}詔緣邊熟戶及
弓箭手見欠貸糧未經除放其見今闕食者安撫司更
量與賑貸六年六月七日中書門下言檢正刑房公事

沈括狀乞今後災傷年分如大段飢歉更合賑救者並
須預具合修農田水利二役人夫數目及召募每夫工
直申奏當議特賜常平倉斛錢召募闕食人戶從下項
約束興修如是災傷本處不依勅條賑濟並委司農寺
點檢察舉從之八年十二月二日詔河東歲歉移屯戍
兵馬五千歸營以其餘糧賑濟飢民仍具次第以聞九
年十二月十三日詔准西東西兩浙路應勸誘人戶所
出賑濟斛斗免欠未納數目特與免放其熙寧八年已
後勸諭已納斛斗人戶候向去合行勸誘即擬數却與
免放十年二月二十五日詔應經賊殺戮之家餘存人
口委是孤貧不能自活者所在州軍勘會詣寔待日給

口食米十五歲已上一升已下一升五歲已下半升至
二十歲止仍令相度每五日一支元豐元年正月十二
日賜廣濟河輦運司上供米一萬石付徐州淮陽軍糴
與水災飢民閏正月十三日詔河北路以常平米賑濟
飢民三十日詔河北被水戶如過河逐熟即於白馬縣
河橋差官賑之四月七日詔以瀛州陳次未依災傷及
七分例貸第四等以下戶不得抑配免出息八月二十
八日詔濱~~海~~滄三州第四等以下被水災民令十戶以
上立保貸請常平糧四口以上戶借一石五斗五口以
上戶借兩口免出息物稅百錢以下權免一季二十九
日詔青濟淄三州被水流民所在州縣募壯興役其

老幼疾病無依者自十一月朔依乞丐人例給口食候
歸本土及能自營或漸至春暖停給二年正月二十三
日上批聞階成州去秋災傷艱食之民流者未止官司
初不經畫賑濟可下司農并本路提舉司疾速施行二
月十二日詔聞齊充鄆州穀價貴甚斛直幾二百難食
流轉之民頗多司農寺其諭州縣以所積常平倉穀通
比元入斛價不及十錢即分場廣糶濱滄州亦然同
日三司言濟淄等州穀貴春夏之交慮更艱食請輟廣
濟河所漕穀二十萬石減價糶從之二十六日知滄州
張問言民飢至相食今州倉大豆四萬九千餘石可支
五年漸有陳腐乞留二年外斥其餘以賜飢民可活良

民三萬口上批可下提舉常平事李孝純速相度施行
四月十二日詔河北東路提舉常平倉司所散瀕海滄
州飢民食至五月止三年七月十三日入內東頭供奉
官瀘州勾當公事韓永式言利州路雨水溪江泛漲漂
流民田物價增長民未安居乞下本路轉運并提舉司
賑濟詔提舉司依條施行九月初二日權知都水監丞
公事蘇液言河北京東兩路緣可災被患人戶蒙朝廷
賑濟放稅乞以其事付史館從之詳見恤災門四年二月二十九日
詔開階成鳳岷州人戶闕食流移令逐路第四等以下
人戶支借常平糧斛每戶不得過兩口仍免出息五年
六月十一日詔宜州主管谿洞安化三州連歲荐飢已

差官廣為賑濟朝廷之意非欲取其利但欲各免飢殍
侵略之災六年六月二十七日詔甚災傷處第四等以
下戶闕乏糧種雖非給散月許結保借請雖有欠闕亦
聽給限一月免納息七年四月二十五日河東路提舉
常平司言去年災傷民戶闕食義倉穀不多乞於常平
封樁糧支三五萬石賑濟從之六月一日詔五路提舉
保甲司已撥常平糧準備賑濟令相度保甲戶遇災傷
不及五分當如何等第賑濟條具以聞後提舉河東路
保甲王崇拯言賑濟災傷保丁四等以下本戶災傷及
五分以上即依常平司七分以上法從之河北陝西開
封府界準此七月九日詔尚書戶部員外郎張詢幹當

御藥院劉惟簡賑濟西京大名府被水災軍民二十一

詳見恤災門

日詔河北河東路被水保甲令州縣考實賑濟小保長

保丁一石大保長二石都副保正三石提舉保甲官分

詣諸縣照管具賑濟人數以聞八月十四日詔洺州水

災許借鄰近州縣常平倉米麥小豆共五萬石 哲宗

元祐元年二月一日詔大名府自經水災民田尚多淹

浸人戶艱食向雖賑濟尚慮官吏徇文使被災之民未

蒙恩澤宜委大名府路安撫使韓絳詢訪賑濟四日詔

淮南東西路提舉常平司體量飢歉以義倉及常平斛

斗依條賑濟訖開奏三月二十六日詔府界并諸路提

點刑獄司體訪州縣災傷即不限放稅分数及有無被

訴以義倉及常平米斛連行賑濟無致流移同日夔州
路提舉常平官傅傳正言州軍去年災傷放稅分数不
多亦有全不申訴者臣見民間困急不敢坐視已依災
傷及七分以上賑濟所有專輒之罪謹自劾以聞詔特
放罪仍候到闕日優與差遣四月初二日左司諫王巖
叟言訪聞淮南旱甚物價踴貴本路監司殊不留意詔
發運司截留上供米一十萬石比市價量減出糴與闕
食人戶每戶不得過三石其糴到錢起發上京四日詔
開封府諸路災傷逐縣令佐專切體量人戶委有闕食
速具事實申州及監司仍許一面將本縣義倉常平穀
斛賑貸擬等第逐戶計口給厯大者日二升小者日一

升各從民便五日或一日至半日齋歷詣縣請印給遣
若本縣米穀數少先從下戶給有餘則并及上戶候夏
秋成熟日據所貸過數隨稅納闕食之民貧乏不能自
存或老幼疾病不任力役者依乞丐法給米豆其賑濟
糴穀並據鄉村闕食應糴之數給歷許五日或十日一
糴無令抑遏此外若令佐別有良法使民不乏食而免
流移者申州及監司相度施行半月一具賑濟次第聞
奏仍體量令佐有能用心存恤闕食人戶雖係災傷並
不流移者保明聞奏當議優與酬獎其全不用心賑濟
致戶口多有流移者取勘聞奏特行停替從三省請也
同日詔江淮發運司體量災傷州縣闕食處仍令宿毫

州分析不申奏災傷次第及其見令斛斛價例各疾置
以聞時宿毫災傷尤甚監司並無奏報右諫議大夫孫
覺言淮浙災傷未穀踴貴慮盜賊因緣而起乞差官體
量廣行賑濟遍下諸路轉運提刑司災傷各以實言不
實者坐之災傷雖小而言涉過當者不問如此則諸路
不敢不言朝廷隨災傷之大小賑濟而防虞之則四海
之內無倉卒之憂矣二十六日殿中侍御史林旦言都
城比來米麥價長若翔踴不已恐細民蒙害望下戶部
依條通計米麥元價令司農寺止以逐倉官吏每月更
代管勾置四場出糶以濟闕乏從之仍戶部差官置場
五月十六日尚書省言元豐六年江淮等路發運司奏

允置在京封樁闕額禁軍糧米五十萬石價錢限半年
上京送納今淮南災傷賑濟慮有闕乏詔令淮南轉運
司相度本路如闕斛斛仰依元豐六年例六月二十六
日詔河北路監司分詣諸州以義倉常平穀賑濟被水
闕食人戶十一月二十八日權發遣淮南路轉運副使
趙偁言楚海等州水災最甚乞發運司於常潤州收糴
稻種十萬石以備楚海等州來春布種以糴以貸從之
同日戶部言左司諫王巖叟言賑濟人戶必待災傷放
稅七分以上方許貸借而第四等以下方免出息殊非
朝廷本意乞如舊法不限災傷分数並容借貸不均等
第均令免息看詳元豐令限定災傷放稅分数支給種

子條合依舊外應州縣災傷人戶闕乏種食許結保借
貸常平穀從之十二月十八日侍御史王巖叟言伏觀
十一月二十九日勅戶部看詳元豐令限定災傷放歲
分数支借種子條合依舊存留外緣臣元奏本以賑濟
舊法災傷無分数之限人戶無等第之差皆得借貸均
令免息新條必待災傷放稅七分以上而第四等以下
方許借貸免息殊非朝廷本意故乞均令借貸以濟其
艱今戶部復將支借種子條依舊存留切以災傷人戶
既闕糧食則種子亦闕豈可種子獨立限隔臣欲乞通
為一法於所修糧食字下添入并種子三字庶使被災
之民廣霑惠澤從之二年二月四日詔左司諫朱光庭

乘傳詣河北路與監司一負徧視災荒賑濟有未盡事
並得從宜事體稍重即奏稟官吏奉法不度即按劾以
聞是歲十一月二十六日監察御史趙挺之方蒙言去
年北邊州郡被水災先庭奉使體訪賑濟不問民戶三
等一槩支貸蓋一出使而河北措置之財遂空乞行黜
降以允輿論詔先庭具析以聞十一月六日詔運淮南
二浙穀四十萬斛賑濟京東路三年正月十二日詔發
京西南路關額禁軍糧穀五十餘萬斛減市價出糶至
夏麥熟日止雪寒物價翔踴也二月六日詔以常平
錢穀給在京乞丐人至季春止同日詔開封府界自冬
至春陰雪民間有願借糧種者令提刑司量度戶第等

第給貸訖具數以聞二十八日詔陝西路轉運判官孫
路賑濟鎮戎軍被傷及劫虜民戶十二月十六日知永
興軍韓縝言本路比歲災傷闕食請於法所給米豆更
不限數從之五年二月七日詔災傷處令佐賑救人戶
不致流移所推酬獎災傷五分已上與第五等七分已
上與第四等以戶部言於熙寧勅係第五等於元祐勅
係第四等分數未盡立法之意故也六年七月二十二
日侍御史賈易言浙西災荒朝廷選差轉運使岑象求
判官楊瓌寶賜米百萬斛錢二十餘萬緡俾之拯救州
縣自亦依條賑濟欲乞明詔本路具災荒分數賑貸次
第以聞八月二十八日監察御史虞策言兩浙災傷州

縣糶米多為販夫與公吏相結冒糶次及彊壯之人其
飢羸者轉受困餓或被蹂躪死傷乞下本路監司覺察
轉運提刑司提舉分布諸處賑糶務要實惠飢民內興
販及彊壯者不得一例糶散如官吏措置乖方及公人
用情並令依法八年四月十一月兩浙路轉運提刑司
申檢會浙西州縣累經傷蒙朝廷相繼發米赴本路
賑濟除接續賑糶過外其逐州有見管淮南江西等路
發到賑糶不盡米四十餘萬石別無支用欲趁此蠶月
鄉民闕食之際各許令人戶赴官請借每一斗候至向
去秋成納新米八升還官仍限四年均隨本戶苗稅帶
納詔其未許充軍糧外餘數仰置場減價出糶十二

月十四日。以京師流民。詔特出錢米各十萬。付開封府。許口支給。紹聖元年二月十四日。三省言北京澶滑州民被災最重。艱食者多。及軍食闕。未見監司奏請。詔呂希純并亮采。因按閱河北所至。體訪所當施行疾速。具奏。三月二十二日。三省言。準詔賑恤流民。令還本業。昨已降旨。揮應流民支與口食。遣還本土。所在官司。開官屋。權令宿止。疾病者醫治。仍不限戶口米豆石斗。賑濟。令戶部旨。揮災傷路分監司。嚴加督責。州縣推行務要民受實惠。如更合有行賑恤事。令速施行。上曰。聞京東河北之民乏食。流移未歸本土。宜加意安恤。給糧種。差官就諭使還。農桑業。范純仁等對曰。今已給常平。

又許旨所養牛質取官緡錢免租稅貸與穀麥種矣上
曰更思其未至者行之九月六日詔遣監察御史劉拯
乘傳按河北東西路水災州軍賑濟闕食人戶應合行
事令條具以聞二十九日詔府界京東京西河北路應
流民所遇州縣令當職官存恤誘諭遣還本土內隨行
別無資蓄者仍計口給厯經州縣排日給食至本處如
合賑濟依災傷放稅五分法內老幼疾病未能自還及
不願還者計口給十月十七日詔京西南北路提舉司
官躬按州縣督視賑濟無令流殍旬具所存活數申尚
書省二十一日詔河北東西路被災經放稅戶雖不及
五分所欠借貸錢斛并抵當牛錢等倚閭候豐熟日分

十料輸其非被災放稅戶所欠錢斛視此仍除給保均
陪之令流民在他路者官吏以至意諭曉使歸業結券
使所過續食不願者所在廩給之二十三日詔滑州委
官於浮橋北岸諭南來流民以朝廷寬逋移粟賑卹曲
折使歸業同日詔近者大河東提防未及增繕以故瀕
河被害者衆南來者多留京師流離暴露隆冬日迫陷
於死亡坐視不恤其謂朝廷何既詔有司悉意賑贍其
令開封府即京城門外行視寺院官舍以居之至春諭
使復業二十五日詔河北路監司令州縣官諭富民有
積粟者毋閉糴官為酌立中價毋得過犯者坐之同日
詔賑濟司河北重兵所宿費不貲其審閱老弱疲癯不

能自存者厚廩食之母專以多散蓄積為功而實惠不
及於民乃遣使本意仍具措畫方畧申尚書省二十六
日詔給空名假承務郎勅十太廟齋郎補牒十州助教
不理選限勅三十度牒五百付河北東西路提舉司召
人入錢粟賑濟二十八日宰臣章惇言軍食不可闕請
通約他司米豆足支一年悉斥其餘以廩飢民即米豆
闕散常平錢之在官者民得錢亦可以市糟醪糠粃上
惻然曰飢火所迫麻糍亦以為食何暇擇其為朕亟行
散錢之令十一月十九日詔何北路州縣當職官賑濟
有方能撫存飢民才能顯著者具事狀以聞府界京東
京西等路有河北流民所聚州縣仰逐路監司准此二

十一日詔河北路災傷州軍賑濟並四月終住給口食
外有非老幼疾病之人候至三月終併支與四月分合
給糧食發遣歸業二十三日權發遣河北路轉運副使
張景先言恩華瀛莫雄州順安廣信軍約定合行糴貸
糧斛共五十三萬石緣本路斛斗不多慮有關乏詔逐
州除準備軍糧及賑濟外方許出糴仍不得一例借貸
十二月六日詔京東西河東路提舉司將放稅不及五
分者審驗得災傷稍重闕食不能自存或老幼疾病之
人並權依五分法賑濟二年二月十一日詔河北京東
路賑濟災傷各令轉運提刑提舉司依先分定州縣巡
歷如官吏奉行不盡或措置乖方以名聞仍令逐路安

撫司常切覺察十四日詔內藏庫支錢十萬貫絹十萬
疋分賜河北東西兩路提舉司準備賑濟從御史董敦
逸請也四年九月一日左司諫郭知章言兩浙歲旱淮
南又不常全稔乞下本路監司按視早備賑貸詔兩浙
路轉運常平司應荒政並舉行及預那移粟粟元符
三年三月二十六日徽宗已即位未改元戶部言河北
被災諸郡近據東路提舉常平司申撥賜到措置斛斗
四十五萬石若賑給至四月終委有餘剩數目即許接
續出糶其西路下提舉常平司將來罷賑濟後民倉尚
艱即令被條減價出糶常平斛斗並候二麥收成日住
罷其行商與販斛斗往災傷去處糶賣乞依已得朝旨

與免商稅至五月終從之五月二十七日詔知太原府
范純粹專切體量賑恤河東流亡饑殍之人河北陝西
帥臣準此十二月六日詔以大雪令有常損價出糴倉
米以惠納民 徽宗崇寧三年正月二十四日戶部言
新兩浙路提點刑獄公事周誼奏常潤兩州去秋蝗旱
春夏之際糧食尤闕欲乞量展賑濟月分至四月未看
詳欲下兩浙轉運提刑提舉司體度如委有災傷人戶
闕食至三月終未可住罷從之十月十四日詔兩浙杭
越溫婺州秋苗不收人戶失於披訴並量與撿放其孤
貧不濟人戶仰提舉司廣行賑濟如物價增長即速以
常平米平價出糴五年正月二十五日詔兩浙路提舉

司賑濟水災乏食者 大觀二年八月十九日工部言
邢州奏鉅鹿下埽大河水注鉅鹿縣本縣官私房屋等
盡被淹浸詔見在人戶依放稅七分法賑濟如有孤遺
及小兒並送側近居養院收養內有人戶盡被漂失屋
宇或財物仍許依七分法借貸不管却致失所仍具賑
濟居養存恤次第事狀聞奏九月二十九日水部員外
郎陳長孺言奉詔體量邢州鉅鹿縣被患甚重欲旨揮
本路監司下所屬疾速將本縣被水第三等人戶亦依
第四等勅條賑貸從之十月七日詔秦鳳路流民盡赴
熙河路州軍本路備邊糴買為重深慮流移民戶積日
浸久耗盡並邊糧食可下常平司悉心措置賑濟存撫

早令復業仍具流移戶口確實數目及賑濟措置次第以聞三年八月十七日詔常潤州米價踴貴可量發常平斛斗賑濟人民九月六日詔東南路比聞例有災傷斛斗踴貴仍下諸路監司仰依實檢放秋苗分数仍依條賑濟四年三月二十六日詔潤州饒州災傷至甚賑濟米豆並展至四月終四月二日詔荆湖北路去歲災歉推行賑濟本路倉廩物料所蓄不多不接支用可相度給降空名度牒二十道借奉職假將仕郎告勅各七道量度數目多寡并逐色所直錢數目付本路監司與席貢同共分擘付逐州軍曉諭民間依陝西河北人戶入粟事體入中物料斛如未豆大小麥計所入數各支價

直以前項物充折別項拘收應副奉職六千貫借職四千五百貫假將仕郎二千二百貫度牒二百貫四日詔東南六路災傷倉廩物斛不接支用江南西路給降奉職借職假將仕郎告各七道度牒二十道江南東路淮南兩浙湖南路各給降奉職告三道借職告四道將仕郎補牒三道度牒二十道並依湖北路已得指揮施行政和三年三月二十三日詔潤州丹陽丹徒兩縣災傷放稅及七分以上常平賑貸在法至三月終罷緣今歲有閏田事必晚可展至四年終應有類此災傷州縣亦依此施行可疾速行五年三月二十五日梓州計度轉運使趙適言瀘州管下夷人結集作過緣邊一方戶

口數千糧斛財產盡被劫掠不惟夏麥收成不得秋穀
又失種時悉皆失業除已行下抄劄逐急以係省錢糧
支借存撫外欲望朝廷詳酌特降指揮下本路提舉常
平司措置優加賑濟施行從之六年三月十日詔浙西
常湖秀州平江府等處自去歲水災秋成尚遠其貧闕
不濟人戶仰本路提舉常平司通融那移一路應管常
平義倉與朝廷分椿米斛權依乞丐人法不限戶口石
數特加賑給四月八日詔添入湖州並以七分災傷條
例七月六日知杭州徐鑄言奉詔賑給錢塘仁和鹽官
餘杭富陽縣去歲水災貧闕人戶自四月十五日接續
賑給止六月十五日尚未有米穀相繼上市已一面行

下展至六月終從之八月十八日兩浙提舉常平司言
奉詔常秀湖州平江府等處水災權依乞丐人法賑給
本據逐州管下共二十五縣賑濟總四十三萬餘口乞
至收成日住給從之十月十九日詔平江府管下屬縣
有水災去處令依十分法賑濟八年七月十六日詔高
陽關路去歲賑濟全活百餘萬人河間府滄州為多安
撫使吳玠特降詔獎諭官吏推恩有差八月二十五日
詔江淮荆浙被水州軍漲水已退殘潦餘浸占田無藝
民不得耕比屋摧圯無以奠居可令郡守佐悉心賑救
提舉司於上供或封樁斛斗內量人戶多寡截充賑濟
即不得爭占候將來豐熟於常平司撥還上等四十萬

石中等三十萬石下等二十萬石九月二十七日詔江
淮荆浙以被水人戶多寡分上中下三等許截上供斛
斗賑濟可依已降處亦作三等截留四十萬如違以大
不恭論其後宣和元年正月七日臣僚言兩浙廉訪所
申據轉運司申截撥到本路米一十二萬七百石其餘
分下平江府湖州收糴應副又於鎮江府截住常州
米綱樁充賑濟而轉運司稱係來年額斛之數令起發
渡江恐致生靈不得均受朝廷惠養詔昨降御筆截上
供米賑濟飢民非不丁寧而姦吏公然違慢不行截撥
更於闕食之地收糴以充賑給是乃重困飢民乖方若
此仰提刑司并廉訪使者驗實人吏依法決訖配千里

轉運司官追三官勒停其後轉運司奏已支撥賑濟米四十萬石足備無闕詔副使蔣彝以應奉宣力特免勒停追官改作降官依舊在職十月八日詔諸路民被水患深淺不同州縣賑給不可一槩限滿住罷仰監司州縣悉心體究如被水尤甚民力未能自營不得便住賑給務在存活人命亦不可濫冒惠姦重和元年十二月十九日詔淮南被水楚州山陽鹽城二縣下戶飢殍三萬二千餘人無業可歸縣官悉令散放遂携老扶幼號訴監司而常平官告諭為乞米未下各令歸業轉於溝壑者已不少指揮到日於已截斛斗支撥賑救不足於鄭州鄭路發義倉充換支遣其郡守知縣常平官先

次勒停受訴監司降兩官並令提刑司取勘限十日奏
宣和元年二月十八日尚書右丞范致虛言奉詔楚
州山陽鹽城二縣被水令截撥斛斗賑救不足於鄴州
鄴路發義倉充撥支遣竊以災傷路分廣遠自江淮荆
湖兩川各被水患物價騰踊方春正多飢殍彊壯者流
為盜賊類多丐乞以市斛斗或采在田蔬茹之類甚者
無從得食老稚轉徙甚可哀痛按義倉法唯充賑給不
得他用比歲數豐未嘗支遣諸路義倉之粟甚多欲望
睿旨應去歲災傷州縣並量從核實災傷人數及外來
流民並給義倉物斛賑濟數係災復官司以前不曾檢
行特與放罪若今來指揮到依前庇隱令廉訪使者按

勅以聞若常平及本州通用諸縣義倉物斛計度俵散
不足並許依楚州兩縣所得前件指揮於鄰州鄰路發
義倉兌撥支遣詔京西路潁汝陳蔡等州見今民已流
移飢殍監司州郡並不申奏運司庇隱不放租稅致不
得依災傷賑濟遂使斯民轉於溝壑吏為姦罔不奉法
令以致如此為之惻傷可令新京西漕臣李祐放謝辭
星夜乘騎前去體量常平官孫延壽先次勤停餘監司
并守臣一一並具名奏應一路義倉可並特通融支撥
賑濟施行應災傷流移地分並令依法放免租稅疾速
行下五月二十九日詔淮浙去歲被水田業多荒今雨
暘順適耕種是時民無力施工可令兩路提舉常平官

散倉廩廣行借貸毋或失時施行訖具奏從兩浙轉運
司請也二年六月四日詔開封府賑濟乞丐二萬二千
餘人當職官吏推恩有差十月九日詔淮南災傷飢民
流離常平官其躬至所部竭力賑濟十二月二十五日
詔睦州及管下應避賊人令所在官司依條賑濟三年
正月十四日詔宣歙杭睦州民居緣先賊劫畧逃避既
無所得食遂致失所慮其間少壯之人或聚為盜老弱
幼小不能自存轉于溝壑深可矜惻仰江南兩浙路漕
臣憲司提舉常平及所在處郡守倅當職官等多方撫
諭優加存卹如有關食之人官為賑濟務在安集毋令
失所仍各具知稟狀以聞二十六日詔兩浙江東路避

詳見御批門

賊士族百姓流離無以自給及無居止宵旰惻然令州縣措置賑給借與官舍勸誘歸業八月十二日詔徽州已降指揮依七分法借貸被賊燒劫州縣人戶依災傷流移法賑濟其兩路復業人戶若闕少牛具種糧等仰提舉司審度量行借貸訖奏四年十二月十三日詔德州有京東路西來流民不少本州知通張拜榮王景溫等見行賑濟於在城并安德平原縣三處措置宿泊計六百三十一戶除已該給券還鄉外尚有五百餘戶各得均濟仰本路提點刑獄司究實聞奏取旨量推恩其餘路分遇有流移人戶不即依條存恤者並仰監司廉訪使者按劾以聞五年正月四日臣僚言聞蜀父老謂

本朝名臣治蜀非一獨張詠德政居多如賑糶米事著
在皇祐甲令常勅石遵守至今行且百年其法一斗止
糶小錢鐵錢三百五十文人日二升團甲給歷赴場請
糶歲計六萬石始二月一日至七月終貧民闕食之際
悉被朝廷實惠比年漕臣不職米直漸增或陳腐不堪
雜以糠粃不獨損六萬之數且幾察不嚴乞賜施行詔
漕臣檢會皇祐條例措置以聞十月二十八日詔大河
暴漲由恩州河清縣王余渡東向泛溢衝蕩大名府采
城縣本縣被水人戶令本州提舉常平官請詣流移所
在遍行賑濟六年五月十三日前知平陽軍府事商守
拙言契勘諸路州縣給散乞丐人米依條立期五日一

給不以所居遠近皆集一處給散欲乞遇風雪權令就近支散庶不失所從之八月十八日收復燕雲赦應貧乏及飢民並以係官錢米賑濟無令少有失所十月二十七日詔浙西諸郡夏秋水災穀貴艱食民戶流移已降指揮於所在依條賑濟訪聞常平司見管米斛數少可於本路實有見在米或見起上供米內截撥五七萬石付提舉常平官躬親往常秀平江等處隨宜分擘應副賑給務令實惠均及飢民十一月十七日詔河北京東夏秋水災民戶流移係踵於道可令應所過州軍隨宜接濟若常平義倉不足即發封樁應干斛斗賑給令實惠及人

高宗紹興元年五月十四日詔諸路見今米

價踴貴細民闕食令州軍將常平倉見在米量度出糶
仍廣行勸誘富家將原糶米穀具數置厯出糶州委通
判縣委令佐如糶及三千石以上之人與守闕進義副
尉六千石以上與進武副尉九千石以上與下班祇應
一萬二千石以上進義校尉一萬五千石以上與進武
校尉二萬石以上取旨優異推恩如已有官蔭不願補
授名目當比類施行並令州軍保奏通判令佐勸誘人
戶出糶數多令本路監司保奏等第推恩務要實惠及
民即不得虛椿數目陳乞推恩仍令監司覺察如違按
劾取旨重作責罰二年八月十一日詔福建路亢旱米
價翔貴令本路提刑司將泉州福州寄卸廣南米取撥三

萬石賑糴仍斟量逐州軍豐歉次第分撥三年六月十
二日荆湖南路宣諭薛徽言已檄州縣勸誘上戶借貸
種本月給考歷以多寡為殿最其上三名與免公罪校
一次稍多者又與免科役一次優異者保明申本司又
就全永間通那省米應付偕代應第四等以下戶計人
為一甲於本州給據自齎赴撥米州軍請領於是戶部
言人戶災傷在法以常平錢穀應付不足方許勸誘有
力之家出辦糴貸兼已剋刷湖南有米州軍支撥二萬
石付本路提刑司專充賑濟支用今乞下提刑兼提舉
常平司遵已降指揮施行毋致人民流移失所從之五
年四月十四日中書門下省言勘民間米斛踴貴詔令

戶部借支神武中軍糧食一月令盡數出糶九月七日
殿中侍御史王縉言應民旅般販米斛往旱傷州縣出
糶依日前指揮許就官司判狀執據與免經由場務力
勝亦賑救之一也從之十二月七日江南西路轉運司
言筠袁洪吉江撫州臨江興國軍及臨江軍新喻縣災
傷乞支降本路苗米五七萬石委提舉司以州縣災傷
分数取撥比市價減十分之三糶及令州縣勸喻有力
之家入納粳米每一千石或稻穀每二千石如係曾得
文解人三代中有文官無刑責補迪功郎餘人補承信
郎依獻納人例理選限陞陟從本州保奏給降付身便
作官戶免身丁差役免審量令本路帥司舉辟合入差

遣其入納到米卽減價賑糶并令州縣出給公據勸諭商賈收糶斛斗從
便出糶與免力勝稅錢每米百石許附帶貨物約百貫詢訪停塌斛斗之
人勸諭量取利息責認石斗數日出糶接濟及飢民合給米豆雖放我不
及七分縣分亦許販給委提舉司審度若常平穀不足聽取撥入納到米
謂今未因災傷和請到者支給候將來有納到義倉斛斗却行撥還州縣
當職官賑濟有方者委提舉司保明提刑司覈實以聞優與旌賞詔已令
收糶米斛六萬石準備賑濟今乞支苗米難議施行內勸諭人納稻穀依
入納米補官便作官戶一節見別作施行外餘並依仍委知通勸諭有力
之人出糶斛斗接濟不得後援六年正月十三日詔令湖南轉運司於已
科撥去年上供米內存留三萬石從本路帥司量度災傷輕重分撥付州
縣專充賑濟使用二十六日上宣諭輔臣曰歲飢民多流殍朕心惻然官
為發廩以賑給之則民受實惠苟為不然雖詔令數下咫尺徒為文具耳宜
申飭有司多方措置米斛二月一日詔令江西轉運司於去年上供米內
支撥一萬石付本路帥司勘量災傷輕重與常平米相兼均俵賑濟支用
七日右諫議大夫趙鼎言去秋旱傷連接東南今春飢饉特異常歲湖南
為最江西次之浙東福建又次之伏覩累降指揮賑濟固備盡矣然今日

賑救有二一則發廩粟減價以濟之二則誘民戶賑糶以給之諸路固嘗
許借常平義倉米又常令州縣賑糶艱難之際兵食方闕州縣往往逕惠
移用無可賑給唯勸誘賑糶尤為實惠然自來官中賑濟多止在城郭而
不及鄉村願以上戶所認米數紐計城郭鄉村人戶多寡分擘米數縣差
丞簿於在城及逐鄉要關處監視出糶計口給憑照文或支五日或并支
十日其交壽收錢並令人戶親自掌管官司不得干預既無所擾人亦願
從乞申嚴戒諭如當職官不親詣鄉村監糶米斛與故縱人吏糾擾令監
司按劾及許人戶赴訴其官吏重行竄斥從之三月七日成都潼川府夔
州利州路安撫制置大使兼知成都府席益言東西兩川去秋荒歉及成
都府路田事不登物價騰踊欲令四川都轉運司不以是何名色米權行
截撥專充賑濟或減價出糶以平米價詔令趙開除應副軍糧外將其餘
應平米斛寬剩撥付四川安撫制置大使司量度逐路災傷去處均行賑
糶二十九日殿中侍御史周昞言去土旱傷小民艱食命所在勸誘積粟
之家置厯出糶過三千石者等第推恩而州縣奉承不恪勸導無方乃謂
富民頑悍說諭不從遂降指揮許令一面酌情斷遣州縣官吏不問民之
有無而專以刑威逼使承認善良之民被其害矣欲望再降指揮專委諸

路提舉官徧詣所部戒約所令多方勸誘務令民戶樂從無因今來酌情
斷遣指揮輒有分毫搔擾詔依令諸路提舉常平官躬親徧詣所部州縣
巡按覺察如有違戾去處按劾聞奏其提舉官失覺察令御史臺糾劾四
月十二日江南西路安撫制置大使兼知洪州李綱言已遵奉訓勸誘出
榜置厯差官分詣諸州委知通縣官召上戶積米之家許留若干食用其
餘依市價量或盡數出糶其流民官中賑給竊恐秋成尚遠難以接濟已
一面勸誘上戶納錢米入官以助賑濟乞許給官告度牒之類折還價直
從之二十三日詔筠州高安上高兩縣當職官各先次特降一官放罷令
本路提刑司取勘具案聞奏以提舉常平司言賑濟非方至有盜賊竊發
殍亡暴露田畝荒萊飢民失所故有是命五月一日荆湖南路安撫制置
大使兼知潭州呂頤浩言被旨令廣西提刑韓璜收糶米三萬石般發前
來賑濟已節次催促至今並無顆粒到來望將上件米斛委韓璜催督水
運至湖南却委本路運使分撥州軍交卸以濟飢民詔令劉鵬向伯奮疾
速般發二十六日詔知婺州周綱除直龍圖閣知撫州劉子翼除直祕閣
並特令再任以中書言並治即有方賑濟宣力故有是詔八月二十九日
詔韶州李紹祖特與減二年磨勘以廣西提舉常平韓璜言起發湖南賑

糴米有勞故也十二月十四日尚書省言江東西湖南路去歲旱傷近據申奏賑濟飢民萬數不少其近路帥司及常平官措置有方甚稱委寄除江東帥臣葉宗諤已別作施行外詔帥臣呂頤浩李綱提舉趙不已吳序賓令學士院降詔獎諭同日尚書省言去秋江湖旱傷人民闕食朝廷支撥米斛及委帥臣監司并州縣守令賑給竊慮其間奉行減裂却致死損流移數多合行比較優秀詔令逐路帥臣監司於本路旱傷州縣各比較三兩處保明取旨賞罰十五日詔四川去歲旱荒之後繼以疾疫流亡甚衆深用惻然其即中縣令有能賑給困窮撫存凋瘵善狀最著者今席益禮詣實保明來上當議獎擢以為能吏之勸或廢慢詔令坐視不恤按劾聞奏亦當重賞典憲七年十月八日詔潼川府守臣景興宗陞一職廣安軍守臣李瞻果州守臣王際前吏部郎官馮檝漢州守臣王梅各轉一官知成都府席益命學士院降詔獎諭仍令四川安撫大使司開具其餘合轉官人職位姓名以聞以四川安撫制置使席益言諸州賑貸有方活飢民甚衆內馮檝出米四百石以助賑濟故有是命九年十一月六日臣僚言曩者旱曠為災官嘗發廩勸糴而州縣奉行姦計百出有民戶初非情願均令認數以應期限而平時儲積之家得以幸免者有所在初無收成

勒令轉糴以賑城郭而本鄉流離不假顧恤者願詔執事選擇廉謹彊明之吏推行德意務使實惠及民盡革前弊詔令戶部約束十年三月十九日臣僚言諸處糴米賑濟只及城郭之內而遠村小民不霑實惠向陳正同通判婺州賑濟極有條理雖窮谷深山之民無不霑霑實惠而州縣之吏亦不至勞乞令陳正同條具賑濟事件付戶部看詳遍下諸路依此施行從之十二年三月二日詔紹興府旱傷秋苗令於義倉米內支撥一萬石置場出糴十三年三月十八日詔令淮東總領呂希常於大軍米內支三千石量度分撥於鎮江府委官管押前去米價踴貴去處減價出糴仍令淮西總領吳彥璋契勘本路如合出糴依此施行十四年六月十五日宣諭輔臣曰福建浙東被水災去處已令寬恤賑濟尚恐州縣減裂詔令逐路監司各躬親前去悉力奉行務要實惠及民不得徒為文具十五年七月三日知泉州吳序賓言汀虔盜賊聚集泉南七縣罹其荼毒且致飢餓雖軍儲不足而義倉積粟見存七萬石欲開倉賑貸內殘破四縣乞比附災傷七分之法各借種子三千石自第四等以下戶委縣官隨便借貸詔每縣於義倉米內支撥二千石應副借貸十八年十一月二十三日上諭輔臣曰紹興府災傷閭食入戶以義倉米賑濟無使失所如別有災

傷去處亦令戶部多方措置十二月十二日上宣諭輔臣曰近令提舉常平官躬親詣災傷去處賑濟竊恐所轄州縣聞遠點檢遲滯可更令分委屬官悉力賑濟將來春耕合用種糧須令預先措置臨時借給使之耕種及時則贍養供輸公私兩濟十九年二月四日諭輔臣曰春雨膏潤於農事極利農事種糧為急若種糧不足則秋成無望昨已降指揮災傷去處令提舉常平司借給可更丁寧戶部應副十九日詔逐路災傷去處可令縣官措置齎發米斛就鄉村賑給逐路委通判點檢逐州委提舉常平官按察仍令御史臺覺察彈劾二十八日詔近有紹興府等處飢民在此求乞日有飢死者可令臨安府日下給米賑濟三月二日上諭輔臣曰近日紹興飢民多有過臨安者深可憐憫蓋是保正副抄剝漏落是致流移可令臨安府多方措置賑濟戶部應副米斛其諸路州縣災傷去處宜申飭監司守臣依已降指揮貸給種糧庶幾秋成可望四月六日上諭輔臣曰兩浙等路災傷去處可令提舉常平官親詣所部借貸種糧務要實及飢貧民戶毋令州縣及當行人侵剋徒為文具九月十三日詔兩浙東路提舉常平秦昌時除直祕閣兩浙東路提點刑獄公事以安撫司言紹興府明發州水旱災傷昌時悉力賑濟乞賜褒擢故有是詔二十四年五月十

七日尚書省言衢州開食人戶令本路常平官賑濟外竊慮未到之前人戶開食有妨歸業詔令本州日下賑濟仍曉諭各令歸業六月一日上諭輔臣曰官司賑濟止及近郭游手之人其鄉村遠處宜令提舉官及州縣常平官躬親措置務使實惠及於貧下二十七年十月二十九日詔令四川制置司總領所并逐路轉運常平司各具管下州縣有無旱傷聞奏如有實被旱傷去處仰支撥常平錢水賑濟或支用不足即於存留舊宣撫司積積錢米內量度取撥二十八年八月十六日上諭輔臣曰荆東西瀕江海去處田苗為風水所損平江府最甚紹興次之已將常平米賑濟尚慮貧弱下戶去秋成尚遠無錢可糴深軫朕懷卿等可令發義倉米賑濟宰臣沈該等奏曰在法災傷及七分以上合行賑濟當遵聖訓就委趙子滿都紮依次施行詔紹興平江府被風水損傷可令趙子滿都紮體訪委是災傷去處將第四等以下開食人戶量行賑濟候晚禾成日住罷仍具逐處賑濟人戶及支撥過米數申尚書省九月二十九日詔在法水旱檢放苗稅及七分以上賑濟綠田土高下不等若通及七分方行賑濟竊慮飢荒人戶無以自給可自今後災傷州縣檢放及五分處即令申常平司取撥義倉米量行賑濟二十九年二月二十五日詔令逐處守臣於見

管常平義倉米內取撥二分減市價二分賑糶內臨安府於行在椿楨木
內借撥四月二十六日詔紹興府山陰縣檢放賑濟不均去處令浙東常
平官再驗合放實數申其第四等以下不經賑濟者令遵節次已降指揮
賑濟施行閏六月四日提舉兩浙路市舶曾椿言去秋州縣有被水災傷
去處細民艱食多方賑濟及將常平米減價出糶飢民賴以全活而其間
奉行不至者其弊有三賑濟官司止憑耆保公吏抄劄第四等以下逐家
人口給歷排日支散公吏非賄賂不行或虛增人口或錫減實數致姦偽
者得以冒請飢寒者不霑實惠其弊一也賑糶常平米斛比市價低小既
糶者不分等第不限口數則公吏倉斗人家等多立虛名盜糶遂使官儲
易於匱乏其弊二也賑濟戶口數多常平該管數少州縣若不預申常平
司於旁近州縣通融那撥米盡旋行申請則中間斷絕飢民反吏失所具
弊三也欲望行下有司嚴立法禁力革其弊公吏抄劄不實與夫州縣申
請失時者並真嚴科委提舉官往來部內賑濟去處體訪如有違戾按劄
以聞從之三十一年正月二十六日詔令逐州府差官抄劄實貧乏之家
於見椿管常平錢米內依臨安府例賑濟分委有心力官依散務在實惠
不得減剋仍具支過錢米數目以聞八月三日都省言淮西州軍先因欠

債逃避出沒之人理合賑給令淮西提舉常平官日下於附近州軍取撥
常平義倉米三千石前去濠州賑給仍令龔濤劉光時照會常切存恤毋
致失所三十二年二月三日詔兩淮歸業民戶難於食用令本路常平司
賑濟如闕米於濶西江東常平米內各取撥一萬石應副支散五月二十
七日特進觀文殿大學士判建康軍府事張浚言體訪得東北今歲米價
踴貴乞朝廷多撥米斛錢物赴淮南賑濟支用詔令濶西江東常平司各
更於近便州軍支撥常平米一萬石孝宗隆興元年二月十八日尚書
戶部員外郎奉使兩淮馮方言據高郵軍百姓狀自前年金賊犯順燒毀
屋宇農具稻斛無餘歸業之始無以耕種欲乞就附近支撥常平及義倉
米本路提舉司令高郵軍措置借貸抱認催索起此農時早得布種以寬
秋冬艱食之憂其餘兩淮州縣經賊馬侵犯去處亦令依此體例施行從
之三月二十九日詔曰霖雨為沴雖側身修行尚恐誠意未孚可令諸路
監司守令應遇災傷去處常切賑恤困窮糾察刑禁仍各條具聞奏六月
十八日詔兩浙江東下田傷水衝損廬舍理宜寬恤令逐路常平司行下
州縣將被水人戶疾速依條借貸以備布種將來見得損傷即從實檢放
其充損廬舍之家多方存恤賑濟措置安泊無令失所七月十九日權知

盱眙軍周淙言泗州盱眙軍去歲虜人驚移不曾耕種近淮北流移之民
稍多米價頗長極邊之地販運不通已將本軍米斛比市價減半糴出
糴每日糴及五十石但去秋成稍遠而本軍米斛已盡乞支撥三十石廣
行賑濟從之九月二十四日詔紹興府飭民以義倉米依紹興十八年例
賑濟之從知府事吳芾請也十一月十一日知紹興府吳芾言本府今年
災傷異常豪右之家閉糴待價欲招誘出糴最多之人從本府保明申取
朝廷詳酌推恩從之二十七日兵部尚書兼湖北荊西路制置使虞允文
言京西一路今歲旱蝗乞下本路常平司後開春日將所管常平義倉米
廣行賑濟從之二年三月十日詔徽州旱蝗為災可將常平義倉米出糴
賑濟如本路州軍亦有似此去處依此施行二十七日德音高藤雷容州
應曾被焚劫逃避人戶仰守令多方招誘歸業內闕食不能自存之人依
災傷法賑恤即雖歸業而無力耕種者令提刑司以牛具種糧借貸之士
月二十四日臣僚言建康鎮江平江府常熟州今年秋淫雨不止大水
為災目今米價見已翔踴乞命提舉司依條賑濟農民不可使至流徙仍
行下諸州勸諭居停米穀之家平價出糴從之八月二十三日詔臨安府
米價增貴細民艱食令常平出米二萬石賑糴二十八日詔訪聞淮東有

被水去處人戶遑徙可令錢端禮於本路見管米斛內支撥一萬石措置賑濟如不足於淮東總領所大軍米內取支九月四日知鎮江府方滋言丹徒丹陽金壇三縣金秋雨傷稼穡已委官詣金壇縣取撥義倉米二千石丹陽縣一千石各依乞丐法賑濟尚慮管下少有客販米斛及乘時射利高糧價直民戶艱於收糴遂措置就委官於金壇縣添撥米二千二百石丹陽縣添撥米八百石丹徒縣撥米五百石並各減價每升作二十五文省置場賑糴每人日糴不得過二升竊慮豪右之家閉糴待價除已勸諭賑糴外乞依紹興九年七月二十九日指揮將出糴米教人依立定格日推賞仍乞立定有官人糴米比類遞轉賞格行下其或他州之人有能般販前來賑糴及得數目亦與一例保明推恩從之其後方滋又言今歲江東二浙皆是災傷去處獨湖南廣南江西稍熟相去既遠客販亦難勢當有以誘之欲乞朝廷多出文榜疾速行下湖廣諸路州軍告諭客人如般販米斛至災傷州縣出糴仰具數目經所屬陳乞並依賞格即與推恩州縣出糴官未往往只在近郭勸諭民間出糴者亦多搬入城市以至村落山谷之民無處告糴乞教請土人及寄居之忠實可委者四散監糴庶被惠者廣州縣開縣朝廷舊有約束今聞州縣不務均濟往往禁人般販

乞委監司嚴行覈察將開糶之官按劾施行從之十九日詔今秋霖雨害稼細民艱食出內庫銀四十萬兩付戶部變轉收糶米斛賑濟二十一日中書門下省言今歲浙西江東州軍內有水傷去處損害禾稼竊慮民戶流移關食乞下江西常平司於見管常平義倉米內取撥二十萬碩賑濟從之閏十一月十九日臣僚言淮南流移百姓見在江浙州軍無慮十數萬衆雖欲賑濟緣官司未斛例有限近降指揮有田一萬畝出糶米三千碩其餘萬畝以下却有不曾經水災收蓄米斛之家糶價倍於常年今相度欲委逐州見不曾經水災處占田一萬畝以下八千畝以上立定出糶米一千五百碩如此可以廣有出糶之數應接急關支遣從之二十五日上封事者言虜騎犯邊兩淮之民皆過江南緣鎮江潮間不開老小舟船艤泊江岸者數千隻近日大雪皆有暴露絕食之患欲乞廣行賑濟詔專委浙西江東提舉照應見行條法通融取撥一路常平米斛躬親賑濟臣寮又言近嘗具奏乞賑給兩淮流移之民伏蒙施行竊覩近日有司措置於多田之家廣加和糶今諸處各有糶到米斛欲望於浙西江東西諸郡和糶到米內取撥二三十萬石令逐路轉運司日下措置般運分往兩淮經殘破州縣鄉村委逐處守令遍行賑濟招誘流民歸業其貧之人不能

自存者日計口數給糧詔依十二月十三日詔兩浙路州軍內有災傷民戶闕食去處專委本州守倅以常平米措置減價賑糶乾道元年正月十九日詔已降指揮逐路州軍災傷去處措置賑濟訪問州縣止有創城內闕食之人其鄉村貧民多不霑惠令逐路轉運司行下逐州委官遍詣鄉村賑糶并勸糶民間米斛不得因而搔擾從中書門下請也二十一日詔紹興諸縣米價騰踴飢民闕食沿湖之民多有死損理宜賑恤可專委徐嘉喻樛多方措置賑糶務要實惠及民仍委提刑司體究逐縣死損過人數以聞從中書門下請也同日詔浙西州軍被水災去處已令賑濟訪問湖秀州流移之人甚眾竊慮州縣奉行不虔可令曾惲躬親前去多方借置賑濟毋令失所將州縣官吏措置有方保明聞奏其他慢去處具名按劾從中書門下請也二月三日詔兩淮江東州軍緣去歲間有水傷去處至今春米價翔踴細民流移甚可矜恤仰守令多方措置賑濟於本州應管錢米內取撥應副仍籍定數自隨管內寺觀大小均定人數賑濟柴錢責付主守掌管支用務令實惠均及流民毋致殍餓如奉行減裂仰提開司按劾重寘典憲賑濟有方具名聞奏當議旌賞六日中書門下首書兩浙東西路緣水傷細民艱食累降指揮令諸州賑濟及勸上戶糶米并

造粥給食非不詳盡竊慮州縣奉行威裂未見實惠及民詔浙西委吏部
郎官魯善浙東委司封郎官唐閔躬親遍詣諸路州縣檢察如有違戾去
處具當職官姓名申尚書省其措置有方亦仰保明聞奏八日詔高郵軍
壽春府流移之民令淮東總領所將太平州蕪湖縣起釐江西常平米內
取撥一千碩應副高郵軍於滁州金人遺棄下水內取撥二千碩應副壽
春府賑濟從江淮都督軍馬楊存中之請故也九日詔臨安府諸縣賑濟
竊慮奉行不虔差監察御史程叔達日下躬親前去檢察如有違戾去處
具當職官姓名申尚書省其措置有方亦保明聞奏十一日中書門下省
言臨安府內外飢民頗多竊慮有賑濟未盡者詔委姜詵韓彥古同臨安
府專一措置賑濟毋致失所仍約束所差官吏不得作弊或裂三月十三
日詔嚴備婺州荒歉發常平米以賑之從殿中侍御史章服請也四月
十三日尚書度支員外郎曾惲言今歲浙西災傷諸縣勸諭大姓出米賑
濟者即是給與賑糧者姑損其直賑貸者責認其傷欲乞將逐縣勸諭到
賑濟米謂如三千石者知縣與或一年磨勘計其多寡以為之等差賑濟
三百碩比賑濟一百碩州郡於諸縣數外自措置到賑濟賑糧數及委令
佐分鄉勸諭者守臣與令佐賞亦如之大小麥減米數之半以計其數詔

今有司第賞格行下浙西提舉常平保奏施行五月二十四日詔廣英連
詔州肇慶德慶府以峒民殘破令廣東提舉常平司依條賑濟從廣東提
刑石敦義請也同日詔光州屢經兵火令淮西總領所撥會子一萬貫江
西轉運司支米五百碩賑濟之六月十八日知宣州王佐言本州自五月
七日至二十六日雨如傾注山發洪被水之人開倉者眾欲將見管常平
糴米錢八萬餘貫循環作本差官收糴米斛賑濟從之二年二月三日兩
浙路轉運判官姜說言浙西州縣災傷民戶闕食乞下諭州軍府官守臣
疾速措置其闕食民戶量行賑濟勸諭田主豪右之家借貸種糧詔令浙
西提舉常平官相度措置九月七日詔浙東提舉常平宋藻前去温州將
常平義倉米賑濟被水闕食人戶如本州米不足通融取撥權發遣温州
劉孝題言本州八月十七日風潮傷害禾稼漂溺人命所有義倉米五萬
餘碩先蒙奉使司農少卿陳良弼盤量在倉不得支借若候申稟深恐後
時逐急一面賑給外有不候指揮先次開發之罪乞施行得旨放罪十一
日詔温州水災差度支郎中唐琢同提舉常平宋藻守臣劉孝題遍詣被
水去處覈實賑濟三年八月二十五日詔諸路州縣約束人戶應今年生
放借貸米穀只備本色交還取利不過五分不得作米錢算息以臣寮言

臨安府諸縣及浙西州軍舊米冬春之間民戶闕食多詣富家借貸每借一斗限至秋成交還加數升或至一倍自近年歲歉艱食富有之家放米人立約每米一斗計錢五百細民但救目前不惜倍稱之息及至秋收一斗不過百二三十則率用米四斗方糶得錢五百以償去年斗米之債農民終歲勤動止望有秋舊逋宿欠索者盈門豈不重困夫民之貧富有均要交相養之道非貧民出力則無以致富室之饒非富民假貸則無以濟貧民之急豈可借貸米斛却要責令還錢故有是命十二月二十六日左朝散郎孫觀國言四川州郡亢旱內綿劍州尤甚乞遣金字牌行下制總諸司多方賑濟上曰此去麥熟尚遠想見飢民狼狽當依所奏四年四月十一日司農少卿唐瑑言福建江東路自今春米價稍高民間闕食郡縣雖已賑糶止是行之坊郭其鄉村遠地不能周遍詔逐路提舉常平官疾速措置津發見椿米斛分委州縣清強官廣行賑糶或勸諭積穀之家接續出糶不得因而抑勒擾擾諸路依此六月四日詔建寧府衢州處州建昌軍米價翔踴人民闕食並出常平米賑濟之二十六日詔襄陽府水旱民飢令本府寄樁大軍米內支降二萬石賑濟之十二月二十六日雷州言八月一日海潮暴漲淹浸東南鄉民闕食者衆詔令禮部給降度牒十

十道付廣西提刑司變賣措置賑濟五年三月六日提舉江東常平公事
翟紱言竊見饒州諸縣去年被水災傷合行賑糴乞將常平舊管米一千
六百五十二碩九斗六升五合并收到乾道四年分義倉米五千二百一
十五碩二斗九升五合委官賑糴外其池州建德縣與饒州接連飢荒尤
甚更乞將常平米內支撥七百一十九碩六斗二升并拘到乾道四年義
倉米內支撥二百二十碩一斗七升并將約度被水第四等第五等以下大
小人口量行賑濟從之九日知鎮江府陳天麟言本司昨奉指揮將歸正
人顧政等二百一十八戶大小計一千一百一十口并續括貴到高琮等
五十一戶計二百三十六口許令於常平義倉米內取撥賑濟至乾道五
年五月終合行住支竊慮狼狽失所兼本府又不住有一般歸正人楊貴
等四十三戶陳乞賑濟欲將逐項歸正人更與展支一年庶幾小民始終
得霑恩惠從之四月十四日詔饒信州連歲旱澇細民艱食可出常平義
倉米以賑之同日權發遣江南東路計度轉運副使趙彥昂等言臣等近
恭奉御筆處分以饒信二郡嘗有水患令臣等協力應辦儲蓄賑濟臣等
措置將信州合起赴建康府大軍米一萬五千石截留樁管及將合起赴
鎮江府米二萬碩內將一萬碩就便樁管將一萬碩往饒州準備文使今

饒州知府黃珪劄子稱雖蒙提刑司撥到義倉米六千八百餘碩不了一
一月賑糴之數乞備申朝廷於椿留米內支撥二萬碩添助賑糴臣等照
得饒州合發上供米斛除椿留外尚有合起赴行在米一萬一千九百六
十碩臣等除已一面速急行下饒州於內先次取撥一萬碩量度市直減
價賑糴外候信州起到米一萬石却行拘收理充合起之數兼慮信州亦
有似此闕食去處臣等已行下信州取撥米五千碩依此減價賑糴去訖
所有饒州前後椿留米四萬碩欲乞早降指揮許再撥一萬碩更令接續
賑糴從之五月十日提舉江南東路常平茶鹽公事翟紱言臣近因巡歷
到饒信州面諭逐州知通委請諸縣令佐勸諭上戶將積蓄米穀減價出
糴接濟細民食用今饒州并諸縣申到應勸諭得上戶願糴米穀共計一
十九萬六千六百碩六斗五升并轉運司支撥到上供米一萬碩付饒
州賑糴緣逐項米數委可接濟細民食用所有臣先來奏乞更乞支米一
萬碩欲乞住撥候所糴米穀盡絕如民間尚闕米穀即別具奏乞支撥施
行十月十四日詔台州出常平義倉米賑濟被水之民六日權發遣兩浙
路轉運副使劉敏士言溫台二州近因風水飄損屋宇禾稼雖將義倉米
賑濟緣被水丁口至多竊慮來年秋成尚速將何以繼臣今措置欲令各

州勸募上戶官借其貨往浙西諸州豐熟去處販販米糧中價出糶至米
年秋間却輸納錢本還官庶幾販販既多米稍停舊其價自平今米温州
已募上戶借與錢本見行措置惟是台州財賦窘迫無以為計臣欲支錢
五七萬貫給與台州令勸募上戶販販米斛以濟飢民詔令兩浙轉運司
差撥人船於近便州軍戶部搭管米及常平義倉米內取撥三萬碩前去
台州委官於被水去處減價出糶其糶到錢令本司拘收撥運元取米去
處十七日新權發遣福建路轉運副使趙彥端言竊見饒信之間地瀕湖
江連有水患欲望每歲於饒信兩州上供米內各截留數萬碩若次年不
曾出糶或有出糶未盡之數即行起發却以當年新米代充稍做常平以
新易陳之意詔今後每歲逐州各截留三萬碩準備出糶二十八日知揚
州主管淮安撫司公事莫濛言契勘本路楚州盱眙軍沿淮鄉村間有
早傷訪聞得鄉民漸至艱食揚州總領所椿積米內見有一萬餘碩乞令
楚州盱眙軍般取前去賑糶所有價錢赴總領所輸納徑令徑自糶未休
舊椿積不雅接濟飢民又得以陳易新委是兩便從之十一月十五日詔
今歲淮安州軍間有早傷去處踴應冬春之交米價增長民間或致闕食
可將淮安見管常平米三萬六千六百餘碩令淮安常平司相度委官置

場量行減價賑糶到價錢令項椿管便將來秋成日却行收糶補還十
二月二十四日成都府潼川縣夔州利州路安撫制置使兼知成都軍府
罷公武言成都府自天聖間知府韓億於本府南倉創永利放每歲出糶
以六萬碩為準以拯貧民自二月一日糶賣至八月終止又有拘收到戶
絕官田廣惠倉米歲給養病貧民 崇寧五年準詔旨成都糶賣貧民米
如有闕數許轉運司椿錢對糶常平司應副仍不得妨常平司支用太觀
二年知府席旦奏請成都府每歲糶米六萬碩近來轉運司以無米應副
三分之一不足以賑惠貧弱乞下四川每年如米價稍貴委逐州長吏體
量將義倉米依常平法減價出糶至宣和五年又準詔旨成都府今後如
遇米價踴貴依席旦已得指揮將義倉米減價出糶收椿價錢歲終却行
收糶自此之後間遇荒歉緣義倉所收數少賑惠不足臣自到任後來節
次措置糶賣到米四萬二千九百六十餘碩通本府逐年積到常平義倉
米二萬九百八十餘石差官抄劄府城內外貧民給牌歷置場減價糶賣
以濟飢民本府雖有所收義倉米斛一年止有八千餘石見根刷本府公
使等庫并制置司激賞庫錢物三十餘萬貫差官往瀘叙嘉眉等州來時
收糶米斛約可得六萬餘石津運前來府倉別放收貯復韓億永利放所椿

歲糴之數仍以廣惠倉為名每斗或價作三百五十文專充賑糴不許他用拘收本錢循環奉貼日後本府諸庫債積到錢物糴買以備久遠賑濟仰副朝廷勤恤民隱之意詔依其糴到錢日後專充賑糴本不得他用晁公武令舉士院降詔獎諭六年閏五月十一日詔荆西州軍大水令呂正己前去措置賑濟既而臣僚言已差呂正己措置荆西被水居民乞就委漕臣於本路取見州縣被水實數官為貸其種穀再種晚稻將來秋成或絕長補短猶得中熟諸路如有似此去處亦乞依此施行從之六月十二日權江南東路轉運副使張松言寧國府建康府太平州廣德軍均田均被淹沒委實災傷逐州差官賑濟被水人戶一依太平州例每月支散錢米所有第四等人戶依條不該賑濟乞將常平米減價出糴從之十八日提舉福建常平茶事鄭伯熊言福建路八州軍府縣自入夏以來闕少雨澤其上四州軍府雖時得甘雨猶未霑足早禾多有傷損下四州軍亢旱尤甚晚種有不得入土者乞將所在米價依條支撥常平米斛賑濟從之八月二十四日詔淮南路轉運司於廬州樁積米內取撥三千碩應副濠州賑糴九月十四日詔於建康府樁管米內取撥一十萬碩限一月津發赴廬和州樁管準備賑糴十月二十一日詔淮東總領所於揚州樁管米內

撥一萬碩應副楚州賑糶五千碩應副盱眙軍賑糶十二月二日詔江東
轉運司將江西路合起赴建康府米三十萬碩內取撥十萬碩赴太平州
五萬碩赴池州椿管準備賑糶九日詔湖州將拯積和糶米五萬碩賑糶
水災之民同日詔淮東總領所於揚州見管米內取撥一萬碩分淮東
州軍賑糶二十六日詔和州旱澇禾麥損傷可借撥米一萬碩賑糶飢民
乾道七年正月八日詔兩浙路轉運判官胡堅常同浙西路提舉常平司
措置賑糶務施實惠十三日江東轉運副使沈度言廣德軍災傷尤重欲
望支降米二萬碩水運至本軍委自守倅拘收賑糶詔令沈度取撥二萬
碩措置津運赴廣德軍委本軍守倅賑糶二十二日利州觀察使知襄陽
府韓彥直言去歲秋苗不登乞於本府寄碇大軍米內支降三萬碩賑濟
從之二十九日詔浙西常平司於平江府常平義倉米內借撥五萬碩應
副湖州賑糶接濟飢民從知州向均之請也二月六日詔招信縣荒歉已
支米二千石賑濟更於揚州椿管米內撥三千碩賑糶八日據知高郵軍
劉彥言本軍高郵興化縣人戶旱澇又有黑鼠傷稼乞於本軍大軍倉內
取撥米一萬碩每斗作價錢一百五十文省出糶遇豐熟日却從收糶從
之同日廬州言本州旱傷樁合肥等縣人戶陳乞借貸及有歸正人乞賑

濟近蒙支撥常平米五萬碩付廬州和州准備賑糶於內已撥一萬碩賑
糶與和州關食人戶今欲更撥一萬碩借貸與前項飢民及歸正人候將
米成熟日撥還從之四月十五日光州觀察使高郵軍駐劄御前武鋒軍
都統制燕知楚州陳敏言本州去年因患鼠傷稼秋間水旱農民飢饉
蒙下通州撥五千碩又下總頤所支米一萬碩以通州水路遙遠止就楊
州般到米一萬碩賑糶本州戶口既繁食用日廣賑糶官米今已不多欲
望再撥米一萬碩付本州賑糶詔令本路常平司將通州未撥米五千碩
疾速科撥應副七月六日詔江西州軍間有關兩去處合行措置收糶未
解準備賑糶可令龔茂良拘收軍變已刷到發運司奏計錢并江州有發
運司貿易等官會子共湊二十萬貫於江制豐熟去處收糶米斛一十萬
碩均撥赴最不熟州軍樁管申三省樞密院同日詔江西路今歲間有旱
傷州縣責在守令究心賑恤可令本路帥臣將旱傷州縣守令稽查量如
內有老謬不能究心職事之人先次選擇清強能吏前去對易措置賑濟
存恤施行開具已對易官職位姓名及見作如何賑恤事件聞奏八月一
日詔湖南旱傷州縣亦合依此施行十三日詔昨發運司於潭衡全道
卽州桂陽軍和糶米斛未曾支撥可令湖南轉運司將糶到米撥赴災傷

州軍椿管賑濟賑糶八月一日詔江州今歲旱傷見今已有流民守臣主
視不據實申奏專委漕臣一員日下起發前去江州同守臣將見管帶早
義倉米斛四萬四千餘碩措置賑糶如不足即仰收糶客米或尚闕欠仰
於本州見椿管朝廷米內逐急借充賑糶仍具已如何措置及賑糶過
數目并委官起發月日以聞從中書門下請也同日詔饒州旱傷除已存
留米一萬碩賑糶外可於本州米內更存二萬碩日下措置賑濟同中書
門下省言湖南江西間有旱傷州軍切慮米價踴踊細民艱食畱室上戶如
有賑濟飢民之人許從州縣審究詣實保明申朝廷依令米立定格目
給降付司補受名目無官人一千五百碩補進義校尉如係進士與文辭一次不係進士使到
即與免使一次二千碩補進武校尉如係進士與文辭一次不係進士使到
即與免使一次四千碩補承信郎如係進士與文辭一次不係進士使到五千碩補
承節郎如係進士補進功郎文臣一千石減二年磨勘如係進士人猶一歲
二千碩減三年磨勘如係進士人猶兩歲仍各與占射差遣一次三千碩轉
一官如係進士人猶兩歲仍各與占射差遣一次五千石以上取旨便與推恩
武臣一千碩減三年磨勘陞一年名次二千石減三年磨勘占射差遣
一次三千石轉一官占射差遣一次五千碩以上取旨便與推恩其旱傷

州縣勸諭積粟之家出水賑濟係敦尚義風即與進納事體不同詔依其
賑糶之家依此裁半推實如有不實官吏重作施行

詔依此

八日

兩制路轉運判官胡堅常言昨蒙朝廷委以賑糶平江

府常熟知縣趙善括勸誘上戶米數倍於諸邑崑山知縣聞人大雅委之

吏輩寅緣為姦欲望朝廷將此二人量賜懲勸詔趙善括特轉一官聞人

大雅特降一官十六日勸發達隆興府龔茂良言以本路旱荒御膳進素

而臣忝一路兵民之寄合賜罷斥詔龔茂良為一路帥臣當茲旱暵而乃

引咎自歸欲求開退非朕責任帥守之意也可剗與龔茂良宜講救荒之

政散利薄征以至攘除盜賊勉修乃職安輯一路之民所請不允二十三

日資政殿學士知建康府洪遵言饒州南康軍今歲旱災非常早種不入

土晚禾枯槁兩郡飢民聚而為盜乞檢照江西湖南已行賑濟體例遵

施行從之尋詔本路提舉常平司更於附近州軍取撥常平義倉米五萬

碩付饒州五萬碩付南康軍應副賑糶二十五日權發達隆興府龔茂良

言本路州軍被災輕重不等贛州南安建昌早禾小損晚稻無傷次則吉

撫袁州時有雨澤所損亦有分數惟是龍興江筠州與國臨江軍荒早尤

甚旱禾皆死晚稻不曾栽插自來未嘗似此飢歉已分委官前去同守令

講究利害相度欲將江制糴到米就近徑赴建康或鎮江總領交納却就
減本處上供米賑濟米充所糴之數大姓巨商勢必閉糴本州已立下價
直每碩止一貫五百四十文足比之市價折錢七百六十文足以一名若
認糴二萬碩共折錢一萬五千二百餘貫足若不優異推賞恐無人願就
今進納功即係八千貫文省比之以二萬碩米中糴入官折閱之數不
啻過倍欲乞補充功即有官人許轉一官資及見係理選限將仕郎並
許參部注受合八家便差遣從之九月七日詔江南西路諸司申到江州
旱傷最甚除已降指揮許截留并令諸司科撥米外可令劉孝趕日下躬
親前去江州將本路常平米接續賑糴十一日詔訪聞湖南今歲亢旱民
頗流離令禮部給降度牒一百道左藏南庫支降會子一十萬貫付湖南
提舉胡仰之收糴大斛措置賑糴二十二日敕文閣侍制提舉江州太平
興國宮張運言居閑躬耕儲粟二千餘石適逢合歲旱歉敢助賑濟詔令
學士院降詔獎諭二十五日白劄子江東西湖南州軍今歲旱傷欲乞休
紹興九年指揮將本路檢放展闕之事則責之轉運司過早權開之處以
有計通文應劄糴給借貸則責之常平司覺察妄濫則責之提刑司體量
措置則責之安撫司詔依仍令逐司各務遵守三省歲終考察職事修廢

以聞送敕令所立法本所看詳災傷去處全在賑濟若不分隸責之帥臣
監司苟慮奉行違戾諸司設有違戾若不互相按舉亦無以覺察今參詳
許逐司互相按舉及將已行事件申尚書省以憑考察仍立為三省通用
及職制令從之是日宰執進呈江東西湖南旱傷依紹興九年諸司分認
賑恤事上曰他路或遇災歉兼當依此然轉運司止言檢放一事猶恐未
盡他日賑濟之類必不肯任責虞允文奏曰轉運司管一路財賦謂之省
計九州即有餘不足通融相補正其責也上曰然今降指揮上以檢放為
文他日以此藉口逃責何所不可允文奏曰乞立法遇諸郡有災傷處以
省計通融應副上曰如此則盡善矣故今立法十月七日詔江州旱傷節
次已降指揮取撥本州常平義倉米四萬四千餘碩及兗截上供米六千
五百餘碩勸諭上戶認糴米二萬八千六百餘碩截留贛州米一萬碩及
支糴本錢四萬餘貫收糴米斛并令漕臣取撥本路常平米一十萬碩吉
筠等州見起建康米八萬餘碩未起朝廷檄管米九萬七千餘碩及江州
元管收糴米均撥付本州賑糴并立賞格勸諭上戶出米賑濟賑糴倚闕
夏稅檢放秋苗地主佃戶資助賑給并將禁軍土軍弓手免起發存留防
賊可令帥漕提舉官多出文榜候歲終比較殿最如官吏奉行威裂委御

史臺覺察按劾以聞同日詔饒州旱傷已降指揮取撥本州常平義倉米八萬餘碩及於附近州縣常平義倉米內取撥五萬并截留本州見起椿管上供米三萬碩及獻助米二千碩付本州并勸諭上戶賑糶賑濟又倚聞夏稅檢放秋稅及地主佃戶資助賑給并將禁軍土軍弓手並免起發存留防賊可令江東帥漕提舉官多出文榜督責守令多方措置存恤歲終比較殿最如官吏奉行威裂委御史臺覺察彈劾以聞十日樵發遣隆興府龔茂良言竊詳所立賞格除出米納官不請價錢即合推賞所有賑糶係減半推賞然不可一槩若依市價以收厚利商賈之流販賤賣貴較其石數則盡合補授如此賞典皆可濫及飢民不蒙其利在法官為立中價不得過為虧損今秋將賑糶之家並令官司差人監視給歷紀糶過之數究實保明申朝廷依格補轉其客販米數或充便上供米前來中糶入官如願依立定價例賑糶推賞之人並一體施行兼上戶若在豐熟處即合指闕食州縣接濟合隨本處時價減三分之一官司給據照證般載往災傷地分賑糶即行理賞從之十二日知饒州王拒言昨蒙朝廷支撥本州椿管米三萬碩緣軍糧不繼已先那支遣乞別借錢會糶米未歲稍稔却當拘納詔令左藏南下庫支會子五萬貫餘依二十三日直祕閣樵發

遣徽州趙師夔言本州管下旱傷有婺源縣遊汀米蘇兩鄉尤甚臣措置
到錢一萬五千貫欲於本州及諸縣常平義倉米內依例定價回糴米五
千石就便給散賑濟乞令提舉官稽管上件錢俟開春收糴補還元數從
之十一月十二日知建康府供漕言太州府蕪湖知縣呂昭問以和糴米
為名禁止米斛不得下河饒州旱傷前來收糴米七百五十餘碩本縣抄
劄不令交還詔呂昭問降一官放罷十九日湖南轉運副使吳龜年司馬
倬等言本路旱傷雅潭最甚昨來黃鈞趙剡米四萬碩乞充賑糴使用詔
糴到價錢循環作本收糴米斛賑糴二十二日權發遣隆興府龔茂良言
乞差新知興國軍右朝請郎陳寅往來被旱州縣同共措置檢察乞量差
兵級破本官驛券行移作本司措置賑濟官從之八年二月八日權發遣
隆興府龔茂良言本路去歲荒旱異常如隆興府江筠州臨江興國軍五
郡各係災傷及七八分以上雖已依條將老幼疾病之人先行賑給緣人
口幾及百萬委是賑給不周乞將已得旨取撥到米一十萬碩并更勸諭
上戶賑濟給散庶幾稍宣德意詔將續撥義倉米五萬碩令龔茂良充賑
給使用餘常平米五萬碩依舊循環賑糴三月十五日敕文閣待制知潭
州陳淵作直徽猷閣荆湖南路計度轉運副使司馬倬言潭州安化縣上

戶進武校尉龔德興平時兼并遂至巨富以進納補官比至早傷鬪食獨
擁厚資畧不體認國家賑恤之意詔龔德新進武校尉一官勒停送五
百里外州軍編官四月一日權發遣隆興府龔茂良言本路旱荒細民闕
食若不廣行賑給無由可救高觀張暉昨緣獻米賑濟除閏職又添差本
貫兵官富民歆慕欲乞明降指揮出米賑給除依格補官外特與添差本
路合入差遣一次仍依離軍人例減半支給蓋富民本非急祿止欲以
此為榮考其閭里如依所乞必翕然聽從速得米斛濟此目前非小補也
從之十五日湖北常平司言鄂州有紹興十一年至建炎年間歸正人委
是年深各已樂業今來却欲同三十一年以後歸正人請錢米深慮諸州
災傷難以支給詔令紹興三十年終以前人免支自三十一年以後歸正
人照應赦文賑濟八月七日詔四川自入夏以來陰雨過多沿流州縣多
被其患如嘉眉邛蜀等州最甚令四川安撫司審實被水去處措置賑恤
從知成都府王震請也八月權發遣隆興府龔茂良言本司勸諭上戶出
米賑濟賑糴緣所立官格比尋常需餉計之其直不啻過倍又有運之
費欲吏人加優異紹興三十二年閏二月十九日指揮進納迪功承信郎
並理為官戶內迪功郎與免試先次注授差遣依奏蔭人例承信郎進武

進義校尉并免試弓馬及短使先次注授差遣今來勸諭賑濟告勅元降
指揮係敦尚義風即與進納不同見得事理尤甚雖各係理選限及先與
添差本路合入差遣緣許理官戶一節及將來到部免試先次注授依奏
陰人例等事未嘗立法吏戶部看詳欲將承信郎比附承節郎上州文學
比附迪公即依條遇注授薄尉差遣餘並依紹興三十二年閏二月十九
日已得指揮仍比擬獻納已降指揮理為官戶從之十月十五日詔陳寅
特轉一官徐大觀向士俊翁蒙之各減三年磨勘李宗質王日休江溥向
澹獻達先王許胡振蒲堯仁汪廣各減二年磨勘謝諤劉清之薛斐董述
黃夏趙不比王杞鄭著趙永年趙公迥各減一年磨以賑濟有勞從江西
安撫龔夔茂良之奏也十一月六日詔應材與轉一官羅金若王既陳符
陳確呂行已孫遵辰各與減三年磨勘以賑濟有勞從湖南安撫使陳綱
作提舉湖南常平胡仰之奏也同日道州管道孫主簿禹大和翟到賑濟
米四萬碩與減二年磨勘從湖南提舉常平胡仰之請也九年閏正月十
七日詔雪寒細民艱食令臨安府將貧乏不能自存之家令左藏南庫吏
會子六十貫豐儲倉撥米三千碩付臨安府分委有心力官日下巡門依
散賑濟每日支錢二百文米一斗務在實惠不得減克

宋會要

賑濟二

淳熙元年二月二十一日詔台處州去秋大旱仰於逐
州椿管常平宋內令守貳約合用實數申常平司速行
取撥賑濟衡婺之間似此去處比類施行從制宋安撫
錢端禮請也四月七日詔訪聞關外四州去歲秋旱傷
米價踴貴竊慮民間闕食致有流移可令戶部郎官四
川總領趙公亮同本路提舉常平官日下津運常平義
倉米并附近椿積米前去賑糶二年六月十九日詔
湖南江西將寶被茶寇殘擾及逃移人戶疾速招撫復
業仍支常平米賑濟九月七日詔淮南今歲間有水旱

民戶艱食流移失業可令淮南運判趙思日下取撥常
平義倉米賑糶閏九月二日詔諸路常平司每歲於秋
成日視所部郡縣豐歉其合賑糶賑給處仰約度所用
及見管米斛或闕少合如何措置移運仍須於九月初
旬條具聞奏以中書門下省言諸路監司言災傷故也
二十八日詔淮東總領錢良臣體訪淮東旱傷次第分
數於朝廷見椿管米斛內量行取撥減價出糶揚州米
一萬五千碩就本州支真州一萬碩於揚州般運滁州
一萬石就便於建康府椿管米內取撥高郵軍五千二
百石就本軍支楚州五千石於高郵軍般運盱眙軍四
千八百石就本軍支從良臣請也十月九日詔建康府

災傷可於椿管朝廷米內借米五萬石令守臣劉珙措置賑濟二十五日淮南漕臣言今歲和州旱傷尤甚乞將屯田莊所管稻穀比市價減糶及濠州椿積米四千五千餘石取撥賑糶從之十二月三日詔寧國府廣德軍太平軍旱傷至重所放苗稅統縣皆不及七分若不行賑濟竊恐實被災傷及七分以上貧民下戶向後鬻食流移失所委提舉常平官督責守令將逐鄉村災傷至重人戶從實括責依條賑濟寧國府廣德軍池州并諸縣分各有常平義倉并椿管米申提舉常平司支撥

三年正月十三日詔淮東旱傷已節次支降米斛賑糶其賑貸等事令常平官依條以時奉行務要實惠及

民二十一日淮東總領錢良臣言去歲淮東早傷州軍
今來中下之家無種可種本所見有馬料稻子一萬二
千七百餘石欲行借撥應副作種至秋拘收椿管從之
七月五日詔去歲江東荒歉安撫使劉珙賑濟有方米
價不至翔踴居民並無流移可令學士院降詔獎諭九
月十六日詔湖北州軍間有旱傷處於常平司疾速指
置賑濟毋致人戶失業十月一日詔金洋州興化府間
有旱傷竊慮民戶艱食可令四川總領李繁分差官屬
前去將椿積米粟減價出糶其糶到價錢候豐熟日補
糶依舊椿管三日詔湖北州軍間有旱傷處已令常平
司疾速依條賑濟其京西州縣可依湖北已措置事理

施行 四年九月二十一日詔湖廣總領所就於襄陽
府見椿管朝廷米內取撥次等米一萬五千石應副本
府充賑給歸正貧民支用從知襄陽府張子顏請也五
年十一月二十三日詔高郵軍楚州於高郵軍椿管米
內各支一萬石泰州於本州支一萬五千石通州楚州
並於鎮江府賑糶米內各支一萬五千石並充賑貸以
淮東提舉司言通泰楚州高郵軍已熟之禾為田鼠所
傷乞於逐處椿管米內支給賑濟故有是命 六年四
月二十七日詔衢州遭水米價踴貴可於義倉米內撥
米五千石出糶賑濟十二月二十四日詔和州近緣雨
雪凍餒者多可於本州椿積米內支借一萬石賑貸從

守臣請也。七年二月十七日詔湖南安撫辛弃疾於前
守臣王佐所獻椿積米內支五萬石應副邵州二萬石
永州三萬石賑糶以并疾言溪流不通舟運艱澁故也
八月十三日詔近緣河港淺澁行在米價稍增可令司
農寺行下諸倉於朝廷椿管米內共分撥一十萬石專
委臨安府守臣措置多差官屬分頭置場低價出糶務
要惠細民不許上戶及米鋪戶計囑糶買二十一日詔
今歲旱傷令戶部於諸倉撥米十萬石低價令臨安府
置場一十五處委官出糶訪聞所委官多至巳時出糶
午時閉場致所糶不廣令自今須至申時住糶不得阻
節及不得將糠粃和雜作粳如違重寘典憲八年十二

月十七日同九月十三日詔今歲江東州軍亢旱令本
路提舉常平司將所部州軍應管常平義倉錢米通融
寬數支撥賑糶廣德軍南康軍將去年未起米一萬石
添助以三州旱猶甚故也同日詔鎮江府以常平米賑
濟外更於椿管米內取撥三萬石貼助賑濟以守臣會
達言本州旱甚故也十七日詔淮西轉運司差官檢點
本州軍實有旱傷處依條賑濟從知舒州李異請也同
日江西漕司言本路旱傷細民闕食本司舊有上供米
一十四萬石見在諸州椿管乞令逐州知通認數賑糶
從之二十一日江東安撫使陳俊卿運判王師愈言本
路九郡除太平州外餘皆旱傷乞行賑糶同日詔饒州

此句有誤

早傷處令本路提舉將常平義倉錢米通融寬敷支撥外其淳熙六年橋留米盡行賑糶從守臣徐清請也二十三日秀州守臣言本州旱歉見措置賑濟用米甚多本州并諸縣共有常義平倉米十五萬餘石恐未足用乞於本州舊橋管和糶米內支撥一十萬石省著作郎兼權吏部郎官袁樞往淮南將作主簿王謙往兩淞江東躬親按視點檢有措置事件開具以聞二十七日詔豐儲倉撥米三萬石付臨安府屬縣二萬石付嚴州及諸縣賑濟二十八日知臨安府王佐言奉詔措置賑濟城外饑民已於諸處寺院差官監視煮糜粥給散養濟更乞撥備倉米三千石從之十二月詔左藏南庫支會

子二十萬貫。浙東路常平義倉錢內支一十萬貫付浙東提舉朱熹措置循環糴米充一路賑濟。十七日詔行在米價稍增，可於諸倉椿管米內共取撥七萬石，專委臨安府守臣差官置場賑糴。九年正月十一日詔鎮江府於見椿管會子內取撥三萬貫付淮南運判趙彥適貼助賑濟。同日詔浙西州軍去歲旱傷處可於鎮江府見椿管陳次米內支撥二萬石付提舉司通融賑濟。賑糴從提舉張均請也。二十一日詔嚴州撥米三萬石專充賑糴，可改作賑濟，仍更撥米三萬石招集流移作借貸計辦種子。從知州楊布請也。同日詔徽州將見管義倉錢四萬八千餘貫，借充循環糴從守臣呂大猷請。

也二十六日詔江州守臣於本州見椿管米內借撥一萬石專充賑糶二十七日詔京西常平司於見管常平米內借撥五千石於本路通融賑糶二月十二日詔荆門軍於見椿管米內支一千八百石借撥三千石按續賑糶十三日詔復州將見管湖廣總領所糶到椿管米內支撥一千石補助本州賑濟饑民從守臣請也同日臣僚言朝廷給米於州郡或賑濟以周急或賑糶以減價皆以為民也頗聞州郡或截以為軍糧或留以贍州用或出納不謹乾沒於吏革之手至於及民者無幾乞令各路提舉司覺察體訪從之三月一日詔四川制置司分撥米斛於恭渚忠萬州賑濟從制置陳峴請也九

日詔鄧州旱傷可於屯田穀內借撥八千石賑糶十一
日詔德安府於椿管米內借撥三千石付江陵府二千
石付信陽軍並充賑濟十三日知鎮江府錢良臣言乞
於本府轉般倉米內支米一萬石接續賑濟從之二十
一日詔降空名度牒二十道付合州專糶米以備賑給
從守臣何正仲請也二十五日詔平江府於椿管米內
支四千石應副常州賑濟從提舉張均請也七月六日
知隆興府留正言本路州軍旱傷之甚諸郡常平義倉
米約有三十萬餘石及漕司椿管米十萬餘石通共四
十萬有餘石乞立價預行賑糶從之十三日降空名度
牒三百道及於南庫支會子一十五萬貫令湖東提舉

朱熹量度州郡旱傷輕重均撥專糴米賑濟毋得他用
九月十七日詔昌合普資四州旱荒可於四川總領新
椿管錢引內支十萬貫隨宜給散令守臣多方措置收
糴米麥菽粟之屬二分賑應副賑糴詔借五萬石二十
八日詔台州今歲旱傷細民闕食於平江府見管淳熙
四年和糴米內借撥二萬石專作賑糴以本府請也十
月二日詔和州旱傷令無為軍於見椿管陳次米內支
撥二萬石付本州借貸闕食人戶候來歲得熟却行拘
納新米椿管從守臣張詒請也十九日詔興國軍旱傷
差重已令借撥總領所米五千石恐未能均濟可更於
江州大軍倉取撥一萬石賑糴十一月四日詔紹興府

將今年合納湖田米五萬石在州賑糶從本府請也十
二月十五日詔江西轉運司斟酌江州旱傷輕重將許
借發準納和糶椿管米分撥前去應副賑糶八年正
月十六日詔浙西州軍去秋旱傷處五分以上量行賑
濟五分以下量行賑糶從提舉常平趙伯渙請也二十
二日詔無為軍將椿管米內有陳腐不堪支遣二萬二
千餘石撥付本軍盡行賑給從守臣朱宋卿請也四月
十三日知廣德軍耿秉言去歲旱傷賴朝廷賑救今去
秋成之日猶遠欲於鎮江府椿管陳次米內支二萬石
出糶從之六月十一日知紹興府張子顏言今歲諸縣
民田淹沒大半復須賑濟所有見管義倉米斛數少乞

依去年例將諸縣湖田米就府送納應副賑糶從之八月二日臣僚言在法災傷及七分則賑濟貸給竊見州郡檢放自來統以一縣災傷紐算分数然一縣之中各鄉土壤高下不齊此熟彼凶有至相絕謂如一鄉災傷及十分若使統計一縣不及七分則遂不被惠乞自今紐算災傷分数各以逐鄉為率凡及七分以上並令依條施行從之十五日江西轉運司言本路旱傷乞將諸州軍椿管準納等米一十四萬餘石令知通認數減價賑糶從之十八日詔兩淮州縣今歲間有不熟處深慮民間闕食可令漕臣於逐路椿管米內各取撥二萬石以補救荒仍多方賑恤務令安業九月十九日臣僚言

賑濟賑糶其弊甚多若州縣無術舉而付之吏胥吏胥責之里正則侵剋詐欺無所不有幸而及民者鮮矣望詔監司凡發官廩付之土著寄居及上戶士人逐鄉分團抄劄饑民戶口各就傍近請米給糶務令實惠及民從之二十四日淮南運判趙彥逾言和州無為軍渡口有江浙等處流移人頗多已行下所指州縣路逐寺觀及空閑屋宇安存量給口食賑濟外緣本路今歲亦係旱傷去處方賑救不暇竊慮冬深流民益衆州縣不能贍給乞督責逐州守臣務加安集毋令流徙詔令臨安府寧國府徽嚴婺州守臣各行下諸縣將闕食人戶多方賑濟不管更有流徙仍令趙彥逾委所部守令加意

存恤毋致失所十一月十九日宰臣王淮等奏外路流
民頗多上曰可差館職已下官一兩人往按視賑濟遂
命秘書濟八分賑糶從瀘南去撫趙雄請也十年二月
八月詔四川總領所支錢引一萬道米五千石付潼川
運副張玘專用賑濟以玘言旱傷故也二十二日知潭
州李椿言去年本州諸縣緣闕雨旱傷乞下本路提舉
常平司措置倉米二萬石下本州從已降指揮賑濟從
之三月十二日右諫議大夫張大經言乞令兩淞江東
西漕司戒飭早陽州軍縣分措置賑恤毋令流徙從之
六月四日詔臨安府富陽縣及嚴婺州遭水處可於常
平錢米內給借種糧九月十五日詔江西提舉司於隣

州支米二萬石付興國軍充賑濟賑糶從安撫程叔達
請也十二月十五日詔建康府於見椿管糶還米內支
撥一萬九千石委本路帥漕提舉司通融應副本州賑
濟務要實惠及民從帥臣漕司請也十一年正月十一
日朔西提舉劉穎權知鎮江府耿秉言被旨同共措置
鎮江府丹徒丹陽縣賑糶事臣等今措置於提舉司取
撥義倉米三千七百二十六石六斗令本府照先來散
給次第接續更行賑濟兩月底可接新不致人戶闕食
欲那撥官錢收糶新米依市價出糶一則可以抑定米
價二則中下之家皆可收糶詢訪鄉民皆稱利便提舉
司令撥錢一萬貫文付鎮江府同本府那移錢委官於

比近豐熟處糶米四萬石從本府分給兩縣只依原價
出糶若其米出糶通快拘收價錢循環作本收糶將來
委是可以接濟鄉民食用從之二十一日知江陵府荆
湖北路宣撫使沂國公趙雄言荆門軍運遭災傷細民
闕食本軍關米支遣官兵俸糧照得十年五月八日指
揮令荆門軍將糶還淳熙九年分借撥賑糶米二千石
認數椿管非奉朝廷指揮不得擅行交使認令荆門軍
將前項見椿管米二千石借充賑糶并俸糧支遣候來
年秋成日依舊撥還二十三日湖廣總領蔡戡言知襄
陽府王卿月申本府今春播種中下人戶並無種糧臣
已逐急權借穀四萬石應副其借貸過穀並乞令知通

認數置籍候今年秋成日拘收新穀入府城椿管從之
二十七日知襄陽府王卿月言本府今歲旱傷米價騰
貴民間闕食乞於本府見管椿積米內更賜支撥米六
七千石以充賑糶賑濟詔令王卿月更於本府見椿管
米內借撥五千石專充賑糶支用仰將逐項糶到價錢
並行椿管却於秋成糶還二月十四日詔金州洵陽上
津兩縣闕食民戶令利州路提刑勾躍行下所委官同
金州知通等措置存恤務要實惠及民毋致流移失所
六月二十二日詔諸路轉運司行下所部州軍自今年
為始得逐色稻種並每歲約度措置糶買椿管準備人
戶欠闕支借十月十六日中書門下省言廣東諸郡聞

有因夏旱早米薄收米價翔踴去處詔本路漕臣提舉
官各將所部內似此郡縣鄉村措置賑糴毋致闕食
十二年正月二十四日福建安撫使趙汝愚言福泉等
州旱甚重詢問得廣東潮梅循州江西贛州建昌軍去
歲亦甚旱米價甚貴汀漳數縣正與三路相連其地皆
深山窮谷平時固多盜賊實為可憂乞下三路轉運提
舉司寬逐郡財賦仍多方賑運米斛責委守令措置
賑給如措置乖方致有盜賊竊發守令乞先次取旨責
罰其有奉行如法能使一方之民不至失所許令逐司
公共保奏特與推賞詔檢坐已降指揮劄下趙汝愚照
會施行如逐路守令奉行不虔仰本路安撫轉運提舉

司公共覺察按劾以聞二月四日權發遣興元府張志
言本路金洋州興元府去年關雨竊慮今春合行賑濟
一金州已將常平司銀二萬兩糴米錢五千六百餘道
制置司錢二千二百道收糴斛斗通常平義倉見在并
總領所發到椿積斛斗三萬二千餘石可足用外尚餘
錢六千七百三十餘道銀二十二兩有零一洋州見在
常平斛斗不多已移文利州路常平司將金州餘在錢
銀補洋州之不足又於本司那撥錢引一千五百道送
洋州收糴準備賑濟興元府自今物價甚平亦無流徙
之人見行措置錢米準備賑濟詔依仍行下遂州府各
將賑濟斛斗務要實惠及民不致闕食

十三年十二

月二十二日詔右司員外郎京鏜同臨安府通判應藏
密依已降指揮於封樁庫豐儲倉支撥錢米將城內外
貧乏老疾之人措置計口賑濟候韓彥質歸府一就同
共給散既而知臨安府韓彥質等言奉旨賑濟細民令
京鏜同應藏密候韓彥質歸府一就同共給散今措置
欲以二十萬人為率將所委官當日抄劄到貧乏老疾
之家人口每名先支錢四百文米二斗計錢八萬貫米
四萬石候抄劄盡絕將散不盡錢米再行均給從之
十四年正月二十一日詔訪聞金洋及關外四州緣去
秋雨水頗併今歲艱食可令四川總領所於逐州樁積
米內各借一萬石共六萬石撥隸利州路提刑廉提舉

張縝躬親前去措置貸濟如將來有支使不盡之數即
逐一具奏却發還總領所依元稟名椿管其已用數目
候豐熟日仰提舉司以常平錢糴買補填務要實惠及
民毋致流徙二十二日兵部侍郎兼知臨安府韓彥質
言恭奉聖旨支降錢一十萬貫米五萬石令臣同京鏜
等措置賑濟實係貧乏老病之人已具奏開每口支錢
四百文米二斗分委府官及差人吏遍於城內外巡門
抄割及別委官俵散唯是城外南北兩廂地分極闊遠
貧乏之家甚多今欲於本府有管錢米內支撥接續俵
散賑濟從之七月十七日浙西提舉羅點言本路惟秀
州旱勢最甚海鹽崇德漸有流徙已下本州措置安集

照得已起和糴米數內第十綱正耗米二萬一千石已
差官押發前去綠河港乾淺舟船不前在彼擺泊至今
二十來日尚未起發綱稍逐日侵耗必致折閱除已拘
回上件第十綱米前來平江府和糴場椿管乞賜行下
併與截留準備將來充賑恤支用詔依於內取撥二萬
石委官同秀州措置賑恤務實及貧民毋致流徙十九
日臣僚言今歲兩浙路間有旱傷州縣深恐貧乏下民
或致闕食乞令戶部檢坐賞格許官民戶赴官輸米以
備賑濟仍專委知通認數令項椿管却申朝廷差官同
共盤量如無欠少保奏推賞更不經由諸司及戶部司
農寺之類免致迂枉費用其人戶賑糴委艱稽考乞令

州縣徑自措置聽從民便不在推賞之限詔令戶部條具申尚書省本部條具如后一乞下兩浙路諸州軍仰從今來奏請施行并本部行下仍約束不得於路外摘例泛濫一數內官民戶輸米在官乞申朝廷差官同共盤量如無欠少保奏推賞更不經由諸司等處竊詳上件米斛準備應副緩急賑濟支用務要實數在官今乞下本處遇有官民戶納到米斛徑申朝廷差官同共盤量如無欠少保奏推賞一本部條具如遇官民戶納到米斛數目委自知通認數令項椿管湏管別置教眼分明排立字號盛貯以備賑濟支用不得擅自妄行支借移易務要實惠及民仍每季具見椿管無侵移數目中

尚書省如遇災傷去處若官司賑濟不敷仰本軍將已
納在官米斛先次取撥賑濟闕食民戶具取撥數日報
提舉司委官檢察庶幾不致闕悞如遇賑濟有合約束
事件並乞依前項節次已降指揮從之同日荆東提舉
田渭言紹興婺台處四州為旱特甚明衢旱損抑又次
焉許旱之人千百為群常平義倉所存無幾儻不為備
則來年春夏必有流離乞丐棄死溝壑之患乞檢會近
年荆東常平提舉官朱熹所乞賑濟錢米數目斟酌給
賜詔令常平司依條難濟將來少闕計申取指揮於州
軍見椿管米內支撥二十五日詔支豐儲倉椿管米二
萬石付荆東提舉司同紹興府措置於鄉村賑濟賑糶

務要周及貧民毋致失所以紹興府早從本路提舉田
渭請也八月二十五日臣僚言竊惟荒年饑歲發倉廩
以賑貧民雖不可緩然有賑濟賑糶鰥寡孤獨而不能
自存者予之可也非鰥寡孤獨而可以存豈能人人而
予之哉故賑糶者救荒之中制也曩者見知湖州向均
踰賑糶之法當先計其一縣幾鄉一鄉幾村一村幾里
於各鄉村酌道理遠近之中而因其地之有僧寺有道
觀有店鋪而為賑糶之所大率不出數里而為一所限
其界至擇各處僧道與富民之忠實可倚伏者每處三
二人而主其事凡數里之內所謂貧不能自食之人使
主事者括其數而卅為計數支給米立價直就委之賑

糶人日食米二升小兒一升各給印曆一道就令支請
狀批鑿每次總計米若干度可為旬日之用逐旋將以
糶錢還官復給米若干周流不已往來舟軍與收支錢
米並不入胥吏保正之手使各任其責而多予其舟車
顧人工食之費官為各書其本處貧不能自食者姓名
若干人牒於其所而使其人於此而取食焉又分委本
處鄉官與見在官者往來機察嚴其實罰所謂寺觀與
夫富民店鋪既任其責而視其不能自食者皆其隣里
與平日之所素習者也故抄括之際有所隱而不患乎
不盡授給之際不敢有所利而不患乎不及儻抄括有
不盡授給有不及其必與主事終身為仇故利害相關

不敢不盡心而人得以受賜其與付之胥吏保正之手
乍出乍入騷擾乾沒者萬萬不俾深山窮谷之民自然
無有不被實惠者此前人之所已行矣其法或可為今
日之用乞劄下兩淞江東西淮西湖北帥漕及常平提
舉官行下各處所部州縣做此斟酌施行詔劄下諸路
帥漕司各行下所部州縣專委守令恪意奉行如敢違
戾覺察按劾十一月十八日臨安府言監登聞鼓院張
澈等申措置本府賑錢塘等九縣旱傷比較今年輕重
支撥米斛賑給饑民緣今年諸縣置場遂旋起糶官米
難以令鰥寡孤獨貧病不能自存之人反未得被朝廷
賑救之賜詔令豐儲而倉先次撥米一萬石付臨安府

專充旱傷縣分賑濟十二月十七日兩制轉運副使趙
不流等言承省劄據本路州軍奏請荒政事件詔令臣
等審度聞奏數內一項嚴州乞撥錢六萬貫文發下本
州充六縣接續賑濟等事照得嚴州今歲旱傷嚴重提
舉司近撥米一萬石湊本州所管常平義倉米共一萬
五千石準備糶濟續據本州申從來體例止是將錢責
付上戶自備舟船於豐熟去處運米出糶循環作本今
來若令泝流般運水脚費重止乞撥米五千石其餘却
乞撥錢提舉司已撥錢二萬貫及就平江府撥米五千
石通本州所管共一萬五百石今來所乞量行走備發
下本州守臣責令交管措置運米接濟出糶候將來荒

政結局日令本州盡數拘納發還元措去處詔令封樁
庫借撥樁管會子二萬貫餘依十五年正月二十九
日詔建康府將所糴樁管米取撥二萬石賑濟貧民以
本府諸縣旱傷從守臣錢良臣請也六月十九日知臨
安府韓彥質言昨承指揮於豐儲倉借撥米一十一萬
石應副錢塘等九縣賑糴賑給饑民彥質遂與宗正寺
主簿張澈監文思院上界游九言面議斟量旱傷輕重
去處均撥米斛付諸縣官賑糴賑給今來諸縣申到昨
賑給月日保明自去秋至目下即無流移之人並已結
局詔韓彥質令學士院降詔獎諭張澈游九言各轉一
官十六年三月六日詔昨令濠州支樁管米五千石

賑糶本府去年被水土著及歸正主客戶尚慮逐色人
闕錢收糶可特改作賑濟六月十一日詔臨安府城內
外細民理宜存恤可令封樁庫支見錢二十三萬貫委
守臣將貧乏老疾之人措置賑給大人每名一貫小兒
伍伯仍委官巡門俵散先有旨支二十萬貫於是張杓
等言在城九廂城南城北兩廂共抄割到二十六萬八
千餘口及養濟兩院并逐處病坊雖在耆界亦宜賑給
計用二十三萬貫文除已降數外尚欠三萬貫乞行撥
數給散從之同日廣東運判管鑑言廣南小官流落狼
狽亡歿官貧之家饑寒無依廣州根刷已百餘口其他
州縣率皆有之淳熙十四年九月二日指揮拘沒官田

產估賣廣州拘到沒官田本司依價收買拘收租課專
一椿管充前項賑給并於廣州城內拘建廣安宅一所
約可住五十餘家應亡歿官負許令從便前來居止在
外計口日給願還鄉亦量給其歸尚慮來者不絕大可
憐憫照得廣州尚有淳熙十四年九月二日以前拘到
戶絕沒官田產無人承買每年紐計租米七百六十三
石一斗四升一合租錢九百四十四貫七百七十八文
係在承準截日出賣指揮之前見係人戶租佃合助常
平賑濟之用乞許將二件撥付本司添撥所買官田租
課永充前件支用庶幾落南仕族存歿被惠從之十一
月十八日詔四川總領所於階成西和鳳州椿積陳次

物斛內各借一萬石撥隸利州路運司準備將來貸濟
關食人戶以利州運判兼提舉宋運請也十二月八日
宰執進呈知温州湯碩言虫傷田稼乞令本州措置賑
給上曰今歲雖所至豐稔然四方之廣豈能一一皆同
既有損傷去處便當隨宜賑恤於是詔浙東提舉司將
温州災傷縣分關食人戶更加存恤毋致失所流移
紹熙元年七月七日權利州路提刑朱致知言階成西
和鳳州最係極邊連年災傷賑濟其所管常平錢斛自
今年賑濟之後已是支遣盡絕乞預行措置收糴斛斗
專一準備緩急貸濟支用詔四川總領所更切契勘如
將來委有欠少即於遂州見積陳次物料內更加斟

量借撥卅致闕悞十月二日詔四川總領所將階成西
和鳳州借貸過斛斗均作二年理還十四日夔路提舉
常平楊虞仲言本路亢旱細民闕食乞於隣路有備去
處共借撥三四萬石詔四川制置司總領所公共詳所
奏事理於隣近有米去處措置借撥以備賑濟支用卅
致闕食如見得合行賑濟仰虞仲將今來所借米斛一
面措置賑濟施行二年正月四川總領所於閬州雅買
場內支撥三萬石應副賑濟二年二月六日詔近日雪
寒細民不易可令豐儲倉支米五萬石令戶部同臨安
府守臣措置將城內外委係貧乏老疾之人計口賑濟
務要實惠及民具已賑濟人數聞奏三月二十二日詔

新州於見椿管米數內取撥一萬石措置接濟賑糶務
在實惠及民其糶到價錢拘收令項椿管不得移易別
用俟令歲秋成日依元數收糶仍舊認數椿管以新州
去歲旱傷從守臣請也五月二十一日四川制置司言
夔路重慶府等州去處旱傷目今青黃未接民戶乏食
遂將本司已運過米并岳霖糶到米忠浩等州本司賑
濟米通總令所米計五萬一千六百餘石并令遂州充
賑濟支用從之十一月二十七日南郊赦西北歸正歸
朝民庶不忘祖宗德澤遠來內有老弱孤貧無依倚不
能自存之人仰州縣覈實保明申常平司取見諸實特
與賑濟一年十二月二十四日知楊州錢之望言本路

旱傷民戶已自乏食賑糶誠不可緩乞就淮東諸州軍
見管朝廷椿積米內先次借撥一十萬石又言訪聞見
用鐵錢內有破缺并私錢艱於行使詔淮東帥漕司量
度糶糶去處所附近州縣椿管米內取撥一十萬石專
充賑糶以之望言破缺私錢艱於行使乞念疲民將賑
糶米每升並作二十文足不問官錢私錢衆同交受伏
準十二月十日詔支撥鎮江府陳次米十五萬石令淮
東轉運提舉司日下般取每石計破缺錢及私錢一貫
四百文足收換又乞已降指揮分撥鎮江府椿管陳次
米一十五萬石付本路轉運提舉司收換破缺及私錢
每升十四文足乞自朝廷明降指揮令轉運提舉司措

置分撥本路八郡應別州縣城邑居民每日計糴仍逐戶給憑由許將私錢及破缺計口糴米以防多糴不均之弊既可以換私錢又可以寓賑恤實為不費之惠從之又十二月十七日詔令淮東安撫前去鎮江府更取撥陳次米一萬石出糴施行二十八日四川制置司言本司訪聞簡資善榮州富順監今年旱傷簡州尤甚今將稅米與第五等人戶盡行放免上中等人戶減半催理兼本司再同轉運常平共撥錢引於豐熟處乘時收糴準備將來賑糴又資善善州及富順監亦合預行措置今輟那分撥赴逐州收糴詔依已行事理仍仰制置司行下逐路轉運常平司通一路錢米多方措置賑

恤卹致民戶流移失所 三年正月四日詔淮南運判
趙師聿於真州軍糧等倉陳次米內支撥五萬石改充
賑濟却令淮東安撫轉運司於本路椿管米內支五萬
石專充賑糶先是師聿言本路今歲災傷雖蒙朝廷撥
降米一十萬石賑糶緣尚有半年不敷乞更支撥一十
萬石賑糶賑濟故有是命二月十九日詔淮東提舉張
濟於本路州軍椿管馬料稻內斟量取撥二萬石借貸
人戶作種俟秋成日拘還數足依舊椿管四月十三日
四川制置使京鏜言去秋成都潼川兩路資榮善叙簡
隆富順等七處歉歲艱食已措置賑濟資榮二州旱荒
尤甚乞將二州租賦盡免仍照去年奏乞度牒四百道

旱賜頒降及賣糴米以為四路日後水旱之備詔禮部
給度牒一百道前去四川制置司交割仰本司均撥付
旱傷州軍變轉錢專充糴米賑濟仍先次措置許令人
戶納米請買出給公據候度牒到日即行給付仍令總
領所於近便有管米內納融應副七月二十九日詔江
東提刑提舉司行下廣德軍寧國府徽州池州將被水
之家更切賑濟優與存恤從本路兩司所請也十一月
三日知襄陽府張杓言本府係居極邊殊無儲蓄入秋
江漲居民陸種盡被水傷本府逐歲所仰皆自江陵荆
門復州等處販販前來遂至在市無米今常出糴已盡
深慮邊民乏食詔許於見管粳粟米內借撥八千石充

賑糶二千石充賑濟 四年二月二十九日知江陵府
章森言本府江漢二水暴漲非時下田恐被淹侵常平
不過一萬三千餘石趙雄任內糶到椿管米見在計一
十五萬餘石許令新陳兌易散米賑濟所當舉行詔江
陵府於椿管米內取撥七萬石將四萬石充賑濟之用
三萬石賑糶其糶到價錢候秋成日一併糶還依舊椿
管三月二十五日詔廬州椿管稻內借支五萬石應副
本州關食人戶以守臣高夢請也六月十九日詔四川
制置司總領所各行下逐路早傷州軍多方賑恤毋令
失所如旱荒州軍有未催稅賦及公私債負與權行倚
閭候豐熟日帶還務要實惠及民如有流移其當職官

吏重作施行八月十二日詔逐路安撫轉運提舉司如
實有旱傷州縣許勸諭官民戶有米之家赴官輸米以
備賑濟委知通交量認數椿管相度荒歉輕重中取朝
廷指揮方許支撥其出米及格人仰逐司保奏依立定
格目推賞施行不得科抑從都省檢會也十九日御筆
諸道郡縣類有水旱去處理宜拯恤三省條畫以聞仍
行下監司守臣令疾速各具賑拯之方務使實惠及民
毋徒為文具朕將考其殿最以示勸懲二十四日詔禮
部各給降度牒一百道下江東浙東提舉司每道價錢
作八百貫令兩司措置出賣人戶願輸米依市價入中
請買度牒者聽其賣到價錢循還作專一糴米計量州

縣旱傷輕重分撥糶濟從兩路提舉陳士楚李謙請也
同日詔禮部給降度牒一百道下淮西提舉司仍於舒
州椿管米內支撥二萬石斟量州縣旱傷輕重分撥糶
濟從提舉張同之請也二十八日知信州石畫問言今
年本州大旱田損七分委是狼狽乞於隣郡上供米肉
截撥四萬石以助軍糧仍乞從朝廷支借會子五萬貫
以備月支及裨助荒政詔封椿庫借撥椿管會子二萬
貫豐熟逐旋補還十月十五日詔廣德軍將元管湖秀
州賑糶米一萬一千四百九十七石賑糶接濟廣德建
平兩縣饑民其糶到價錢提舉司督令別項椿管候豐
熟日仍舊收糶補還從江東提舉陳士楚言也十二月

十三日詔江西轉運司於淳熙十三年漕臣王回和糴
米內取撥七萬石賑糴本路被傷饑民從本路漕司請
也十八日知江陵府王蘭言本府去年災傷蒙朝廷撥
米四萬石內將一萬石賑濟三萬石賑糴乞將所撥米
從去年例於內撥一萬石專充賑濟從之二十四日詔
淮西轉運司見椿管鐵錢交子內共支撥三萬貫專充
賑濟使用仍下江東西兩浙路監司及諸州軍各遵守
前項已降指揮不管違戾從淮西提舉張同之言也
五年二月十一日詔於建康府太平州椿管米內各取
撥四萬石斟量逐州旱傷輕重分撥專委守臣措置賑
糴從江東提舉陳士楚請也十四日詔禮部給降度牒

三十道付江州每道價錢作八百貫措置出賣收糴米
斛專充賑濟支用候秋成日計賣過度牒價錢起赴封
樁庫送納從守臣沈祖德請也二十五日詔信州於上
供米內截贖一萬石專充賑濟使用五年七月七日
登極赦支辰邵州僇人昨因饑荒輒入省地作過已據
湖南北諸司見行招捕竊慮省地居民逃避未盡歸業
并人戶因官司調發般運錢糧守把關隘或致耕種失
時荒廢田土雖已賑恤尚慮未能週遍可令逐路監司
委州縣更加審實厚加賑恤九月二十八日三省言已
降指揮災傷州縣第三等以下帶產戶將來無力耕種
者仰州縣覈實許結甲互保將常平米量行賑貸約米

年秋熟納還不得收息今來種麥是時竊恐小民無力耕種州縣不能體認矜恤之意是致借貸失時詔令兩湖兩淮路提舉司照應已降指揮應災傷去處將常平錢措置收糴麥種并給降米斛疾速賑貸施行毋致有失布種十月十二日中書門下省言兩湖州縣米價踴貴小民艱糴其巨室富家積米至多方且乘時射利開糴邀價甚非體國恤民之意乞下帥臣監司更切多方曉諭令巨室富家約度歲計食用之外交相勸勉將所餘米斛起價出糴或就在城自占地分置場或自占某縣或自占某鄉或占幾郡幾保置立場鋪隨時量減價直接濟細民官為機察數目大槩但能使所占之地百

姓安業無流離饑殍候及食新之日許帥臣監司守臣保明申奏次第推賞其出米最多濟民最衆特與優加旌擢風示天下如豪右之家產業豐厚素有藏積不遵勸諭故行閉糴者並令覈實奏聞嚴行責罰仍度其歲計之餘監勒出糴其州縣不恤鄰境逼糴自便者亦仰監司帥臣按劾以聞重寘典憲從之閏十月十三日准西提舉張同之言本路連遭荒歉民負已甚今年被害尤酷近來雨水連綿得熟未稼又多傷損若不優加存恤必致饑寒所迫乞將關食之家分三等抄割糴濟於本路椿管上供鐵錢或交子換到鐵錢内科撥五六萬緡計量州縣旱傷輕重均撥責付守臣曉示不熟地分

有稅產之家結甲赴官借支施行如借錢納米鈐束官
吏關防詭名等弊臣當纖悉措置無容乖戾詔權撥錢
五萬貫餘依二十一日臣僚言兩浙兩淮災傷卅軍各
已節次給降米斛錢會交子官告度牒分撥下州縣措
置賑糶賑濟及貼助支遣尚慮州縣奉行不虔稽緩雨
莽以致虛壞官物小民不霑實惠乞下州縣將所給降
及轉變到錢米內元許貼助本州支遣之數用以接續
官兵按月糧給不得輒作其他費用所是糶濟之數將
日前諸縣申到分數為準合以十分為率八九分賑糶
一二分賑濟其賑糶之米以目今價直量行減價不得
大段虧折元錢仍以所糶到錢逐旋差人於得熟地分

收糶米斛或招接客販前來再糶不得稍有乏絕如官
米大段陳次亦抑將在市價斟量裁減取令斂散可繼
不得以小惠沽譽却致無以接續仍多方安集毋致流
移其州縣措置失當監司常切覺察隨宜改更務令合
理其官吏弛慢致有流離殍死處即行按劾仍速委
官權管毋令失所以稱朝廷優恤之意從之慶元元
年正月十五日權工部侍郎兼知臨安府徐誼言今歲
淮淝水旱流離之民漸集市廛其勢不可不養恐萬廩
疾癘老孤幼無所依倚而不能自存者皆當次第料理
願陛下以聖意推而行之詔令臨安府於見賑糶米內
取撥二千石以備賑濟二十六日詔臨安府陰雨細民

不易令臨安府將見賑糶人戶特與賑濟五日以守臣
徐誼言臨安諸縣自昌化得熟之外其餘八邑俱被水
災目今雖蒙降米斛減價賑糶饑民無錢收糶至有糶
糠不充憔悴骨立瀕於死者甚衆畿邑之內均為陛下
赤子當此荒歉其惠愛理宜均一乞將管下八邑見今
賑糶者與府界之民一體賑濟五日庶得人戶俱被上
恩有以見陛下加惠京邑一視同仁之意從之二月三
日詔令內藏庫支錢一萬貫豐儲倉更支米三千石付
臨安守臣徐誼措置給貧病之民務要實惠均濟十一
日臣僚言朝廷荒政有三一曰賑糶二曰賑貸三曰賑
濟雖均為救荒而其法各不同市井宜賑糶鄉村宜賑

貸買乏不能自存者宜賑濟若漫而行之必有所不可
行官司徒費而惠不及民竊觀歉歲穀價翔踴多緣市
井牙儈與停積之家觀望過糶增價以困吾民而賑糶
亦不官米若能勸諭拘集牙儈鋪戶米官為置場差人
管幹隨市價出糶或有客販及鄉村步擔米則官出錢
在場循環收糶一從民便糶米更不給曆過市上大段
減少然後出官米亦以市價量減三二文糶之使市上
常有米米價自平官米既從市價所減不多庶民無所
牟利而詭名給曆之弊自無此賑糶之法也賑貸自來
官司常惠民間不能償而失陷每都各請忠信有物力
材幹上戶二名先令機察都內闕食主戶勸諭鄰里有

蓄積之家接濟秋熟依鄉例出息倍還若不能徧即令結甲具狀赴官借貸仍令所請管幹上戶保明縣照簿稅量其產業多寡與之若客戶則令主戶與借自行給散至秋熟則令甲頭催納所借既有產業人又有上戶保明甲頭催理安得失陷縱有貧者不能盡納計亦不多此賑貸之法也賑濟則戶口頗眾不惟不能徧及尋常官吏多與上戶為姦弊虛作支破入已而貧民下戶初不及縱欲稽察而人戶已流移亦無可詢究今鄉村既行賑貸上戶有米無緣更求官司借貸村落下戶既有借貸自不須賑濟所合賑濟者鰥寡孤獨不能自存之人抄劄既有定數則紐計合用米分作料次發下

所請管幹上戶處令積聚寺觀給曆五日一給散分明
批曆都分雖多所給必同日以防兩處打請如此則賑
濟用米不多官吏亦無緣作弊而虛破官米此賑濟之
法也是三者其用意最為詳密周備簡便易行但前此
官司習而不察每至歉歲不過賑糶賑濟姦弊百出既
不能禁且徒費官米而惠不及民或高價以招米減價
以平糶或為粥以餉饑餓或興造以賑貧乏皆非計之
得詔令逐路帥臣監司隨宜措置四月二十六日詔內
藏庫支錢二萬貫付臨安府給散貧病之家醫藥棺斂
錢竊恐止據所降錢給散不能偏及可更切相度如或
支散不敷速具聞奏更當接續支降務在均濟六月十

日又詔疾疫未及更於內藏庫支撥錢一萬貫接續支
散二年十二月二十五日諫議大夫兼侍講劉德秀言
往者浙東水旱朝廷頒降賑濟錢米若度牒共為緡數
十萬適監司有好名者悉以予輕儇浮偽之人使之分
頭賑濟往往虛作名色支給其實掩為己有間有支給
則又姦弊百端或盡已與私家之僕佃而不及他人或
任喜市恩則雖中人自給之家亦使之源源得請或肆
怨仇則雖饑窮瀕死無告之人不需一錢一米之惠虛
負朝廷無補事實說者至今寃之臣恐今者復蹈前轍
乞下浙東常平司并被水諸郡守臣其所差賑濟鄉官
擇老成確實居官有廉明之稱在鄉有公平之譽者然

後分委毋使輕儇浮誕之徒攘臂其間必欲干與以濟
已私如郡守有違許監司按劾如監司黨庇許御史臺
糾舉併與坐罪如此庶幾朝廷不致虛費饑民得寔實
惠從之 四年正月十一日權利州路提刑兼提舉霍
麓言本路關兩間有旱傷不等去處已措置發運錢斛
條畫糴給借貸準備賑救外今來蓬閬兩州旱傷良重
饑民數多本司已遵從常平條令通融一路錢物移那
別州常平斛斗五千石并支銀五千五百兩及用常平
錢銀指置收糴兌買米斛共四千二百餘石準備貸濟
尚恐未能敷及其諸州所管錢斛各是不多萬一水旱
荐饑必致闕誤乞下禮部給降度牒二百道付本司出

賣拘收價錢分送遂州收糶米斛椿管準備不測賑濟
支用如將來歲或豐稔別無支遣即與遂州令項椿管
別聽指揮施行詔令禮部給降度牒三十道付本司仍
具糶到米數申尚書省五年五月十七日詔臨安府守
臣支給常平錢米日下差官抄劄城內外實係貧乏老
病及在旅店病患關食之人量行賑濟六年八月十九
日詔令鎮江府於轉般倉椿管陳次米內借撥七萬石
內三萬石專充賑濟四萬石充賑糶其糶到錢即便措
置循環糶糶不得有虧元數俟糶濟畢日申取朝廷指
揮以本府言管屬三縣土薄民貧歲無積穀故降是詔
同日詔令建康府於賑糶椿管米內借撥十萬石專充

賑糶其糶到錢即便措置循環糶糶不得有虧元數候
賑糶畢日申取朝廷指揮以本府言謂縣旱傷最甚故
降是詔十月十五日淮東提舉高子溶言所部揚楚等
處旱傷本路運司有收糶到朝廷椿積米在諸州軍椿
預乞借撥二十萬石應副本司分撥賑糶等詔於內借
撥十五萬石應副賑糶使用將糶到價錢令項椿管候
來歲秋成依數收糶補還不得有虧元數又詔於內將
五萬石改充賑濟嘉泰四年三月二十五日詔令江西
轉運司於逐處椿管米內取撥撫州一萬石臨江軍一
萬石隆興府二千石袁州一千石同提舉司委官多方
措置以七分賑糶三分賑濟務要實惠及民毋令流移

失所仍具已賑糶賑濟并糶價錢數目申尚書省以江
西提舉司申本路去歲多有旱傷去處常平米斛不足
接濟故也二十七日知撫州陳蕃壽言本州土瘠民貧
秋苗之數不多去早歉抄劄到三萬九千戶計一十八
萬五千六百九十口有產業無經營人賑貸無產業有
經營人賑糶無產業無經營及鰥寡孤獨之人賑濟賑
貸之米則取諸常平司賑糶之米則勸諭上戶惟是賑
濟非勸諭之所及常平米數又少乞於本州今歲合發
淮西總領所米綱內截撥一萬石應副賑濟庶幾貧下
細民不為餓殍亦免流徙詔於本州今歲合發淮西總
領所米內截撥七千石賑濟使用 開禧元年十一月

十七日戶部言江西提舉司申權發遣臨江軍許開奏
次檄三縣令佐將所差措置賑濟等人每縣量其多寡
公共推排凡宣力而無過者與理當大小役色一次本
司照得臨江軍屬邑清江新淦新喻三縣管下每都稅
錢高者多不過十數戶小者但三四戶而已今來所差
監視賑濟皆都內稅高豪富之人今若許其免役未免
祇是中產下戶專一承役於事體亦恐未便今相度欲
從本州銓量將監視姦有心力之人其間是士人未嘗
請舉即給學職文帖稅戶補充攝助教各人得此可以
贖公罪杖至於官戶及請舉士人之家如遇臨役之際
許免役兩月從之 二年正月十一日詔雪寒細民不

易可於豐儲倉支米五萬石令臨安府守臣措置將城
內外委係貧乏老疾之人計口賑濟務要實惠及民具
已賑濟人數聞奏仍令尚書省給降黃榜曉諭十一月
二十五日樞密院言兩淮北來人已分撥州軍贍養外
當此寒月理宜存恤詔令鎮江平江建康府江陰廣德
軍嘉興府湖常衢婺信饒州守臣各仰體詔朝廷優卹
遠來之意常切躬親撫存仍措置穩便去處安泊無令
失所如見得實係貧病不能自存之人即仰除見給錢
米外於常平窠名內更與量行賑給務要實惠毋為文
具 三年五月二十三日江東提刑司言去歲南康軍
都昌縣十分全旱據都昌縣申本縣土瘠民貧連歲饑

僅民不聊生非廣行賑濟決無生全之理乞將建昌縣義倉米五千石聽本軍縣隨宜賑濟以救一縣垂死之命從之 嘉定元年十二月八日臣僚言都城近日糴價增長細民艱食嗷嗷然皆謂目今米斗一千未聞施惠之令乞令臨江府守臣以禮勸諭豪富蓄米之家稍預時價廣行賑糴宰執而下顧募僉人米數多者亦時斬裁損以備糴濟諸郡有閉糴去處從朝廷更加約束嚴作懲治庶幾客米日至方此隆冬若不早賜矜恤都民饑寒所迫非獨鬻妻賣子猶為續食深慮疫癘因之死亡乞賜施行從之十八日詔令封樁庫支降會子二千貫豐儲倉撥米二千石專充賑給流民支用以臨安

府言見存淮淠州軍流民共五百六十戶計二千八十
一人在府城內外客店及分撥寺院安泊自十二月二
十一日以後每大人日支錢一十文米一升申乞量賜
支撥錢米應副本府急關給散故有是詔 二年二月
三日右武大夫忠州團練使裴良傑竊見來直翔踴民
方艱食輒以米五千石少助朝廷賑濟乞割下拘收詔
令將所獻米赴豐儲倉交納四月四日臨安府言江淠
流民八百五十戶計三千六百七十六人津發回歸本
貫復業所有淮民更與賑給錢米兩月津發江淠流民
合用錢九百九十一貫三百七十五文米九十九石一
斗賑給淮民兩月用錢二千三百三十二貫九百八十

文米一千七百九十六石四斗乞割下豐樁庫豐儲倉
照數支降從之八日監行在登聞檢院陳孔碩等言承
降指揮置拘修合湯藥給散病民其間請藥之人類皆
細民一染疫氣即便廢業例皆乏食其間亦有得藥病
愈之後因出求起再以勞復病患委是可憫已具申朝
廷蒙給降會子二千貫米一千石降已措置支散外所
存不多又有增添患民必是支散不敷乞照元申盡數
給散錢米下局接續支散詔令封樁庫更支降會子三
千貫豐儲倉取撥米二千石接續支散毋得漏落泛濫
七月十二日起居郎兼國史院編修官竇鉉院檢討官
兼太子右諭德曾從龍言勸分一說實早備之先務夫

所謂勸者非可以勢力脅非可以空言論要必有術以誘之而後可出粟賑濟賞有常典多有者至命以官固足以示勸矣然應格需賞者無一二偏方小郡號為上戶者不過常產耳今不必盡責以賑濟但能隨其力之所及或出粟賑糶以平糶價或假貸蠲息以賑貧民庶而又一鄉狹而又一郡縣為之核實保明以申于州州申于常平司量其多寡而與之免役多者免一次少者一年或半年夫民之憚役甚於寇盜今既與之免役彼將欣然樂從而無難色此誘之之術也乞行下早歛州軍今後富民上戶有能賑糶賑貸者並令常平司與之斟酌免役庶幾官不失信而人皆樂從誠旱備之助也

從之十二月十四日臣僚言都城內外一問米價騰踊
錢幣不通閭閻細民餽粥不給為日已久今又值大雪
無從得食羸露形體行乞於市凍餓號呼僅存喘息繫
繫不絕閉門絕食枕藉而死不可勝數甚者路傍亦多
倒斃棄子於道莫有顧者乞將府城內外已抄割見賑
糶人戶特與改作賑濟半月其街市乞丐令臨安府支
給錢米責付暖堂日收房宿錢之類官為量行出備毋
復更於乞丐名下迫取其貧民死亡無棺襯者則從本
廟申府給棺襯錢埋葬至於遺棄嬰孩則月支錢米委
付收生婦人權與收養遂旋尋主申官分付如此則目
前凍餓之民均被陛下仁心感召和氣而豐稔之祥可

以必致矣從之

七年十月一日詔雨水連綿細民不

易可令封樁庫支撥官會子七萬貫令臨安府守臣措

置將城內外委係貧乏老疾之人計口賑給務要實惠

及民具已賑給過人數聞奏

八年七月十九日臣僚

言朝廷有賑荒之名而小民無拯濟之實者崇大體而

忽小節之過也謹條其三弊為陛下陳之一日差委之

弊蓋官之與民勢常扞格民之於吏每懷畏忌朝廷以

賑恤之政責之郡縣郡縣以賑恤之事付之吏胥此曹

貪欲無厭每藉此以規利豈能公心以為民加之州縣

之官視部民不啻秦越之肥瘠且以為浼已又何暇計

其實哉二曰括責之弊夫戶之貧富口之多寡雖有藉

而不足憑故欲行賑恤必先括其戶口以為據此數一定牢不可改至所當謹也然廂者保正習為吏胥巧取之弊每遇抄割肆為欺罔賂遺所至則資身之有策者可以為無業丁口之稀少者可以為眾多如其不然則啼饑號寒者反置而不錄老弱猥眾者僅指其二三不均不平莫甚於此三曰給散之弊夫邑有小大地有遠近惟委託得人措置有術則可使人需其惠近時任事者有贏餘之利無措置之術故先至者可得而後時者不復支地近者可得而窮僻者不及至彊壯者可得而羸弱者徒手而歸或雜以糲糶而精者則入於胥吏之家或減其升合而餘者則歸於里正之手計其散於民

者無幾而化為烏有者多矣乞行下諸路州縣應合賑
糶賑濟去處並仰痛革三弊務令實惠徧及如有奉行
鹵莽者令御史臺監司覺察以聞從之十月二十五日
湖南提舉司言本司昨緣本路州縣自今年三月以來
陰雨連綿細民艱於求越尋委官抄劄在域內外委的
貧乏不易賑食細民各支給常平米斛賑濟及下諸州
軍縣審度城市鄉村有無關米價直增長細民艱食去
處即約度支給常平義倉米斛委官措置接續賑糶抄
劄被水人戶計口大人日支一升小兒減半支給常平
米斛賑濟及委官置場照市直與減價錢賑糶拘收價
錢候秋成糶填元數詔令湖南提舉司更切多方賑恤

母欽失所十一月三日廣東提舉司言本司體訪西北
江州郡澇水泛浸居民屋宇竊慮闕食尋行下逐州府
被水泛浸去處如有闕食即照條於所管義倉米內支
給賑濟開具數目供申不得泛濫支破今來據英德府
封州德慶府韶州各狀申聞事詔令廣東提舉司更切
優加存恤母欽失所俟賑恤了畢具已賑恤過錢米數
目申 十二年十二月九日都省言歲晚嚴寒細民不
易合儀優恤詔令豐儲倉所於樁管米內支撥二萬石
赴臨安府日下分頭差官疾速抄割的實貧乏人戶即
遍置場賑濟五日務要實惠及民母得遲延容令吏胥
作弊候賑濟畢日開具帳狀供申 十三年四月二日

詔令封樁庫於見樁管會子內支撥一千五百二十貫
及下豐儲倉所支撥米七百三十石付臨安府充支過
見安養并收養津發兩淮民等使用以本府言自嘉定
十二年三月三日有兩淮流民節次到府逐差總轄使
臣審實到鄉貫戶口分撥寺院存著各以人丁大小日
支撥米食用并津遣元係嚴婺等州及本府屬縣人事
欲歸本貫之人及給養兩淮未願回歸之饑民與津遣
歸本貫復業之人其合用錢米乞發下本府應副給散
津發故有是命十二月十五日詔令封樁庫支降官會
六千三百四十五貫文充賑恤拆除蓬密屋見在浮鋪
經紀賣買人內橋道上下每鋪支錢十貫沿河墻下每

鋪文錢五貫其錢仰臨安府日下請領差請彊官逐一
躬親沿鋪喚集俵散世令吏卒減剋乞覓務要實惠及
民仍具所差官職位姓名及已散給文狀申尚書省先
是本府準省劄將城内外居民應搭蓋蓬簷及橋道上
下蓬屋浮鋪日下拆除仍將已除拆浮鋪屋賣買等人
開具申尚書省支給錢本優恤既而本府分委官吏逐
一告諭去拆條具來上故有是命 十六年正月九日
臣僚言江浙水災苗腐盈疇麥種不入無可糴之米則
當平價而與之糴無可糴之錢則當發粟以賑其饑苟
惟撥糴未多分場未廣不可無措置之方民未復業給
費易窮不可無拯贍之術乞申命攸司增撥米斛廣置

糴場隨民所便城郭則分隸坊隅不全冗遏鄉村則衆處遠近均利往來所給賑濟之米或一由半月計其日數先與併支免至奔走道途重為勞弊專委本路庾臣恪意奉行憲漕帥臣協心究畫逐郡選差官屬分往監臨稽違並須勅流移全總領漕司將被旱處民戶應輸官物依條檢放仍勸諭人戶歸業趁時布種如闕糧種官為借貸及於真州高郵軍各借草七萬五千束令漕司委官給付人戶飼養耕牛仍約束不得宰殺以淮南運判趙思言旱災之家無草飼牛往往出賣屠宰故有是命二十八日詔江西湖南近緣茶賊為擾可令逐路轉運司將人戶積欠官私債負並權住催內私債候來

春受理官欠具覈實數申取指揮及委官遍詣逐處審覈曾被浸擾人戶優加存恤無令失業仍覆實今春不曾布種今秋有失收刈田畝將今年合納秋稅與量輕重二面減放十月九日詔台州近因溪流泛漲漂浸居民可支義倉米賑濟其積欠糶米本錢并折帛錢絹自來年為始分限三年帶發至五年三月又以旱傷火災更展二年三年八月十一日詔近日陰雨連綿江西江東間有損壞堰壩及被水人戶可令逐路轉運常平司日下委官審實依條賑濟四年七月二十七日詔撫州寄居迪功郎新袁州萬載縣主簿段子雍以歲旱收養遺棄童幼二百二口後至食新並責還父母親屬可

將猶從政郎先是江西運判芮輝言鄉村僻遠去處遺棄小兒令州縣告諭保明根刷具名申官支給錢米撫養如一鄉一都之內保正能收養遺棄幾人需實惠懇歎不萌可以易災沴而為休祥從之十八日詔令淮東制置司日下於楚州樁管朝廷米內支撥一萬石仰本司疾速差撥人船逐旋運發前去海州措置賑濟山東關食人民務要均給具已取撥運發日時并賑濟過的實人數申樞密院從淮東制置司請也二月九日詔令楚州於樁管米內支撥一萬石付京東河北路鎮撫節制大使司措置賑濟山西關食人民務實均給具已差官職位姓名并賑濟過的實人數申尚書省從京東

河北鎮撫節制大使司之請也

惟照寧記乾道

神宗熙寧元年正月九日詔諸州軍每年春首令諸縣告示村耆徧行檢視應有暴露骸骨無主收認者並賜官錢埋瘞仍給酒饌酹祭 七月詔思冀州河決災令選官分詣各有淹死人口量大小賜錢其居處未安令官地搭蓋其宮觀廟宇宿泊內有淹沒活業貧下人戶令省部賜粟 四年三月十六日詔判水興軍郭達如本路州縣有飢荒處並以官廩賑濟仍依訪田統其逃亡人戶亦仰設法招誘還業以聞 六年十月二十八日詔熙河一路自用兵以來誅斬萬計遺骸暴露野可差勾當御藥院李舜舉往彼多方究尋如法收瘞仍於河岷二州特設祭酺作水陸齋會 七月五月六日中書門下言戶房中訪聞火傷路分募人工役多不顧先將合用夫數告亦以致飢民聚集却無合興工役欲乞下司農寺令逐路有合興工役並依所計工數曉示逐旋入役免致飢民遇有聚集以致失所從之 九年二月五日河北西路提刑司言那懷州連年火傷若令應副十分春天必難勝任欲乞特免免放一半從之 十月十二日中書門下言廣東經畧轉運使等言潮州海陽兩縣人戶被海潮漲推蕩居舍田苗死失人口乞令本路提刑司躬親前去依條存恤從之 元豐元年正月二十三日詔河北路權停折納為經水災賑草責也 七月二十七日詔

稅百錢以聽
權免一季十
月五日詔昨
岳州平江縣
民戶為虐遇
等
添焚虛上

河北轉運判官高鑄性濱州地界風雨損城及害稼處照管令京東轉運使司齊州章丘縣官吏如不救護預備致人被灾傷即劾罪以聞 八月十六日詔京東路轉運司齊州章丘縣被水第四等以下戶欠今夏秋稅權倚開常平苗役錢令提刑司展料次 二十八日詔濱州以三州被水灾令民貸請常平糧零販竹木魚果炭箔等物焚廬舍令孫頤牒所屬隨區數第給錢 二年二月十一日詔開濱州昨因灾傷至今民尚乏食其令提舉官孝季純存恤有合行事件訖以聞事体稍重者奏聽旨察知縣令不職者權封移 三月一日詔兩浙路灾重民員戶絕田產價錢者展半年輸官 三年八月十七日開封府言畿縣夏旱甚者十分其大不減七分已節次檢放今秋農有望而民力未充其殘欠租稅乞賜倚閣從之 九月二日權知都水監丞公事蘓液言河北京東兩路緣河決破患人戶蒙朝廷憂恤賑濟秋稅河平計錢銀七十二萬七千二百七貫碩有畸而靈津廟碑失費其實乞以其事付史館從之 四年二月二十九日詔開階成鳳岷州人戶關食流移令逃路第四等以下人戶借支常平糧斛每戶不得過兩碩仍免出息如有去年未納諸稅并諸般欠員等並權倚閣其有住諸處逃無帶與販物稅錢一百以下并經過河渡合納

官私渡錢處並令驗認免放 八月二日詔蠲河北東路灾傷州軍今年

夏科役錢 五年九月十四日詔聞開封府界漫水所至縣百姓有聚在

高阜不通往來致絕糧食者委劉仲熊乘駟遍詣有水縣規畫船棧運致

民戶安集於無水處齎載薪糧就給三日一具所濟人數尚書省 七年

六月二十六日知蔡州黃好謙言所部水灾甚特乞放稅詔尚書戶部速

施行 七月七日知河南府韓絳言伊洛暴漲衝注城中軍營欲望應被

水灾廂禁軍等第與特支錢及先脩軍營其水北軍民被害續奏請詔經

水灾民戶體量恤被水廂軍以差賜般移錢死者依漂溺民戶法給錢

九日詔尚書戶部員外郎張詢幹當御藥院劉惟簡賑濟西京被水灾軍

民并催督救護官物城壁等其合行事如有違碍從宜施行 同日河北

路轉運司言河水圍繞大名府城乞多差兵夫船棧救護詔遣金部員外

并亮采幹當御藥院梁從政往賑濟如西京指揮 九月十二日詔西京

被水漂溺之家及秋苗灾五分戶並免來年夏稅支移折變從戶部員外

郎張詢請也 十三日河北西路提點刑獄呂溫卿言霖雨為灾已行賑

濟欲乞坊郭戶沒溺財產比舊退落七分以積欠及秋料役錢並展限

至來年夏料其漂蕩家業者不候造簿年月先減免役錢以寬剩錢補助

尚書戶部言減放役錢欲擾家業物力之數於簿內改正其減沒錢候造簿日均數餘欲依溫卿所乞從之十月二十二日詔涇原路火死者男丁給絹七匹小兒五匹以本路經畧司言兩賊犯境燒柴草積民多火死者故有是命

哲宗元祐三年正月二十八日御史中丞胡宗愈侍御史觀進對太皇太后曰久陰不解雪寒甚民不易對曰陛下斥賣芻炭所以惠都民甚好唯河北被災傷猶須多方賑濟日已一一有指揮宗愈觀曰聞二聖焦勞上元禁中不曾用樂曰既不御樓亦未嘗燕會二月十二日詔給廣惠倉錢三萬緡及關額役兵錢糧衣賜募民應役以恤之十月二十四日詔災傷放稅及六分以下其帶納欠員即隨放稅外分數催納七分以上並行倚閣四年六月十八日資政殿學士知陳州胡宗愈言本州霖雨相繼河流泛漲今年夏稅遞展限一月從之五年四月二日詔府界諸路監司廳兩澤未足處人戶合催理係官欠員權住理納候豐熟日依舊以三省言自春以來時雨未足民間諸欠員未能償故也六年九月七日戶部言河東路助軍糧草支移不過三百里若非時急關亦聽相度展那仍不得過二百里本戶災傷五分以上仍免折支從之同日樞密院言

麟州界人常為西賊殺虜燒蕩屋舍者令紐客司人以老弱屋以多寡等第給賜錢絹或焚燬粮斛蹂踐田苗亦隨宜賑濟 八年四月二十六日詔近日在京軍民疾患難得醫藥可措置於太醫局選差醫人就班直軍營坊巷分認地分診治開封府即官提舉合藥并日支食錢於御前寄收封樁錢內等第支破候疾患稀少即罷 紹聖元年十月二十六日上諭輔臣曰河內流民寓寺觀及官廨者尚多雖已給券開諭今還本土就賑濟然宜申教有司曉便願南去者毋僅使北 十一月十一日左司諫張商英言知定州顧臨與走馬承受賈溫之謝晴北檄摘路傍禾穗豆角觀驗多不實知曲陽縣郭長卿以灾告請早求所以為備者聞深州武經縣民二千餘戶許灾臨輒却其牒詔河北東路提舉常平燕若古究實以聞 十二月十一日監察御史常安民言河朔流多民因郡縣承望轉運使張景先風旨遺新灾傷曲有阻抑使民無告詔河北西路提舉司體量詣寒以聞知深州吳安行坐不受民訴灾傷特銜替 二年三月四日詔河北東西路并京東路淄齊鄆濮濟州灾傷人戶催去年秋料錢零稅租並行倚閣 四月五日注原路經畧安撫司言本路被灾人戶已令逐州軍倚閣租稅逋欠從之仍原擅行之罪 三年四月十一日詔權倚閣陝西路

今年諸道員以轉運司言本路灾荒故也 四年五月九日左司諫郭知章言聞諸路灾臣常於秋夏之間以雨足歲豐為奏後灾歉遂不敢以聞伏望特降睿旨下諸路州軍嚴行約束雖已奏豐稔而或雖有非時水旱者並具灾傷上聞從之 元祐元年十月二十三日詔河北京東路州縣遭河漲淹溺人戶田廬多致失所令工部員外郎梁鑄体量應合賑卹及河勢利害以聞 三年三月二十三日徽宗已即位未改元詔以疾疫令太醫局差醫生分詣閭巷醫治 四月二十五日臣寮言伏聞去歲以來廣南灾瘍江西湖南年殺不登秦蜀苦飢河北被水陸下雖振發倉廩蠲除租賦所以頒恤甚厚尚慮被災州縣役軍民之力興土木之功望降睿旨灾傷路分除倉廩庫獄及官解寔有損壞以時繕修外餘不及之役權罷從之 八月四日詔諸路應歲賜藥錢處遇民疾時州縣委官監視醫人遍詣閭巷隨其脉給藥 十二月三日臣寮言河北濱等數州昨經河決連亘千里為之一空人民孱富沒溺死者不可勝計今年所在豐稔而此數州之民失業是以至今未甦不下三四百錢飢凍而死者相枕藉甚可哀也乞朝廷選即官乘傳同本路監司守令體量拯救從之 徽宗建中靖國元年八月二十一日臣寮言府界近京各有被旱蝗去處及江

淮兩浙福建路亦有旱災去處其監守郡守或不以聞或雖聞而不敢盡以實告州縣承望轉運司意旨不肯依法受任人戶訴狀望指揮諸路轉運司使應今後實有被災傷人戶並專責守今依法受訴提舉司依條檢察施行從之 崇寧元年四月二十八日兩浙轉運司言本路累歲災傷昨權住閑慢修造至今將欲限滿欲乞更展一年權住從之 七月二十一日詔開封府賑恤壓溺人不得由糴先是兩水填民廬有死者故申命之 二年七月九日詔府界諸路監司前去親詣蝗虫生發去處監督當職官多差人夫部押併手打撲本司及當職官並仰專在地分候打撲盡靜方得歸任人戶多方收打蝗虫赴官即時依條支給米穀如官司阻節許人戶經監司陳訴 十月十四日詔兩浙杭越溫婺等州秋苗不收人戶失於披訴官司憚於開放又將積年欠負一例併行催納致人戶漸至逃移賊盜滋多物價增長細民不易其官司並不申奏顯是提舉轉運司施設不職今奉路提刑司体量圖奏其積年租欠如是下戶災傷不以分數並令倚閣非災傷戶分作五料催科人戶失於披訴委是秋苗不熟並量與檢放其孤貧不濟戶仰提舉司廣行賑濟如物價增長即速以常平米平價出糴 十二月十四日詔戶部差官剗剗合出賣及無用故紙具

數關送開封府造紙襖過大寒置厝給散在京并府界無衣赤露之人每
年依此即不得將中用文字一例剗削 五年四月十六日詔蠲兩浙水
火人戶租稅 大觀二年三月三十日詔西京城內外日近庶民疾疫稍
多慮關醫藥有失治療宜下有司依近例疾速修合應病湯藥差使臣管
押醫人自三月末旬後於京城內外巡到里巷看診給散要極救疾苦仍
速施行又詔令大觀庫支錢一萬赴開封府令就差散樂使臣并逐廂地
分使臣每日量數支給應死亡貧乏不能葬者人給錢兩貫小兒一貫

八月十九日工部言邢州奏鉅鹿下埽大河水注鉅鹿縣本縣官私房屋
等盡被滄浸詔應今來被水漂溺身死人戶並官為埋葬每人支錢五貫
文買衣衾版木擇高阜去處安葬不得致有遺骸其見在人戶即依放稅
七分法賑濟施行如有孤遺及小兒並送側近居養院收養候有人認識
及長立十五歲聽從便內有人戶重被漂失屋宇或財物仍許依七分法
借貸不管却致失所仍具埋葬賑濟居養存恤次第事狀聞奏 三年六
月二十八日詔冀州宗齊鎮被水身死人戶並為官埋葬人支錢五千擇
高阜安葬不得致有遺骸其見在人戶却依放稅七分法賑濟孤遺及小
兒並送側近居養院收養候有人認識及長立十五歲聽從便內人戶並

被漂失屋宇或財物仍許依七分法借貸仍具已理奏賑濟居養存卹次第以聞仍仰本路提刑司各那官前去點檢賑恤務要均濟 九月六日詔東南路比開例有災傷斛斛踴責可下諸路監司仰依實檢放秋苗分數仍依條推行賑濟 十一月十二日詔東南諸路應今歲旱災地分人戶放稅及五分以上者本戶稅租苗役條限滿日特與展限一季支移者仰轉運司相度那融就近折變者量與寬減施行 十二月十六日詔秦鳳階成州災傷人戶稅賦已權行倚閣候至豐歲催理疾速施行 四年正月十八日詔聞福建去年夏秋少雨禾稻薄熟兼見行賑濟而浙並不通放米船過海深慮向去民食妨闕可指揮兩路放令福建販米海船從便販糴以補不足不得仍前阻節 政和五年正月二十三日詔戶部止諸縣災傷應被訴受狀而過時不收接者抑遏徒二年州及監司不覺察各減三等法從之 五月十二日詔二麥將成秋稼繼作深慮州縣不恤民情妄有科差如見均占役使者即時放散如有稽違帥臣監司按察三年正月二十日尚書省言檢會近降赦恩訪聞開德府清豐縣去年六月七日曾被旱傷人戶其間有不知條限致被訴不及可令所屬勘會詣案持與依檢放災傷人戶減免均糴指揮施行從之 十一月二十日詔

時雪苦寒道路阻滯常平倉米麥以糶合價錢二等出糶硬石炭每秤減價十錢 十二月六日詔以諸路時雪稍多道路艱阻貧寒細民於法不合居養之人如委實貧乏不能自存亦合權行存恤救濟令諸路提舉常平司更切多方存恤居養仍許不限人數支給米豆及仰逐司以常平米粟量行減價二分出糶 四年四月六日詔饒州南康軍知通並先次充替令歙州疾速取勘并本路提舉官令江東提刑司取勘並具案聞奏以江東久旱艱食並不陳請措置至是提舉司分所以下聞故有是命 六年二月十七日福建路提舉常平黃靜言建州蒲城知縣饒遇歲遇民飢能勸誘民戶賑糶乞加賞典詔遷一官 七月十九日淮南路轉運司言淮河水泛漲濠壽楚四河道與鄰近民田為一渰浸州城緣此斛斗不入細民不易淮東西州軍見樁管提舉司斛斗三十六萬餘石欲依元價出糶救濟被水細民從之 九月二日詔在都日近遭火被燒人戶見實官地屋與放貸直兩季 十一月三日詔兩浙州軍秋水害田物價翔踴以州鄰路粒米豐賤餼集未斛出界者以違御筆論 七年七月六日詔熙河環慶涇原地震旬日壞城壁樓櫓官私廬舍民覆溺死傷者衆宜速修治城壁朝廷給其費仍遣使撫恤軍民 十二月十六日詔河北西路提舉

常平官不奏本路災傷特降兩官銜替令本路提刑司具合降官姓名中
尚書省今後不即時聞奏重寘于法仍令刑部巡下諸路州軍并監司
時臣察上言河北自祁趙州以南至邢州磁相上下夏雨頻併各有災傷
詔令本路監司具析至是提舉常平官以聞故有是命 八年正月二十
四日詔河朔去歲災傷方行賑恤而修城買米運糧飛輓之役頗勞民力
其令當職官審度緩急可罷之或不可罷者條具以聞 五月二十一日
提舉常平官路常平等事王子獻言濟南府密沂濰徐兗州河北數州皆
水官司檢放不及七分外州流民稍稍入境移文逐處依法賑恤蓋其貸
者二十萬四百餘戶給者十萬八千六百餘戶羅者二十九萬五百餘石
實緣檢視災傷觀望顧畏不實不盡伏願詔州縣今後驗流民來堡寔有
莊帳每縣及百戶以上即申省部下所屬依法書元檢放官吏之罪從之
六月八日詔兩浙路自今夏霖雨連綿淹沒田不少平江尤甚已差趙
霖依舊兩浙提舉常平如有合行奏稟事件附入內內侍省遞以聞仍一
面多方措置護救民田淹沒過田苗人戶反支借過園田錢米等並仰括
青括論保明聞奏不管稍有流移失所 其後趙霖奏本路有未起今年
常平米一千餘萬石伏乞許與截留應副急切賑濟并轉運司見有合發

末限上供米數欲乞依知平江府應安道已得指揮權於浙西州縣先次
權發二十萬石應相兼應副候向去豐熟年分接續收羅撥運依如運以
大不恭論八月四日又詔平江府第四等以下人戶合納二稅并借過園
田常平錢物權行倚閣七月二十九日詔東南諸路山水暴漲至壞州
城人被漂溺不能奠居可差廉訪使者六員分行諸路檢舉常平災傷七
分法推行法所不載隨宜賑救訖奏仍許借諸司斛斗賑給或勸誘上戶
借貸仍多作船棹濟度及權以官物搭蓋屋宇廣令安泊其被溺之人並
官給棺殮監司郡守各協力賑恤無令失所有不盡心及一行官吏因而
撓動乞取並以違御革論同日鎮江府言自六月以來霖雨連綿渰沒
民田米價踴貴唯藉商旅與販斛斗接濟欲乞降旨應分熟去處輒有禁
止商販米穀及違法收納力升諸般阻節至乞依政和六年十一月三日
所降指揮從之八月二十五日詔江淮荆浙被水州軍漲水已遲殘潦
餘浸占田無藝民不得耕比屋摧圮無以奠居可令郡守令佐悉心賑救
監司雖非本職並許通行管幹分定州縣前去巡按具已救濟事件人數
奏監司郡守自今應水旱盜賊敢有隱敕不奏或不盡言並以違御革論
應興販竹木埭瓦蘆葦往被水處沿路不得收稅抽解及攔買阻滯仍行

賑濟 九月七日詔東南被水州縣民田雖有赴訴之限然阡陌漫沒州縣定驗失寔則貧民下戶臨時無告仰逐路監司行下所轄州縣當職官須管於收成之前躬親按覘毋得失實又詔曾經淹没人戶納官私房錢截自遷出日並特與免納候復業日依舊 十月二十日江南東西路廉訪使者徐衡言南康軍并管下建昌縣及江州并管下德安瑞昌縣興國軍坊郭舍屋被水滄漫沒屋脊人戶各已搬移除係自己屋業外其間賣官私廬舍居住人戶尚依舊管認元認房廊地基等錢欲下諸州軍路除彼滄月日特與放免從之仍詔餘依此計其寔日即不得虛偽通不得過一季 宣和元年正月二十七日永興軍路安撫使董正封言鄆縣災傷放稅不及分秋兩損田苗人戶缺食勘會見今修葺永興軍城壁欲望支降度牒四百道乘此和顧人夫不惟城壁計日可了兼可以存養缺食人民詔特支二百道 二月十六日詔豐城縣主簿倪仲寬先次放罷令憲司取勘以聞俟案到將上取旨以江南西路轉運副使林麓奏仲寬管洪州南昌縣惠門場非理決徒缺食人掇刺也 四月二日京西路轉運判官李祐言尚書右丞范致虛奏京西災傷州縣並不依災傷檢放勒民戶依舊納稅致民力愈困罪在州縣欲望並給義倉物料賑濟奉詔令臣

星夜前去体量詣實常平官孫廷壽先次勅停餘監司並守二並具名奏
一路義倉可並特通融支撥賑濟應灾傷流移地分並令依法放免租稅
体量得遂州人戶因去秋霖雨薄收人民闕食汝州諸縣艱於賑濟致有
流移飢殍唐鄧州縣已法檢校放稅租外賑濟管下諸縣飢殍流民共三
萬八千餘人均房州諸縣放稅不盡致自庚辰以來往往聚為盜賊詔以
房州知通遂縣知縣並衝替汝州知通各降一官唐鄧州知通各轉一官
六月二十七日開封尹虞燮言去歲諸路水灾今夏二麥大稔秋田
倍收一歲之熟未足以盡補瘡痍尚慮監司州縣例行催科累年之欠乞
行約束從之 十月十九日詔兩浙連年灾傷今歲方始豐熟應積欠不
得一併催理並限三年帶納 十二月十六日監察御史周武仲言淮南
旱暵蒙付以使事賑濟莫急於錢米而州縣往往無之望依淮南許依鄰
近發義倉充檢支遣弄西京路汝潁等州灾傷放免租稅指揮豪民大姓
有願出積粟者乞籍其名則以官爵其次與免差科一次所在係官山林
塘澤有可推以利民者乞暫絕其禁聽飢民採食其利商旅販運應鄰近
路分及沿江州軍載斛米舟車並乞與免沿路力勝錢堰關關津不得稽
留從之仍許通一路義倉充撥支給其流移地分如合放免租稅並令依

條內蒙民出粟不得抑勒 二年八月二十日知壽春府侯益言臣昨緣
去歲秋田旱災曾具奏乞依政和七年正月二十六日指揮許客人於豐
熟去處興販米斛前來災傷去處出糶與免沿路力升稅錢後來本府夏
麥收成其上件指揮已行住罷今歲秋田復又早損欲依宣和元年十二
月十六日指揮行下從之 十二月二十五日詔睦州及管下應避賊者
今所在官司多方存恤借與官屋僧舍居住內有不能自存之人依條賑
濟疾速施行 六年七月九日詔兩浙州縣人戶積欠常平及圍田錢米
元降指揮展限三年起催今已限滿訪聞奉路春夏水潦害民田民至流
徙已令將賑糶官米拯濟艱食所有積欠又圍田錢米特更展限一年候
豐熟日依條催理 八月十九日詔兩浙路州縣違法開糶邀阻客人米
價翔踴仰提刑廣訪俸究水災去處令常平司賑濟州縣開糶邀阻速令
禁止 十一月十九日南郊制應河北京東河東路民戶曾被劫掠或焚
燒廬舍委州縣多方安集早令著業與免諸般差科二年 同日南郊制
訪聞外路夏秋之間陰雨積水占墾民田或河防潰決衝注鄉村縣官坐
視並不措置如措置有方實有勞效者保明以聞當議特加旌勸 欽宗
靖康元年六月十四日知磁州趙將之言紳師中兵潰有被傷之人瘞曳

穆主下自字
朝大元一修

道路甚多臣已隨宜措置出榜招收權置一醫藥院收管醫治如臣一州
所醫已二百餘人切慮別路州郡尚多有乞下諸州將重傷者每人支
絹一疋錢一貫輕傷人半支並以係省錢物充仍委守臣當官給付依已
降指揮將詔到散人並發上邊應援太原外有被傷未堪驅使人送
今逐州醫治候平愈日逐就結隊發遣從之以上續宋朝會要
高宗建炎元年五月一日敕應遣金人殺戮暴露遺骸無人認者許所在
寺院埋瘞每及一百人令所屬勘驗給降度牒一道四年八月十八日
德音紹興元年正月一日德音九月十五日敕二年六月十二日敕九月
四日敕四年九月十五日敕九年五月五日敕十一年三月五日德音同
此制但或以百人度僧一人或二百人度僧一人或致祭黃籙水陸或比
折紫衣師號九月十六日詔曰訪聞陝西至京及諸路有亡歿戰士遺
骸不置收瘞加以連歲兵革暴露轉戰使士卒流離道路朕甚憫之仰三
省行下諸路措置掩瘞疾速施行三年六月十二日都省言渡江之民
溢于道路其飢餓者無飲食疾病者無藥醫詔令淮南江浙轉運司量給
錢米賑給其病患者差官醫治務要實惠及民不管失所四年二
月二十三日詔應士庶家屬有被驅虜脫歸之人令所在存恤量給錢米

於寺院安泊審問親屬所在差人津發前去 四月二十八日上諭輔臣
曰朕聞明州遭寇焚蕪不餘片瓦并邑丘墟使民骨肉離散囊橐罄竭朕
力不能救心甚憫之可將已椿管米七千餘石令守臣均給城下人戶庶
舍被災者以助窘乏 十月十八日詔諸處流移百姓所在孤苦無依者
並仰越州安泊賑濟務在今活其有不幸死損者收斂瘞藏並如近降指
揮施行 紹興元年五月二十五日權發康軍叛采言本軍結賊馬之
後遺骸不啻萬人近降德音每收瘞過一百人給度牒一道緣今未數多
乞每三百人降度牒一道共乞降度牒二十道其過多數目亦只勸諭童
斷併力收瘞從之 六月七日尚書省言切聞平江以北流屍兩岸遺骸
頗多乞下越州差官一員立限收拾埋瘞詔平江府須管日近掩瘞盡絕
每令及二百人給度牒一道本路提刑司檢察或尚有暴露去處按劾聞
奏 十月二十三日詔越州城內遭火延燒民舍屋不少致貧民無處居
止仰三省行下本州分委官躬親子細核勘應寬曾被火延燒下戶每十
人作一保結罪保明單甲姓名中尚書省以憑支錢賑給應官私地基許
元賃人搭蓋依舊居住其合納房錢并地基錢並與放兩月 十一月六
日知紹興府陳汝錫言尋分委四兵官執劄人戶姓名四廟共二百三十

餘戶詔令戶部每戶支錢二貫文仰陳汝錫勾集赴都堂給散二年四月七日試秘書少監傅松御言淮東昨經賊寇死傷者多城郭原野遺骸狼藉今來逐州守臣皆能遵奉詔旨悉心收瘞聖加獎諭詔令學士院降詔獎諭閏四月二十日福建路安撫使司言檢准敕文召募寺觀童行埋瘞遺骸每及二百人給度牒一道緣本路地薄民貧願為僧道者頗多深慮州縣官吏並緣為姦巧募人數遂致冗濫本司已下逐州縣各委官一員專一點檢以千字文為號候埋瘞寒及二百人令所委官開具字號申縣縣申州州差官審寔保明申本司本司別差官覆寔訖保明申尚書省計數乞給度牒欲望特降指揮如所委官及州縣保明不寔其所給度牒計賊以自盜論瘞幾上副朝廷澤及漏泉之意餘路依此從之八月九日詔臨安府被火百姓許於法慧寺及三天竺寺等處權安泊應客店亦許安下免出房錢其四向買販木植蘆箔竹筏並不得抽分收稅官私房錢不以買伯並放五日內孤貧不能自存之人令戶部者倉支米二千石付臨安府賑濟仍開具賑濟過人數以聞三年七月十一日詔訪聞真楊楚泗承州道路尚多遺骸暴露令禮部給降逐州空名度牒各一十道付逐州專委通判召募童行如法埋瘞仍仰往來按視悔及二百人即

驗實中州書填度牒一道給付 二十二日詔昨錄兵馬聞山谷溝渠暴
肯尚多令禮部給降而浙西路空名度牒十道委臨安府召募僧行收瘞
不得有暴露 以久關兩澤故有是命 九月五日軍臣朱勝非等言近
訪聞泉州水溫縣城郭墊廬舍已行下本州詰問且令詣實申尚書省上
曰國朝以來四方有水旱災異無敢不上聞者故修省蠲貸之令隨之近
日蘄湖地震泉州大水輒不以聞何也詔詣路如有水旱等事令監司郡
守即時具奏如敢隱默當寘典憲 十一日軍臣朱勝非等言九日夜朝
天門外居民遺火延燒頗廣上惻然曰細民焚其室廬生聚何從得食必
有甚失所者可令戶部支降米五百石令臨安府委官就行賑濟孤貧不
能自存者無或追呼更致煩擾 二十三日泉州言本州縣被水之家缺
乏糧食不能自存之人欲州委知通縣委令佐先次取撥見管常平義倉
米斛躬親前賑濟及被水淪死其無主屍骸欲令本處量支官錢如法埋
瘞無致暴露今來深慮前項已科定錢未應到不足欲令禮部給降福建
路空名度牒二百道專充應副前項支使詔依仍令本路漕司躬親前去
照檢被水州縣奉行寬卹賑濟等事件以聞如州縣奉行不虔仰提刑司
按劾聞奏當議重寘典憲 四年正月二十二日詔臨安府見開撥運河

如有遺骸令守臣募僧行埋瘞每及二百副令禮部給降度牒一道領計
價換給紫衣師號者聽 九月十五日明堂赦應遺金人及賊寇殺虜遺
棄下幼小但十五歲以下聽行收養即從其姓 六年十二月一日德音
七年九月二十二日明堂同此制 十二月二十七日上諭輔臣曰劉元
世張俊兩軍渡江輩賊倭獲勝捷然有死於鋒鏑之下朕所傷則向者韓
世忠承州之戰亦有死事將士既加褒賻復令收其遺骸於僧寺隙地瘞
之歲度量重行守冢而厚恤其家今可依此施行臣等曰聖恩及於存歿
如此將士聞之孰不用命 五年正月十五日內降淮南路德音應州縣
官吏軍民因戰鬪傷中之人仰逐軍井所在州縣多方存恤需治務要早
獲瘞安其死事之家應得恩數仰所屬疾速取會保明施行 同日淮南
路德音勸會諸軍過江掩殺賊馬內有陣亡官兵已降指揮令本軍存恤
家屬無令失所及差人收拾遺骸前來鎮江建康府等處支破官錢踏逐
寺院比近空地選差童行如法埋瘞以時祭祀每歲特與度僧一名尚慮
奉行減裂不致如法仰鎮江建康府守臣常切委官點檢 七月五日都
督行府言勸會水寨比因闕食餓殍頗多及貧民死亡并抗拒戰歿之人
並皆暴露屍骸欲委本路地分知縣召募道僧童行並行收拾如法埋瘞

每及二百人與支度牒一道願改換紫衣師號者亦聽仍令沿湖諸縣各以官錢致祭從之 十月二十六日三省言劉豫使沂海等州募軍攻杞連水軍韓忠遣兵迎擊殲之所脫無幾上曰中原赤子為劉豫通脅犯兵威死於鋒鏑誠可憫也可令世忠收拾遺骸埋瘞設水陸齋追為十二月九日詔雪寒細民關食可令臨安府分委官措置依賑濟人例夫米三日後又展三日 六年七月十八日尚書省言廣西缺廉邕州緣去歲大水即今米價踴貴細民難食欲令本路常平官體訪如委是詣實即立便前去及分委官屬各躬親巡州取撥常平米斛賑濟如逐州所管數少即於鄰近州縣即發應副仍具各支撥過米斛數目及措置存恤事件以聞從之 十二月五日詔臨安府遭火竊慮民戶暴露不易令行宮留守司依舊例於戶部取發米二千石專委本府守臣差官搬被燒民戶計口日給米二升十日內見處從官吏諸色人被燒之家亦仰留守司量度支給錢米存恤 二十三日樞密院言叛臣劉麟劉猷等驅擁中原軍民前來侵犯淮西作逆雖已勦殺破蕩緣淮北之民皆朝廷赤子念其無辜死於鋒鏑詔令建康府差茅山道士二十七人修設黃籙醮三晝夜追薦仍委江東按撫司官應辦 七年二月十二日尚書省言鎮江府太

平州居民遺火細民無不暴露親食令李讓張滙於常平義倉米內各支撥二千石分委兵官抄劄被火百姓貧乏之家每家計口支食二升十月仍有委兵官躬親監散如被火民人見欠公私債負權住催理兩月搭蓋官私白地其見納贖錢以贖伯多寡並放兩月從之 十三日詔太平州居民遺火有走避不及致被焚死令呂祉委太平州差人將見暴露遺尸疾速埋瘞及優恤其家內見任官仰保明中尚書省作黃錄道場三晝夜追薦 七月二十四日詔建康府內外居民病患者令翰林院差官四員分詣看診其合用藥令戶部藥局應副仍置厝除破如有死亡委實貧乏令本府量度給錢助葬仍具已支數申尚書省除破 九年六月十七日臨安府給散同此制 九年正月五日內降新復河南州軍款應河南新復州縣百姓各安鄉井內饑寡孤獨不能自存之人令州縣多方存恤毋令失所 十年閏六月十五日詔順昌府官吏軍民等在虜犯境王師扼衝惟爾吏民協濟軍事保扞城壘驅遏寇攘春乃忠勤宜加撫慰管下諸縣及鄉村人戶曾被賊馬焚劫財產屋業者並依災傷法賑濟應本府縣有民間利害守臣條具以聞詔書到日明告吏民各奏知委 十一年三月七日内降壽春府廬溪縣和舒州無為軍德音應令來大軍臨陣勦殺

番兵遺骸暴露原野朕為人父母子育兆民豈分南北深念此地生靈好
生惡死情本無異但緣主庸不道知以威刑驅擁前來使冒鋒鏑置之死
地深可閔傷仰州縣差官分頭檢視掩瘞毋致暴露 十三年八月十三
日詔太平州居民遭火令總領所於本州諸色米內取撥一千石檢視被
火之家計口俵散係官屋宇並白地價錢並放兩月 十四年正月十三
日詔今月十二日被火居民令臨安府於原官米內依例賑濟具支過數
申尚書省 五月十八日上曰聞婺州溪水暴漲滄溺去處可令官吏多
方賑濟毋令失所 十六年六月二十一日尚書省言方此盛夏慮有疾
病之人昨在京日差醫官診視給散夏藥詔令翰林院差醫官四員徧詣
臨安府城內外看視合藥令戶部行下和劑局應副候秋涼日休罷 二
十年六月十六日尚書省言行在及諸路州軍每歲合藥依法選官監視
修合許軍民請服縣鎮寨軍應用致給付切慮州軍不切奉行詔令戶部
檢坐條法申嚴行下諸路州軍遵守奉行務行實惠毋致減裂 二十六
年六月二十一日三省言初伏差醫官給散夏藥上宣諭曰此間民間春
夏中多是熱疾如服熱藥及消風散之類往往害人唯小柴胡湯為宜令
醫官揭榜通衢令人預知頗聞服此得効所活者甚眾沈該等曰此陛下

留神醫藥其恤民疾苦可謂至矣 二十八年八月二十七日詔令吳璘
同蘇欽許大英將被水州軍人戶取撥常平司義倉米賑濟多方措置存
恤無令失所仍令依條檢放開具取撥過米數及已措置施行次第申尚
書省 九月八日浙西常平司言平江府已於在城覺報寺等八處并吳
長兩縣尉司置場賑糶共三萬七千石今來本府米價漸平已行住糶詔
令平江府湊足元撥五萬石數均下諸縣仍行賑糶 十一月二十三日
南郊赦勘會任法病人無總麻以上親同居者廂耆報所屬官為醫治訪
聞比來客族寄居店舍寺觀遇有患病避免看視聞官逐趕出外及道路
暴病之人店戶不為安泊風雨暴露往往致斃深可矜憫可令州縣委官
內外檢察依條醫治仍加存恤及出榜鄉村曉諭月具有無違戾去處以
聞 二十九年四月十五日詔鎮江府被火缺食之家取撥常平義倉米
量行賑濟 九月四日詔福建七月間水災仰帥臣監司將合行賑濟人
疾速支常平錢米賑濟其稅租依條檢放仍具析不即中奏因依聞奏
十月九日詔福建路提點刑獄樊光遠降一官轉運判官趙不濫放
以福州水災先遠權州事不即躬親括責闕食人戶賑濟故鵠一官不濫
以不曾承受本州申到故釋其罪有是詔 三十年五月十八日御史中

丞魚侍講朱倬殿中侍御史汪澈言臨安府於潛臨安兩縣山水暴至居民屋廬漂蕩甚衆望令臨安府速下兩縣委令佐躬親有驗如有未收瘞者官給錢收瘞之及隨被害之大小條具賑恤詔令轉運司支撥係官錢未就委令佐躬親賑濟無令失所其未收瘞人口給官錢如法埋瘞不得減裂八月十一日直秘閣權發遣兩浙路計度轉運副使呂廣問言被旨契勘湖州安吉縣向被災最甚民戶實數具奏今抄剗到缺食合賑濟等五等主戶共一百八十戶望許依臨安府已得指揮將被災人戶等第與免本戶應干苗稅科數及丁身役錢等最甚者免四科其次免三科餘免兩科及第五等曾經賑濟之人尚慮第五等以上雖不曾賑濟或有田桑屋宇被水衝損亦合隨等第輕重減放稅賦從之三十一年正月二十二日詔雪寒細民艱食令臨安府并屬縣取發常平米依市價減半分委官四散置場廣糴十日二十四日詔聞臨安府內外有貧乏不能自存之家可令抄剗具數限日下申尚書省二十五日臨安府言已抄剗到貧乏之家詔令本府分委有心力官日下巡門張散賑濟每名支錢二百文米一升二十六日上謂輔臣曰百姓雖已賑濟尚恐貧乏之家不能自存者更令持支柴炭令並於內藏庫支撥給與務令實惠及物然輔

即當此當寒細民不易可令常平官依條賑濟 八月二十四日詔愛州

將本路被水之入戶多有存恤賑濟漂流居民舍屋量

等第支給官錢其淹損田畝合納稅租依條檢放溺死之人官為埋瘞務

要實惠不得減裂仍各具知稟施行文狀申尚書省 三十二年二月二

十八日詔建康鎮江府太平江池州屯戍軍兵來多有疾疫之人令逐路

轉運司支破係者錢物委逐州守臣修合要用藥餌差撥議議分頭拯救

務在實惠不得減裂荆襄四川準此以上中興會要

孝宗隆興元年三月二十八日詔霖雨為沴雖側身修行尚恐誠意未孚

可令諸路監司守令應有災傷去處常切賑恤困窮糾察刑禁仍各具聞

奏 八月十七日詔曰比日飛蝗甚多人聞諸路州縣風水為災螟螣害

稼皆證罔測朕甚懼焉朕自今月十八日避正殿減常膳側身修行以祈
消弭重惟政事之闕致行和氣二三大臣其盡忠者近輔朕不逮監司即
守各務身率戢貪某暴平察寬獄以安民庶所在災傷悉行具奏依條賑
卹檢放如有陋匿不以聞者重寘典憲師徒未息科調繁興江淮襄蜀尤
極勞擾種場之吏宜加安輯弱者苛斂以稱德意 九月十一日詔訪聞
浙東西州軍間有螟螣風水傷稼去處可令守臣疾速條具應合賑恤蠲

放事件聞奏不得隱匿泛濫 十二月二十四日宰臣進呈昨來宿州之戰城中投降之民主將不察一例屠殺欲於泗州建置道場三日以示酬恤之意上曰南北陣亡人並與追薦湯思退等奏曰陛下兼愛南北軍民聖德如此天下幸甚 二年三月二十一日宰臣湯思退等奏廣西連寇首尾數年乞降德音寬恤上曰旣旣放得多少不要文具務行實惠 二十七日德音高勝雷容州應因戰陣亡及良民無辜被害遺骸暴露寔可矜憫仰逐州縣德音到限三日召募僧行埋瘞如及二百副本州覈實保明申尚書省給降度牒一道 六月二十四日詔浙東近因連雨大水及兩淮亦有被水去處理宜措置緩恤今逐路帥漕司同共措置委官往被水州縣賑濟合用錢米許於常平司見椿管錢米內取撥若有溺死之人與量給棺殮之具內無居止人亦仰踏逐空閑官舍及寺觀權行安泊其應干台檢放寬恤事件及用常平錢米並開具中尚書省 二十九日上諭宰臣湯思退等曰今歲江東浙西水灾卿等思所以救灾防患之術思退等奏臣等夔調無功致有此灾未敢便乞罷黜上曰朕當思所以應天之寶卿等更宜輔朕不逮 十二月十六日德音楚滁濠廬光州盱眙光化軍管內并楊成西和州襄陽德安信陽高郵軍曾經殘破州縣戰陣

去處見有遺骸令帥漕司召人埋瘞或焚化每乞二百副童行支度牒一
道僧道賜紫衣師號餘人比類支給度牒價錢專一差官監視覈實書填

二十六日詔兩淮經虜人蹂踐流移之民飢寒暴露漸有疾疫令和劑

局疾速品搭修合合用藥四萬帖赴淮東西統領所交割樞密院差使臣

一員管押前去仰逐處委官遍詣兩淮州縣鄉村就差醫人同共給散

乾道元年正月一日南鄭敕州縣其間有被水人戶理合優恤令本路帥

臣監司多方存恤賑濟其淹沒田畝照近降指揮檢放如有因此災傷死

亡之人官為收殮無為虛文不得減裂二年六年南鄭敕並同此制 三

月三日尚書司勳員外郎浙東檢察賑濟唐閔言民間頗有遺棄小兒足

食之家願將收養正緣於法遺棄小兒止許收養三歲以下緣此二歲以

上者人皆不敢乞朝廷指揮權於今年許令自十歲以下曉人家收養將

果不許議認從之 八日權發臨安府薛良朋言得旨收拾街市為患不

能行步貧民用粥藥醫治如有死亡每名給錢三貫文收買棺木埋瘞本

府今選募到有心力行者王祖禧即惠親專一管幹津送乞給降度牒二

道與王祖禧即惠親被刺從之 四月二十二日詔兩浙州軍去歲水湯

流移憫食人頗眾朝廷措置賑糶存濟甚多比因疫氣傳染間有死亡深

可憫憐可令行在翰林院差醫人八員遍詣臨安府城內外每日巡門體
問看診隨證用藥其藥令戶部於和劑局應別在外州軍亦仰依法州委
駐泊醫官縣鎮選差善醫之人多方救治藥錢於逐州歲賜令藥錢內縣
鎮於雜收錢內支給務要實惠及民并仰接續給散夏樂侯秋涼日住罷
從中書門下省請也 五月六日詔兩浙路諸州縣飢民多有疾疫理宜
務恤除下逐州守臣措置醫治外如有死亡遺棄在路之人亦仰委官同
巡尉檢察支給官錢埋瘞不得令狼藉道路 二年五月二十五日詔江
西以至浙右今歲雨潦頗害農事宜令諸路監司守令察今秋有田米不
熟之處預先講求救災恤荒之政如得米有水旱去處却致無備必實于
罰如預備有方賞議推賞 十月一日詔温州近被大風駕潮淹死戶口
推倒屋舍失壞官物其災異常令行寬恤可令度支郎中唐瑑同提舉常
平宋藻知州劉孝題共議奏酌措置條具聞奏仍令內藏庫支降錢二萬
貫付温州專充修築塘埭斗門使用疾速如法修整不得減裂縫而唐瑑
言切見温州四縣並皆海邊今來人戶田畝盡被海水衝蕩賊由漫入土
脉未可耕種及缺牛具不能偏耕雖令虛認苗稅乞委守臣來春差官充
實保明申奏及興減放當年苗稅庶幾水災之後農民咸被聖恩早得復

舊從之

年八月五日知紹興府洪适言上虞縣近有水灾親視居民

上曰近所在或有山發洪處可令常平司常切撫存賑濟被水之家

年六月四日軍執奏事之次上宣諭曰昨日汪清對曰去秋江西被水數

州之民至有無葉結饑者朕都不知陳俊卿奏曰去秋沈樞亦中表言水

灾陛下所以預令理會和糴上曰卿等更別措置今後水旱須令實申來

蔣希奏曰州縣所以不敢申恐朝廷或不樂聞聞今陛下詢訪民間疾苦

焦勞形於玉色誰敢隱匿上曰朕正欲聞之庶幾朝廷處置賑濟繼而

詔諸路轉運司行下所管州軍今後水旱須管依實具中尚書省仍令轉

運司具狀保明中奏或州軍隱蔽不申監司自合一面體訪聞奏如或不

盡不實朝廷訪聞並當重寘典憲五年四月十五日詔應福建路有貧

乏之家生子者許經所屬具陳委自長官驗實每生一子給常平米一石

錢一貫助其養育餘路州軍依此施行以臣察言福建路乃有不舉子

之風蓋緣貧乏無以贖給國家禁止之法不為不嚴而小民抵冒尚未知

革者誠由未有以惠之故也故是有命六年十月十一日臣察言今春

湖秀低田與夫太平宣州圩田多壞方此秋成米價已高而米谷之憂未

艾欲墜行下守臣今與縣令各隨其州縣參酌所宜而預為之計其有奉

詔不虔視戶口流移稍多者內則從臺諫外則從發運監司按劾以聞詔
令逐州守臣限半月申尚書省 七年二月十四日冊聖太子赦災傷州
軍切慮或有遺棄小兒有人收養者官為置籍抄上日給常平米二升
九年五月十二日詔久雨為災水患必廣可令逐路漕臣行下州縣寔被
水貧乏人戶多方措置存恤俟條賑給內浸損秋苗去處優借種本或勸
諭上戶應副借貸接續栽種無致失業 九月十日詔今年浙東州縣旱
傷至廣朝廷除已行下軫恤倚閣殘零稅賦差官檢放外尚慮形勢之家
驅迫償債不能安業可將浙東早傷州縣下三等人戶所欠私債
並與倚閣住索候來歲收成豐熟即仰依約理還 以上乾道會要

始熙寧元祐道

恩惠 宋會要 恤災

令實

蘇軾二年六月十五日修仁門則此卷不名恤災又稱別本有恩惠一門其書別錄貸也此書移以名此卷

九年一作元豐元年

居養院安濟坊涵澤園 神宗熙寧二年閏十一月二十五日詔京城內外值此寒雪應老疾孤幼無依乞丐者令開封府並拘收分擘於四福田院注泊於見今額定人數外收養仍令推判官四廂使臣依福田院條貫看驗每日特與依額內人例支給與錢養活無令失所至立春後天氣稍暖日申中書省住支所有合用錢於左
藏庫見管福田院錢內支撥 九年十二月十五日知太原府韓絳言在法諸老疾自十一月一日州給米豆至次年三月終止河東地寒與諸路不同欲乞本路州縣於九月以後抄割自十月一日起支至次年二月終

止如米豆有餘即至三月終從之 元豐二年三月二
日詔開封府界僧寺旅寄棺柩貧不能葬歲久暴露其
令逐縣度官不毛地三五頃聽人安葬無主者官為瘞
之民願得錢者官出錢貸之每喪毋過二千勿收息又
詔提舉常平等事陳向主興事以向建言故也後向言
在京西禪院均定地分收葬遺骸天禧中有敕書給左
藏庫錢後因汪藻奏請裁減事遂不行今乞以戶絕動
用錢給瘞埋之費六月向又乞選募僧守護量立恩例
並從之葬及三千以上處僧一人三年與紫衣師號更
令主官三年願再住者准此
哲宗元祐二年十二月十六日詔畿縣貧乏不能自存

及老幼疾病乞丐之人應給米豆勿拘此令 元符元
年九月二日詔開封府依舊敕每歲冬月巡視京城凍
餒者吏部差待闕小使臣同職員盡地分賑贍畢付福
田院據實數申戶部從監察御史蔡蹈言也 十月八
日詔鰥寡孤獨貧乏不能自存者州知通縣令佐驗實
官為養之疾病者仍給醫藥監司所至檢察閱視應居
養者以戶絕屋居無戶絕者以官屋居之及以戶絕財
產給其費不限月分依乞丐法給米豆若不足者以常
平息錢充已居養而能自存者罷從詳定一司敕令所
所請也

徽宗崇寧元年八月二十日詔置安濟坊先是權知開

封府吳居厚奏乞諸路置將理院兵馬司差撥剝員三人節級一名一季一替管勾本處應干事件並委兵馬司官提轄管勾監司巡按點檢所建將理院宜以病人輕重而異室處之以防漸染又作厨舍以為湯藥飲食人宿舍及病人分輕重異室逐處可修居屋一十間以來令轉運司計置修蓋於是有旨仍依賜名九月六日詔鰥寡孤獨應居養者以戶絕財產給其費不限月依乞丐法給米豆如不足即支常平息錢遺棄小兒仍顧人乳養十一月十日河北都轉運司言乞縣置安濟坊令佐提轄從之二年四月六日戶部言懷州申諸路安濟坊應干所須並依鰥寡乞丐條例一切支用

常平錢斛看詳欲應干安濟坊所費錢物依元符令並以戶絕財產給其費若不足即以常平息錢充仍隸提舉司管勾從之 五月二十六日兩浙轉運司言蘇軾知杭州日城中有病坊一所名安樂以僧主之三年醫愈千人與紫衣乞自今管勾病坊僧三年滿所醫之數賜紫衣及祀部牒各一道從之仍改為安濟坊 三年二月三日中書言州縣有貧無以葬或客死暴露者甚可傷惻昨元豐中神宗皇帝嘗詔府界以官地收葬枯骨今欲推廣先志擇高曠不毛之地置漏澤園凡寺觀寄留轉積之無主者若暴露遺骸悉瘞其中縣置籍監司巡歷檢察從之 四日中書省言諸以漏澤園葬瘞

縣及園各置圖籍令廳置櫃封鎖令佐贊移以圖籍交授監司巡歷取圖籍點檢應葬者人給地八尺方軌二口以元寄所在及月日姓名若其子孫父母兄弟今葬字號年月日悉鐫訖軌上立峯記識如上法無棺柩者官給以葬而子孫親屬識認今乞改葬者官為開葬驗籍給付軍民貧乏親屬願葬漏澤園者聽指占葬地給地九尺無故若放牧悉不得入仍於中量置屋以為祭奠之所聽親屬享祭追薦並著為令從之 四年十月六日詔京師根本之地王化所先鰥寡孤獨與貧而無告者每患居養之法施於四海而未及京師殆失自近及遠之意今京師雖有福田院所養之數未廣隆寒盛

者窮而無告及疾病者或失其所朕甚憫焉可令開封
府依外州法居養鰥寡孤獨及置安濟坊以稱朕意
十二月十九日興元府言切惟朝廷置居養院惠養鰥
寡孤獨及置安濟坊醫理病人召有行業僧管勾外有
見管簿歷自來止是令廂典抄轉收支難責以出納之
事今欲乞差軍典一名除身分月糧外與比附諸司書
手文字軍典每月添支米醬菜錢一貫文有犯依重祿
法並於常平錢米支給所有紙筆之用量行支破其外
縣差本縣手分一名兼管抄轉收支一年一替如蒙施
行乞下有司頒降諸路常平倉司施行從之 二十八
日詔自京師至外路皆行居養法及置安濟坊猶慮雖

非鰥寡孤獨而瘡老疾廢委是貧乏實不能自存緣拘
文遂不與居養朕甚憫焉可立條委當職官審察詣實
許與居養速著文行下其安濟坊醫者人給手歷以書
所治療瘡失歲終改會人數以為殿最仍立定賞罰條
格或他司奉行不謹致德澤不能下究外路委提舉常
平司京畿委提點刑獄司常切檢察外路仍兼許他司
分巡皆得受許都城內仍許御史臺糾劾 五年八月
十一日詔諸漏澤園安濟坊州縣輒限人數責保正長
以無病及已葬人充者杖一百仍先次施行 二十一
日尚書省言新差江南西路轉運判官祖理奏竊見漏
澤園州縣奉行尚或減裂埋瘡不深遂致暴露未副陛

下所以愛民之意望詔訪州縣凡漏澤園收瘞遺骸並
深三尺或不及三尺而致暴露者宜令監司覺察按劾
以聞從之 九月二日詔曰居養院安濟坊漏澤園以
惠天下窮民比嘗申飭聞稍就緒尚慮州縣怠於奉行
失於檢察仁澤未究仰提舉常平司每加提按毋致文
具滅裂城寨鎮市戶及千以上有知監者許依諸縣條
例增置務使惠及無告以稱朕意 十月九日准東提
舉司言安濟坊漏澤園並已蒙朝廷賜名其居養鰥寡
孤獨等亦乞特賜名稱以昭惠澤戶部契勘已降都省
批狀京西北路提舉司申請以居養院稱呼詔依所申
以居養院為名諸路准此 大觀元年三月十八日詔

居養鰥寡孤獨之人其老者並年五十以上許行收養
諸路依此先是崇寧三年十一月二十六日南郊赦內
一項云已詔天下置安濟坊漏澤園訪聞州縣但為文
具未盡如法並仰監司因巡按檢舉委曲檢校每季具
已較正數及施行逐件事理次第聞奏至是河東路提
點刑獄點檢到事件故有是詔 八月二十七日真定
府言居養院安濟坊兩處所管出納官物并日逐抄轉
簿歷及供報文字委是繁多若共差軍典一名顯見兩
處勾當不均伏望各差軍典一名并添支錢米等並乞
依已得指揮從之諸路依此 閏十月詔在京遇冬寒
有乞丐人無衣赤露往往倒於街衢其居養院止居鰥

寡孤獨不能自存之人應遇冬寒雨雪有無衣服赤露人並收入居養院並依居養院法 二年四月五日知荆南府席震等言枝江縣居養人咸通一百一歲已下縣依條就賜絹米酒訖契勘居養人年八十已上依條許支新色白米及柴錢九十以上每日更增給醬菜錢二十文夏月支布衣冬月衲衣絮被况如咸通年踰百歲若只循前項八九十之例竊慮未稱朝廷惠民之政欲將居養人咸通每日添給肉食錢并見增給醬菜通為錢三十文省冬月給綿絹衣被夏單絹衫袴裝着仍乞諸路有百歲以上之人亦依此施行從之 八月十九日工部言邢州鉅鹿縣水本縣官私房等盡被淹浸

詔見在人戶如法賑濟如有孤遺及小兒並側近居養院收養詳見恤災門 三年四月二日手詔居養安濟

漏澤為仁政先欲鰥寡孤獨養生送死各不失所而已聞諸縣奉行太過甚者至於設供張備酒饌不無苛擾其立法禁止無令過有姑息 十二月十六日三省言戶部奏詔居養安濟日來官司奉法太過致州縣受弊可申明禁止務在適中音詳自降元符法節次官司起請增添若依舊遵用憲諸路奉法不一欲依元符令并崇寧五年秋頒條施行詔改昨頒條注文內癯老作廢篤疾并依所奏並罷 四年八月二十五日詔鰥寡孤獨古之窮民生者養之病者藥之死者葬之惠亦厚矣

比年有司觀望殊失本指至或置蚊帳給酒肉食祭醮如贈典日用既廣糜費無藝少且壯者游惰無圖廩食自若官弗之察獎孰甚焉應州縣以前所置居養院安濟坊漏澤園許存留外仰並遵守元符令餘更不施行開封府創置坊院悉罷見在人併歸四福田院依舊法施行遇歲歉大寒州縣申監司在京中開封府并聞奏聽旨內遺棄小兒委實須乳者所在保明聽依崇寧元年法雇乳政和元年正月二十九日詔居養鰥寡孤獨等人昨降指揮並遵守元符令自合逐年依條施行不須聞奏聽旨外如遇歉歲或大寒合別加優卹若須候聞奏得旨施行竊恐後時仰提舉司審度施行訖奏

諸路依此 十二月二十四日詔居養安濟仁政之火
者方冬初寒宜務收卹諸州郡或弛廢當職官停替開
具供申并令開封府依此檢察 九月二十二日詔今
歲節令差早即今天氣稍寒令開封府自今巡覲收養
寒凍倒臥并無衣赤露乞丐人 十一月十九日尚書
省言居養院安濟坊漏澤園比來提舉常平司官全不
復省察民之無告坐視不救甚失朝廷惠養之意詔自
今居養院安濟漏澤園事轉運提刑鹽香司並許按舉
在京委御史臺彈奏 四年二月一日兩浙轉運司言
鎮江府在城并丹徒縣居養院安濟坊並不置造布絮
衲被給散孤老孱弱之人未副惠養之意兼用布絮被

支費錢數不多即非過有濫支錢物欲應居養院安濟坊寒月許置布絮被給散蓋臥詔依所乞許置諸路依此二日臣僚言訪聞諸路民之實老而正當居養實病而真欲安濟者徃徃以親戚識認為名虛立案牘隨時遣逐使法當收卹者復被其害官吏相蒙無以檢察欲令今後州縣居養安濟人遇有親戚識認處委不干碍官一員驗實若詐冒及保明不實與同罪仍不以赦降去官原免從之四月十八日新知潁昌府崔直躬言朝廷以居養安濟惠濟鰥寡孤獨欲冬月遇寒雪異常許權不限數支訖聞奏從之五年二月十七日詔居養院見居養民合止此月二十日住罷可更展限十

日六年正月五日知福州趙靖言鰥寡孤獨居養安濟之法自崇寧以來每歲全活者無慮億萬乞詔有司歲終總諸路全活之數宣付史館從之十月十八日開封府尹王革言本府令每歲冬月吏部差小使臣於都城裏外救寒凍倒臥并拘收無衣赤露乞丐人送居養院收養會到吏部所差當短使人即無酬獎惟已經短使再差或借差及三月以上減一年半兩月以上減一年一月以上減半年磨勘止是短使專法本府別無立定酬賞欲今後應救濟無遺闕除省部依短使酬賞外管勾四月以上特減二年磨勘不及四月者以管勾過月日比附省部短使依減年酬賞從之七年七月

四日成都府路提舉常平司言准敕成都府路提舉常
平司所請居養院孤貧小兒內有可教導之人欲乞入
小學聽讀本司遵奉施行外所有逐人衣服襦褲欲乞
於本司常平頭子錢內支給置造仍乞與免入齋之用詔
依餘路依此 八月十六日提舉淮南東路常平等事
鄒子崇言凡居養院遺棄小兒許宮觀寺院養為童行
庶得所歸從之 八年七月十二日詔諸州縣鎮寨及
鄉村道路遇寒月過往軍民有寒凍僵仆之人地分合
千人即時扶舁送近便居養院量給錢米救濟不願入
院者津遣出界違而不送者委令佐及本地分當職官
覺察監司巡歷所至點檢 宣和元年五月九日詔居

養安濟等法歲久寢廢吏滋不虔可令諸路監司廉訪
使者分行所部有不虔者劾之重寘於法 二年六月
十九日詔居養安濟漏澤之法本以施惠窮困有司不
明先帝之法奉行失當如給衣被器用專雇乳母及女
使之類皆資給過厚常平所入殆不能支天下窮民飽
食暖衣猶有餘峙而使軍旅之士廩食不繼或致逋逃
四方非所以為政之道可參考元豐惠養乞丐舊法裁
立中制應居養人日給秬米或粟米一升錢十文省十
一月至正月加柴炭錢五文省小兒並減半安濟坊錢
米依居養法醫藥如舊制漏澤園除葬埋依見行條法
外餘三處應資給若齋醮等事悉罷吏人公人等員額

及請給酬賞並令戶部右曹裁定以聞 七月三日詔
在京乞丐人大觀元年閏十月依居養法指揮更不施
行十四日戶部言奉詔居養安濟漏澤之法可參考元
豐惠養乞丐舊法裁立中制應資給若齊醮等事悉罷
吏人公人等員額及請給酬賞並令戶部右曹裁定以
聞本部今裁定外路軍州崇寧四年十二月敕居養安
濟坊差軍典一名續承大觀元年八月敕各差軍典一
名今欲依舊居養院安濟坊共置一名每月給錢一貫
文充紙劄之費詔依舊酬賞並不施行 十月十七日
京畿提舉常平司言大觀元年三月敕居養鰥寡孤獨
之人其老者並年五十以上許行收養近奉詔恭考元

豐惠養乞丐舊法裁立到應居養人日給錢米數目見
遵依施行緣元豐政和令諸男女年六十為老即未審
且依大觀元年指揮為或合依元豐政和法令詔依元
豐政和條令降指揮日為始日前人特免改正 七年
四月十一日尚書省言冬寒倒臥人更不收養乞丐人
倒卧街衢輦轂之下十目所視人所嗟惻聖明在上深
所仁憫立居養以救其困所費至微而惠澤至深合行
修復從之以上續宋會要

高宗建炎元年六月十三日赦京師物價未平致餓寡
孤獨不能自存之人艱食除開封府依法居養外令留
守司檢察如法居養如錢物不足具合用數申留守司

支降 四年十月三日詔曰諸處流移老弱到行在者
日夕饑餓可專委官具數量支米錢賑濟死亡者委諸
寺僧行收瘞計數給賜度牒務使實惠加於存歿以稱
朕意 紹興元年十二月十四日通判紹興府朱璣言
紹興府街市乞丐稍多被旨令依去年例日下賑濟今
乞委都監抄劄五廂界應管無依倚流移病患之人發
入養濟院仍差本府醫官二員看治童行二名煎煮湯
藥照管粥食將病患人拘籍累及一千人已上至來年三
月一日死不及二分給度牒一道及五百人已上死不
及二分支錢五十貫二百人已上死不及二分支錢二
十貫並令童行分給所有醫官醫治遇病患人瘞愈

分數比類支給若滿一千人死不及一分特與推恩如
有死亡之人欲依去年例委會稽山陰縣尉各於城外
踏逐空閑官地理葬仍委逐官點檢無令暴露其養濟
院及外處方到未曾入院病患死亡之人去年召到僧
宗華收歛雇人撞擗出城掩瘞令縣尉監視置厯拘籍
每及百人次第保明申朝廷給降度牒詔每掩瘞及二
百人與給度牒一道餘依所乞 二年正月二十四日
都省言昨駐蹕紹興府每遇冬寒例行賑恤今移蹕臨
安府春初偶雨雪頗併并街市不無寒餓之人竊慮枉
有死損詔臨安府委兩通判并都監分頭措置應干事
件並依紹興府已得指揮施行 三月二十六日中書

門下省言臨安府賑養乞丐人三月一日已行放散各
無所歸詔臨安府更賑養一月俟麥熟取旨罷 閏四
月三日臨安府言被旨乞丐人更賑養一月合至四月
二十九日滿詔更展一月 三年正月二十六日詔令
臨安府兩通判體認朝廷惠養之意行下諸廂地分都
監將街市凍餒乞丐之人盡行依法收養仍仰兩通判
常切躬親照管毋致少有死損如稍有戒裂所委官取
旨重作施行仍日具收養人數以聞 四年二月十九
日尚書省言養濟乞丐自來係遇冬寒收養至春暖放
散即無立定放散月日詔令本府約度日限以聞本府
乞欲支散至二月終住支從之 十月二十八日臨安

卷一百一十五

七

府言昨來已蒙朝廷依紹興府已得指揮於戶部支降錢米令本府置院賑養乞丐之人續蒙朝廷依常平乞丐法每人日支米一升小兒減半今來合依例賑給詔依年例養濟仍日具人數以聞 六年十一月二日詔令臨安府自今月十一月為始依年例養濟施行 二

每歲降詔並同此制

十二日詔天氣寒凜令平江府子細抄劄乞丐依臨安府已降指揮賑濟 七年閏十月十九日詔天氣寒凜貧民乞丐令建康疾速踏逐舍屋於戶部支撥錢米依臨安府例支散候就緒日申取朝廷指揮為始收養 十三年九月十五日上曰諸處有癯老廢疾之人可依臨安府例令官司養濟此窮民之無告者王政所先也

十月十四日臣僚言欲望行下臨安府錢塘仁和縣
踏逐近城寺院充安濟坊遇有無依倚病人令本坊量
支錢米養濟輪差醫人一名專切看治所有湯藥大醫
熟藥局關請或有死亡送蒿漏澤園埋殯於是戶部言
今欲乞行下臨安府并諸路常平司仰常切檢察所部
州縣遵依見行條令將域內外老病貧乏不能自存及
乞丐之人依條養濟每有病人給藥醫治如奉行減裂
違戾即仰按治依條施行從之十一月八日南郊赦
老病貧乏不能自存及乞丐之人依法籍定姓名自十
一月一日起支米豆養濟至次年三月終病者給藥醫
治訪聞州縣視為文具不曾留意監司亦不檢察致多

失所甚非惠養寬恤之意仰提舉司及州縣當職官遵
依條法指揮多方存恤養濟其有病患亦仰如法醫治
不得減裂 十九年十一月十四日二十二日十一月
十八日二十五年十一月十八日二十八年十一月二
十三日南郊赦三十一年九月二日明堂赦同此制
十四年十二月三日尚書戶部員外郎遙知白言伏覩
陛下惠恤窮民院有養濟給藥惟恐失所歲所存活不
可數計獨死者未有所處往往散瘞道側實為可憫居養
漏澤蓋先朝之仁政也後來漏澤園地多為豪猾請佃
不惟已死昔銜發掘之悲而後死者失掩埋之所欲乞
首自臨安府及諸郡凡漏澤舊園悉使收還以葬死而

無歸者發政施仁之方掩骸埋骨為大實中興之要務也上曰此乃仁政所先可令臨安府先次措置申尚書省行下諸路州軍一體施行十二日宰執百寮賀雪上因宣諭曰天下窮民宜加養濟孟子所謂文王發政施仁必先斯四者尚慮州縣奉行減裂可再降指揮行下於是令諸路常平官嚴切約束州縣如法奉行其所用米斛並仰於常平諸色米內前期取撥樁備依時給散務要實及貧民毋令少有失所仍令逐路監司同共覈察十三日臨安府言被旨措置涌澤舊園葬無歸者本府欲下錢塘仁和縣拘收官私見占佃元舊涌澤園四至丈尺為藩牆限隔每處選募僧人二名主管收

拾埋瘞及二百人覈實申朝廷支降紫衣一道逐處月
支常平錢五貫米一石贍給僧人妻逐縣令佐檢察不
得因緣科率搔擾上曰可令諸路州軍微臨安府已行
事理一體措置施行仍令常平司檢察 十五年六月
二十三日潭州言崇寧間推行涌澤園理瘞無主死人
所降條格棺木絮紙酒件作行下工食錢破磚鐫記死
人姓名鄉貫以千字文為號遇有識認許令給還每年
三元春冬醮祭緣逐件條格燒毀不存乞明降指揮施
行於是戶部言今欲下諸路州縣如委係無主即於常
平司錢內量行支給仍每人不得過三貫文省如法埋
瘞無令合于人作弊科擾并令本司常切不住檢察如

違亦仰按治施行從之 閏十一月六日戶部言京西
常平司開具諸州軍府已拘收措置修蓋到漏澤園地
段及召募僧人每月支破常平錢米看管內有隨州信
陽軍並無常平錢米支給於是戶部言今乞下京西常
平司如委有見缺常平錢米去處於係省錢米內支撥
應副施行從之 十六年十一月五日上宣諭輔臣曰
居養安濟漏澤先帝之仁政居養安濟已行之矣惟漏
澤未曾措置宜令條具添入 十日南郊赦貧乏乞丐
已約束如法養濟其死而無歸者舊法置漏澤園歲盛
已降指揮令諸州依倣臨安府措置訪聞尚有未就緒
去處可令諸路常平司疾速檢舉措置施行無致暴露

餘同十三年之制

十二月十四日給事中段佛言仰

惟國朝變育元元者垂意甚備以居養名院而窮者有所歸以安濟名坊而病者有所療以漏澤名園而死者有所葬行之累年存歿受賜望申飭有司講明居養安濟漏澤之政酌中措置令可久行務使實惠均被逮邇詔令戶部看詳措置申尚書省 十七年二月二十六日臣寮言伏望申飭有司講明漏澤園之政酌中措置令可久行務使實惠均被詔令戶部看詳措置 其後戶部言今措置欲乞行下諸路常平司鈐束覺察州縣常切遵依見行條法指揮施行庶使死者得以葬埋以稱朝廷寬恤之意如稍有奉行減裂違戾去處即仰按

治依法施行

十八年八月十九日臣寮言鄆縣立漏

澤園以惠天下死亡者各得其所州縣奉行減裂所屬
監司全不按舉欲望舉行之俾死亡無人殯歛者有園
以葬埋之詔令戶部看詳其後戶部言所置漏澤園
承降指揮依倣臨安府措置事理今常平司常切檢察
今乞下諸路常平司檢照見行條法指揮下所屬州縣
遵守施行若有違戾去處按治依法施行從之十九
年十一月二十八日權發遣秀州郭瑛言民之飢貧不
能自存者每歲仲冬例加賑濟可謂愛民如子視民如
傷矣是宜州縣守令遵承聖訓以廣實惠然徃往有元非
飢貧巧為計囑得以與籍而困窮無告却或棄遺望申

嚴守令究心檢察庶幾惠及鰥寡且無虛費詔令戶部
檢坐見行條法申嚴行下 二十一年七月十七日宰
執言自十一月一日為始臨安府支養乞丐入錢米上
曰此事所濟極大當苦寒之時貧不能自存之人官給
錢米養濟遂可存活 二十二年十一月十八日南郊
赦已降指揮州縣舊有漏澤園去處復行措置收瘞暴
露骸骨緣其間地段多是為人占佃縣道徇情不行措
置仰監司州郡常切點檢 二十三年十月二十二日
上諭輔臣曰外路養濟恐奉行減裂須令實給錢米以
施實惠乃詔戶部檢坐見行條法申嚴行下 二十四
年十月十二日三省言年例令臨安府自十一月一日

支給錢米養濟乞丐上曰此一事活人甚多可降旨行
下 二十六年閏十月二十七日詔臨安府養濟乞丐
當此雪寒委榮蕤常加檢察依時支散錢米毋令減剋
及冒名承請務在實及貧民仍具知稟開奏 十一月
五日試尚書戶部侍郎兼詳定一司敕令王俱言臨安
府每歲收養飢凍貧乏老弱殘疾不能自存乞丐之人
凡用錢米近十餘萬不為不多矣可謂仁政之所先也
倘官吏失於措畫則宜收而棄以壯為弱或減剋支散
或虛立人數如此之類其弊多端不可不察雖已不佳
行下臨安府約束尚慮習為常事虛費帑財有害仁政
望嚴詔守臣俾戒飭當職官吏務在廣行收養無致遺

棄躬親監臨盡數支散如有違戾按劾以聞其外路州縣亦乞特降指揮施行詔令戶部檢坐見行條法申嚴行下 二十七年九月二十九日提舉兩浙西路常平茶鹽公事朱倬言比見郡縣之間自冬徂春所給乞丐錢米例皆付之胥吏遂使狡獪者數口之家皆賴支請而貧窶無以自存者及見棄遺乞令每歲抄劄委州縣長吏令在郡邑者責之社甲首副在村落者責之保正副長結罪保明使無遺濫從之 十月十八日上諭輔臣曰近日理會乞丐人錢米事所用錢米數目不少聞官司不留意多被胥吏輩冒名支請其實乞丐人未必皆得又諸路州郡支常平米賑濟徃徃止及城下其

外縣鄉村亦皆不及甚非發政施仁之道可與措置草
去姦弊務要實惠及民宰臣湯思退等奏曰恭稟聖訓
當令戶部措置施行 二十一日戶部言乞行下諸路
州縣委自守令躬親措置責委坊正者保抄劄貧乏乞
丐姓名盡數收養不管漏落仍立賞出榜諸色人陳告
詭名冒請及減剋作弊之人斷罪追賞施行令常平司
常切覺察從之 同日權戶部侍郎林覺言乞措置兩
縣并在城兵官公吏及甲頭如抄劄貧民姓名不實及
自行詭名冒請錢米許諸色人告每一名賞錢一十貫
至三百貫止犯人令臨安府根勘依條計贓斷罪追賞
若有不係貧乏乞丐之人追賞斷罪施行從之 二十

九年正月二十一日大理評事賈選言秋冬之交委官
籍定乞丐姓名計所賑之米撥付監官三日一給其間
疾病不能如期而至者官吏隱藏入已欲望行下郡邑
支散之際或有疾病而不自來請者令監司責付團甲
就給不得減剋守令覺察不得違從之 二月十三日
詔臨安府養濟乞丐合至二月終住罷今天氣尚寒與
展半月後又展半月 三十年二月十二日中書門下
省言朝廷支降錢米令臨安府養濟乞丐至二月終住
罷詔天氣尚寒與展半月 九月二十三日浙西常平
提舉楊侯言乞丐將臨安府錢塘仁和兩處每歲養濟貧
乏不能自存之人令逐縣知縣兵官抄劄開具姓名結

罪申府差官驗實各用紙封臂用印給牌置厯每五日
一次當官支給如有冒濫不實立賞錢一百貫又許人
陳告將犯人斷罪其元抄割官吏並行黜責又兩浙轉
運司言浙東西州縣乞丐既各處依條收養及自罷經
營無疾病墮傭之人並不合入今來養濟四院所有本
府街市西北流寓合收養之人欲依楊僕申明立賞出
榜約束委兩縣丞再行審驗當官俵散每一十人為一
甲遞相委保如甲內有冒名支請許諸色人陳告如所
委官故意阻節許直經本府陳狀合千人因承行乞取
錢物及冒名支請錢米之人並依重祿法當職官亦具
名申奏黜責從之 三十一年九月七日知漢州王葆

言川蜀地狹民稠貧窶者衆衣食不給遂致乞丐在法
每歲於十月初差官檢察內外老疾貧乏不能自存乞
丐之人非傭墮者籍其姓名自十一月一日起支每人
日支米或豆一升七歲以下減半每五日一次併給至
次年三月終止緣州縣自軍興以來常平田土多已出
賣止是義倉米一色具上件米惟充災傷以備賑給平
時難以擅行支散今養濟指揮既無常平錢米何以給
散欲乞如關常平米豆去處許於見管義倉米內通融
應副日後如有收到常平司田地收穫米斛逐旋撥還
從之

養濟院

孝宗隆興元年十月十四日詔天氣尚寒其

街市飢凍乞丐之人合行措置養濟可令臨安府自十一月一日為始其合用錢米并約束事件並依節次指每歲飢凍乞丐之人令臨安府措置養濟率以十月十五日抄劄十一月一日為始俵散錢米至次年二月住支大人日支米一升錢一十文足小兒減半以二月天氣尚寒後降指揮又展半月逐年遂為常例二年閏十一月十六日詔臨安府內外百姓不能自存之人每至冬月各計口數大小日支錢米養濟訪聞尚有士人或因赴調因居旅邸或因轉徙流離道路裹糧罄竭鐘粥不給情實可憫令臨安府專委官於城內外如有似此之人更切覈實量度支給係官錢米以禮賑恤

十二月十二日權發遣臨安府薛良朋言本府奉詔
取撥常平米委兩通判賑給飢貧之人今措置分委漕
職官同廂官於在城并城南北廂巡門抄劄實係飢貧
別無經營之家及流移人開具姓名支米半月大人每
口一斗五升小兒減半委兩通判踏逐城南北廂寬濶
寺院置場照闕子支給常平米見管不多照得昨來於
省倉下界糶場封樁米內借撥二萬石除撥到一千二
百石外有一萬八千八百石未曾取撥欲望行下省倉
照會據本府今來賑給米數逐旋應副候散訖具帳銷
破詔依令戶部每料支二千石俵散盡絕接續支給
二十二日權發遣臨安府薛良朋言被旨日來雪寒臨

安府近城多有飢貧之人今取撥常平米賑給已委兩
通判於城南城北置場支給外今據通判常程胡堅常
申日來多有鄉村及毗近州縣飢貧人戶聞知本府賑
給米斛乘勢前來陳乞支給請若或一槩支給切慮人衆
所支米斛至多若不賑給又恐有失朝廷寬恤之意今
措置欲將日後鄉村及毗近州縣到來飢貧之人分委
錢塘仁和縣尉躬親驗實如委貧乏給牌押赴養濟院
每大人日支米一升錢一千文足小兒減半從之 乾
道元年正月一日南郊赦在法病人無總麻以上親同
居者廂背報所屬官為醫治訪聞比來客旅寄居店舍
寺觀遇有病患避免看視趕逐出外及道路暴病之人

店戶不為安泊風雨暴露徃徃致斃深可憫憐可令州
縣委官內外檢察依條醫治仍加存恤及出榜鄉村曉
諭月具有無違戾去處以聞 乾道三年十一月二十
六年十一月六日南郊赦並同此制 十九日詔已降
指揮州軍災傷去處委官措置賑濟詔聞臨安府城內
多有乞丐之人顯見抄剽未盡今臨安府分差通判日
下措置將城內乞丐盡行抄剽依已降指揮賑濟不管
漏落仍具已賑濟遇人數申尚書省從中書門下請也
二十二日權發遣臨安府薛良朋言本府見依已降
指揮支破錢米收養乞丐近緣浙西州軍水傷尚有飢
貧人戶多在本府城內外求乞切慮缺食本府欲支撥

常平義倉米斛委官於近城寺院一十二處煮粥給散
養濟詔依令臨安府恪意奉行 再詔紹興平江鎮江
府台秀常湖州照應臨安府已行事理取撥常平米疾
速養濟施行 二月八日臨安府言收養乞丐所支錢
米內提舉司支撥到八千石外目今養濟乞丐委是缺
乏至多今約度乞更支撥七千石應副詔將義倉米內
取撥五千石應副支散施行 十一日知紹興府趙令
報言本府見行賑濟雖先就在城置場煮粥給散養濟
緣城外鄉村闊遠切慮飢流人奔趨不及今措置更於
城南大禹寺城西道士莊添置兩場隨所大小均定人
數並約定時辰煮粥給散以革重疊之弊仍備辦藁薦

存養從便猶泊及將柴錢責令主首掌管支給或恐內
有病患之人官給藥餌專差職醫調治及分委通判職
官薄尉日逐往諸場提督點檢詔如人數稍多更令添
場依此賑濟 二十六日監察御史程叔達言臣聞凡
人平居無事飢飽一失其節且猶疾病隨至況於久飢
之民相比而集於城郭春深候暖其不生疾疫者幾希
故自古飢荒之餘必繼之以疫癘熙寧中浙西荒旱取
民於城而餽粥之死者至五十餘萬比嘗奏乞更於郊
野設粥賑散今飢民聚於城外而就粥者不下數萬人
頗聞漸有病者有斃者臣略問之域內給棺殮者已至
七十餘人切慮駸駸不已日者常詔有司擇空閑屋宇

奏

以安濟之又命醫執劑以療治之可謂德意周至矣然
臣切以為衆之所聚疾勢易成轉相漸染難以復治謂
宜亟敕府縣親行科擇多出文榜凡有家可歸有鄉可
依者許其自陳給以糧米使之各復歸業仍官給文引
俾就歸業之處請粥或米以存恤之至於無所依歸之
人乃令就病坊安養從之 二十七日詔常州無錫縣
見有士民率米煮粥俵散被水飢民切慮米斛不繼今
本州就便於本縣和糴到萬畝田米內支撥一千石仍
委縣官一員同監視煮粥接續養濟無令失所從中書
門下請也 二十九日詔臨安府見行賑濟飢民訪聞
其間多有疾病之人切慮缺藥服餌令醫官局於見賑

濟去處每處各差醫官二員將病患之人診視醫治甚
合用藥於和劑局取撥仍日具醫過人并用過藥數申
尚書省從中書門下請也 三月十四日權發遣臨安
府薛良朋言今來已是春深正當農務兼蠶麥將成諸
處流移飢民利於目前賑濟設粥以致將來荒廢農業
無所指望今措置諸處糴米設粥欲自四月十五日止
罷仍預期出榜告諭其壯健人欲別給帖付與各人仰
州縣不得拘催官私欠負并仰田主各支種糧務令安
居不致離散其有疾病羸弱未能行履之人欲別踏逐
寺院散粥煎藥以待痊安方可發遣回歸鄉貫從之
十五日殿中侍御史章服言近嘗具劄子面奏賑糴利

害乞下臨安府知通講究措置條具未蒙施行間今臨安府已得指揮欲於四月內並皆往罷據臣管見糴米者大半是街市雜人而流移人僅居其半至如食粥者皆流移飢民疾病乞丐之輩也朝廷既已賑糴又令散粥今忽同時俱事出大遽似有未安乞於未罷之前減作每人一升出糴旬日然後獨榜指日罷之蓋革之以漸不致惶惑至如散粥欲乞且展一月罷日仍量給粥米發遣庶幾有以藉手不生怨望不諱諠從之內設粥給散飢民今本府展至四月終 四月二十二日詔臨安府城內外見今養濟飢民已降指揮展至四月終訪聞其間多有疾病殘廢等人深慮難以一槩便行住罷今

姜誥薛良朋韓彦古同本府通判漕司屬官各一員徧
詣散粥及病坊去處公共措置躬親揀點將委實疾病
殘廢癯老羸弱鰥寡孤獨不能自存見在病坊之人更
展限半月給散粥藥資濟繼而兩浙路轉運判官姜
誥言賑濟飢民除揀選壯健願還鄉及有經紀之人各
已給米使之自便外有其餘飢病之人已申朝廷每日
人支米一升各令自造粥飯給歷五日一次支請今尚
有五千二百七十四人見行養濟緣目今新米成熟街
市米價減落今來請米之人易於求趣不致飢餓乞降
指揮至七月終住罷支散從之十月十一日詔諸路
州縣老疾貧乏乞丐之人在法以常平米斛養濟今來

天氣尚寒養濟月日不遠切慮奉行減裂未副朝廷惠
民之意令戶部檢坐條法指揮申嚴行下須管依時支
錢米如法養濟務行實惠從中書門下請也 十二月
二日詔浙西常平司於本司新糴到米內取撥二千石
應副賑濟歸正不能自存之人大人每日支米一升小
兒五合內有實殘廢患病不能經營之人每日更各添
支鹽菜錢二十文即不得妄有支用 二年八月十五
日詔令鎮江府建康府守臣括責到貧乏歸正人大人
每日支米一升小兒五合內有實殘廢患病不能經營
之人每日各更添支鹽菜錢二十文省指揮到日於常
平內支破至乾道三年五月終仍踏逐空閑官屋應副

居住或間數不足即將見賃屋人日納房錢減半 十
二月四日浙東提舉常平司言州縣鎮寨每歲給散老
疾貧乏不能自存及乞丐之人豆米係將來常平司見
管沒官田產收到租課內給散緣自出賣諸司官產皆
已賣過即於常平司別無所入欲將州縣所管常平司
義倉米權行散給戶部看詳義倉穀在法唯充賑給不
得他用有礙上條照得本司近申到諸州縣通共糴到
常平米一十四萬三千餘石乞下本司仰據諸州縣今
冬收養乞丐的實合用米數於前項糴到常平米內通
融取撥應副從之